

近代中國史料叢刊分類選輯
沈雲龍教授選編

甲集：奏議、奏疏、疏稿類

滇黔奏議

劉嶽昭著

文海出版社
有限公司
印行

滇黔奏議卷六

湘鄉劉嶽昭蓋臣著

男錫楚謹編

奏報官軍援剿普安立解城圍摺子

同治八年七月

奏爲官軍援救普安剿賊大勝立解城圍恭摺具報仰
祈

聖鑒事竊照滇黔毗連之普安應於本年四月內被新城
逆匪勾結苗逆嚴大五等率黨萬眾圍撲城池經署
同知吳宗蘭會同營員督率紳練晝夜登陣竭力固
守臣疊據稟報飛咨貴州撫臣曾璧光調兵會剿並
飭署興義府知府葉正邦護興義營游擊劉官德都

司包於蓮等先往援救署平彝縣事候補知州文鴻
盛一聞警報卽派軍功楊德溥帶練一千名籌給經
費馳往堵擊臣於克復尋甸州城後勉力抽派副將
張松林都司劉奇義各帶所部勇丁又檄知縣任傳
綸沿途號召鄉練聯絡聲勢以期迅解城圍其邊境
守禦事宜文鴻盛派令增生張旭中妥爲布置均經
奏明在案六月初十日張松林劉奇義任傳綸等帶隊
到普貴州撫臣所派之署安義鎮總兵楊發貴副將
池有蓮參將楊得勝趙明清等亦先後抵境與前署
同知吳宗蘭接署同知李斌等會商附城之劉官庄

陸官里老官里老巴里支家里稽家里等處賊營三十餘處其地險賊悍者又麇聚於高家里晝則羣伏不動夜則四出環攻最爲兇狡該文武等審察形勢必須先破堅巢其餘自應瓦解十一日黎明先令鄉練作爲嚮導布列山下賊皆守寨不出從山頂施放鎗礮居高禦下多被擊傷鄉練佯敗退走賊卽大隊追出誘至平地張松林劉奇義先派兩路奮勇從山後攀援而上各路兵練正與支家里陸官里等處踞匪接仗賊勢彼此不顧張松林劉奇義與賊鏖戰兩時之久斃賊數百人後山之軍已用火箭射燃壘內

賊棚當卽驚亂我軍直追上山張松林劉奇義首先衝入寨頂各軍自陸官垵老巴垵稽家垵等處掃蕩而前四面圍攻斃賊一千餘人生擒一百三十餘人斬於陣前其墮巖落澗者無算賊遂狂奔我軍追至輓橋哨有劉官垵支家垵潰匪從旁竄出經張松林等登時擊散葉正邦楊發貴督同守備董懷經軍功鍾占魁李紹唐亦各分路窮追至普安縣屬之江西坡地方距廳城已一百三十餘里敗賊散走無蹤探係爬山越嶺竄歸新城老巢惟該處賊踞十有餘年非倉猝所能深入且道路已成荆棘無地可辨米糧

不得不暫行收隊其普安縣城經游擊易飛熊署知縣牟謙篤帶領兵團併力防剿廳屬之坎者古德冷風口一帶賊壘十餘處先後被都司包於蓮守備孫承忠等攻克擒斬甚多四至地面復經吳宗蘭李斌等周歷搜捕現均一律肅清由該文武具稟到臣查新城賊匪勢極披猖圍困普安已踰三月如令其盤踞蔓延實爲兩省邊患所幸該地方文武齊心堅守赴援各軍雖當糧餉兩絀俱能奮勇爭先臣揀派之副將張松林都司劉奇義知縣任傳綸等取道平彝由亦資孔捷徑星夜奔馳到境喘息未停卽能會

軍剿賊立解重圍城中十餘萬生靈咸有再生之慶
辦理尙合機宜所有在事尤爲出力之文武紳團兵
勇臣已查明隨摺開具清單恭呈

御覽合無仰懇

恩施以示鼓勵出自格外

鴻慈除將張松林劉奇義等營札調回曲仍飭楊發貴葉
正邦劉官德等乘勝進攻新城賊巢並查明傷亡兵
勇彙案辦理其黔省紳團另由貴州撫臣覈獎外所
有官軍援剿普安立解城圍各緣由理合繕摺由驛
馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

天
地
人
三
才
圖
說
卷
之
一
上

附奏分別漢回解散脅從並親赴省垣派諸將合剿
迅解城圍片子

再省圍未解臣前飭昭通鎮總兵李家福督同總兵
鍾福俊王維金吳奇忠等各率所部開拔赴省與撫
臣提臣會籌攻剿頃據該鎮稟報省軍進規祿豐易
門安甯昆陽新興等州縣附城賊壘負固如常我軍
現紮南門之大梵宮三節橋田壩等處現擬截斷該
逆糧路即可會攻江右館一帶巨巢又飭馬天順帶
領民兵五百名赴省由提臣調遣令其立功贖罪臣
接據普安解圍之捷即擬將張松林劉奇義等營調

回親帶赴省適接署昭通鎮全祖凱及各委員等稟稱回眾實係紮營自固漢民意在報仇必欲剿回提臣唐友耕因漢民阻止尙無拔營援省確期等情臣以昭魯之事本起於奸匪浮言其中附和者眾如不分別重輕權宜辦理非特宣威威甯等處羣起驚疑鋌而走險且恐三迤安分之回聞風生變實於大局有關臣與撫臣提臣出示曉諭並飭全祖凱會同該地方文武嚴拏滋事首犯設法解散脅從先行保護漢民村寨免其藉口又密飭東川府孔昭鈞體察實在情形再行酌辦統俟稍有端倪臣卽馳赴會垣與

撫臣提臣通籌全局庶咽喉無梗阻之虞肘腋無倉猝之變至道員劉嶽曙所部前經

奏明駐紮尋甸馬龍各隘所有尋甸善後事宜漸有條理現派該道之後軍提督胡志祺副將王蔭南李志高黃正久等四營馳赴省垣與李家福等合力會剿以期迅解城圍惟臣進省在卽東路漸覺空虛隨處宜防緩急仍飭該部酌留數營擇要分布以壯聲威而期周密爲此附片，謹陳伏乞

聖鑒謹

奏

軍機大臣奉

旨另有旨欽此

奏陳昭魯回務情形並起程赴省日期摺子

同治八年八月

奏爲昭魯回務委員相機辦理臣卽馳赴省垣恭摺仰

祈

聖鑒事竊查昭通魯甸漢回本係雜居遇事每生嫌隙自同治五年剿辦馬富貴等之後地方漸就肅清上年西逆大股下竄省城危急該處回民頗臻安貼東路餉源賴以無阻本年四月內提督唐友耕自川帶兵來援將次入境忽有昭通奸匪播散流言傳稱唐友耕先滅昭通一帶回人再行進省唐友耕原籍昭通大關廳人所部名爲川軍實俱演練其中游手無賴

之徒在所不免昭通民本強悍增以唐軍六千之眾
遂有恃而不恐其以復仇爲辭齊赴昭通府恩安縣
衙門關關請畱援軍先辦昭回於是魯甸威甯各處
回民間風據險疊出剽掠東昭大路遂多梗塞疊據
該文武據情轉稟並准唐友耕咨商前來臣查漢回
不和本非始於今日而川軍援剿事莫重於省城當
經咨請唐友耕拔營前進一面出示剴切曉諭並飭
署昭通鎮全祖凱楚雄府知府吳春然馳往體察情
形保護漢民村寨並嚴拏爲首滋事唆使之人懲儆
了事以冀保全完善詎料全祖凱到後唐軍已與昭

魯回眾接仗數次互有損傷全祖凱暫就龍寶山要
路紮營長寨五里坳魚脊等回復來攻撲立經擊退
陣亡額外錢忠祿一名以眼前情形而論言撫則唐
鞏固結已不可解漢人之勢有若燎原言剿則昭魯
本來無事之區一變而爲鋒鏑則餉道釐金在在堪
虞全滇命脈將有不堪思議者且此次回民李本忠
等紮營自固始因滅回之謠繼求自全之計與他處
公然叛逆者本有不同臣與撫臣提臣往復函商意
見相合現經咨請四川將軍臣崇實總督臣吳棠催
令唐友耕迅卽拔隊援省毋爲浮言所動逗遛昭通

江川考言 卷二
一面飭全祖凱明子解散暗爲隄防並加派前署昭
通鎮楊盛宗添募勁練一千名前往會辦如唐友耕
業已開拔而昭魯回民依然負固則勢難中止自當
立于殲除設或唐友耕擁兵不進依違其間旣已開
釁於事前復置省圍於不顧執成見而昧重輕臣亦
當會同撫臣據實

奏參不敢稍存回護至東川與昭接壤已飭東川府知
府孔昭鈞會同署東川營參將劉萬勝督率兵團擇
要防堵孔昭鈞熟悉回情具有膽識並令與全祖凱
楊盛宗等相機辦理現在尋甸善後已漸次告竣普

安亦已解圍昭魯均經派員辦理臣自應馳赴省垣
會籌全局現定於八月二十六日起程進省軍務一
切總與撫臣提臣和衷商辦以期迅解城圍仰副
朝廷屢念邊陲之至意至省中近日軍情俟臣到後即當
查明切實具

奏所有現在昭魯回務情形及徽臣進省日期理合繕
摺由五百里馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

附奏東南賊營投誠省圍不難立解片子

再臣正拜摺間接准提臣馬如龍飛咨前經會商撫臣先後派兵將安甯之獨樹鋪上下班鳩村長坡等處賊壘攻破該逆歸路已斷勢甚窮蹙一面出示曉諭宣布

朝廷威德示以剿撫兼施卽有駐紮南關外西嶽廟之賊首段成功蔡廷棟等情願獻營投誠立功贖罪當與撫臣再四密查實係出自真誠十三日夜提臣力疾親督弁勇並會同撫臣及總兵李家福各帶隊伍前往辦理該僞首領段成功蔡廷棟自率所部五千餘

人伏地請罪所有省城南門外白衣庵朝陽庵雙龍橋黑龍廟土橋西嶽廟天廚宮玉皇閣南壩大梵宮蕭公廟彌勒寺西壩白馬廟大觀樓一帶賊壘礮樓礮臺共六十餘座全行收復現在分兵駐紮一面安置降眾其西壩以下各賊壘亦卽派兵攻剿旋據李家福稟稱情形無異臣查省城東南賊營旣已投誠省圍不難立解現已咨會撫臣提臣並飭李家福乘勝進攻臣卽於二十六日馳赴省城會籌一切以期迅解城圍上紓

宸慮至收復各賊營詳細情形仍由撫臣具奏理合附陳

伏乞

聖鑒訓示謹

奏

軍機大臣奉

旨知道了欽此

1950

11

11

2

會奏添派官軍剿克楚雄等城摺子

同治八年九月

奏爲添派官軍分路進剿連克楚雄南安定遠等府州
縣三城恭摺仰祈

聖鑒事竊臣毓英前將省城解圍並攻克大姚廣通安甯
等州縣城池大槩情形馳

奏在案嗣卽分派各軍以吳永安岑毓寶何秀林邵天
貴譚美李朝相柳明泰楊聯桂龍汝霖劉步龍楊好
清韓珍及李家福所派之鍾福俊吳奇忠等圍攻土
堆賊壘以馬忠潘文元李廷標牟永昌楊福章王永
安林桂清等分路進攻激江府城飭李維述督催張

士進沈朝覲及派往助剿之革職留營副將呂鎮南等進取楚雄李維鏞劉書堂王瑞蘇斯洋等圍攻南安並派王鍾祥等助剿定遠楊謙李壽椿等助剿祿豐楊林李長春等助剿昆陽分投拔發去後隨據稟報李維鏞等圍攻南安州城正在得手於八月二十日忽有鎮南大股賊匪由楚雄大小驃川來援將子母銜疊蛟山下奪寶萬家房以口誇一帶連紮十數營意欲接通城內經李維鏞劉書堂親督勇目楊正旺等專剿援賊畱王瑞蘇斯洋等圍攻州城二十一
二等日李維鏞劉書堂等連獲勝仗大挫賊鋒二十

三日卯刻卽將子母街一帶賊營攻破斬擒甚多餘
匪退踞小驃川之大覺寺李維鏞劉書堂帶勇乘勝
進剿於二十四日復將大覺寺攻克殲斃杞僞將軍
張僞先鋒及賊黨二百餘名生擒數十名大小驃川
一律肅清城內賊勢益孤王瑞蘇斯洋激勵兵勇奮
力攻剿二十五日當將附城賊壘全數掃平查南安
州城半面依山素稱難守此次被賊占踞逆等另於
城內築爲三營修整堅固蘇斯洋等將城外賊營掃
蕩後卽揮軍由南門越城而入逆等退踞新壘官軍
四面環攻將賊汲水截斷至二十六日丑刻賊勢不

支奪路越城衝逃官軍層層截殺於城內斃賊數百
餘名逃出之賊復跟蹤追剿生擒偽甯南大將軍馬
開寶偽安東大參軍呂鈞音及偽領軍參謀等十一
名就地正法餘匪殲擒無算當將城池克復州境一
律肅清此攻克南安州城之大槩情形也張士進沈
朝覲呂鎮南等進攻楚雄府城該員等及所部兵勇
半係楚雄民籍駕輕就熟一入府境各鄉民人卽紛
紛歸順直薄城下張士進密飭舊部練目李正林李
正德尙宏等暫緩薙髮混入城中勾致內應八月二
十七夜官軍四面攻城正在喫緊李正德尙宏等潛

入府署將逆賊火藥局燒燃霹靂一聲轟倒房屋數間賊匪倉皇失措李正林乘亂率領難民奪據南門城樓張士進呂鎮南沈朝覲帶領官軍架梯蟻附而上分頭抄襲復將東西北三門攻克殲除首從悍賊四百餘名餘匪越城奔潰官軍追殺六十餘里生擒杜偽中郎將尹偽大參軍及賊黨多名並將呂合土城攻克八哨夷匪聞風膽落亦赴營具粟求撫境內一律肅清此克復楚雄府城之大槩情形也黃文學等攻剿定遠賊匪先將附城賊壘次第掃蕩四面圍逼城下黃文學督率所部楊朝鳳黃泰余彭壽蔣世

恩劉全忠等堆積柴捆翻滾而進逼攻西北兩門楊
玉科派往會剿之都司徐聯魁馮長壽蔣宗漢祖大
章等逼攻東南兩門一面挖瀉城濠之水一面開挖
地道該逆晝夜出撲均被官軍擊敗殲斃甚眾先是
張士進克復鹽井收獲偽大司旅馬錫晉據供伊子
及弟均踞定遠縣城情願前往招降獻城贖罪經李
維述派人解至定遠交黃文學督飭辦理日久並無
成效適杜逆派偽大司軍馬金保帶領賊黨數千名
由鎮南來援城內賊匪抗拒益力截獲逆等信件馬
錫晉復蓄謀不軌黃文學恐墮奸計即將該逆仍交

李維述解省辦理一面督兵加力攻城其援賊馬金保一股經李維述派往助剿之千總劉興等帶兵堵剿屢獲勝仗於八月二十九日將該逆匪所踞之松廠子甸河一帶賊壘攻破斬擒甚多馬金保遁往姚州至是定城賊匪望援既絕徐聯魁所挖地道已成黃文學所翻柴堆亦抵城下劉興擊退援賊亦帶兵前來會合夾擊正在挑選奮勇擬由柴堆一面架梯登城一面裝實地道火藥同時並發適有賊目田宗承赴營乞降情願獻城贖罪黃文學查其情詞懇切卽於九月初三日派兵進城勒令該降卒等盡拔出

城當將定遠縣城收復具稟請示辦理前來臣據照
時已到省會同臣毓英覆查定遠賊匪先經馬錫晉
前往招降抗傲不遵及至窮蹙求撫恐未盡出真誠
已飭黃文學畱心查察如果各降目中有傾心效順
者自當予以自新儻有心懷叵測者卽行設法殲除
以絕後患現在昆陽賊匪經張保和圍剿窮蹙亦具
稟到省乞降臣等已飭張保和相機辦理解散脅從
至逆首楊振鵬上負

天恩甘心悖叛實屬罪大惡極臣等會商提臣馬如龍自
當設法殲除以彰

國法斷不容率眾投誠馬忠李廷標潘文元楊福章等
進攻澂江已由下關鳳凰山九村等處分路趨營前
進惟田仲興王正坤等圍攻新興州城日久未下臣
等會商提臣已派參將馬青雲督帶降目段成功蔡
廷棟並由臣毓英添派千總周作祥等各部兵勇降
卒先後前往助剿以期迅拔堅城楊國發等圍攻竹
園賊巢正當得手又有馮兮援賊二千餘名衝至朋
普一帶肆行燒殺以致板斃寨等處夷眾復叛附賊
抄襲官軍後路經楊國發分兵攻剿旋將板斃寨賊
壘攻克斬級甚多而署守備張有能進攻趙林寨賊

壘陣亡臣等恐該處兵力不足已由省抽派都司盧得志孟朝宗等營兵勇馳往助剿務將竹園老巢迅速攻拔以通開廣大路其省西土堆餘匪及祿豐縣城踞賊均因後路斷絕負隅死拒臣等督飭現圍土堆各軍添紮聯營十數重環逼賊柵鎗礮晝夜轟擊每日均斃賊匪數十名該逆日間無路可出每於夜間分股衝突均經各營嚴密截殺無有漏網其祿豐縣城亦經李維述加力圍攻均可計日撲滅溯查迤西髮逆上年傾巢竄省不下十數萬人加以東南叛附賊黨各屬被脅人民號稱三十餘萬猖獗異常幸

蒙

皇上福威次第克復多城立解省圍現由省城西上直至
楚雄僅有土堆祿豐二處未下共計賊匪不過五千
餘人必須聚而殲旃不畱餘孽其省南之昆陽新興
館驛婁兮及東南之徵江竹園等處雖於上年悖叛
實係多年老巢刻下籌畫西征必先清東南內患徒
剿固不足以示招徠徒撫更不足以儆兇悍臣等惟
有會同提臣妥籌辦理殲其渠魁撫其脅從務期處
置得宜永絕後患以仰副

聖主軫念邊陲之至意此次克復城池出力文武員弁容

臣等查明另行彙案奏懇

恩施其各路打仗陣亡之都司銜補用守備張星署廣西
營守備事千總張有能五品藍翎千總馬興勤武定
營千總唐玉衡守備銜補用千總楊世雄外委薛廷
相嚴鶴齡文生丁文華帶傷五日內身故之游擊銜
補用都司李梓榮立功後在營瘴故之游擊銜補用
都司楊沛都司銜補用守備傳承霖楊朝元守備銜
補用千總唐榮五品藍翎千總沈春六品藍翎把總
吳彩五品銜候選訓導周鳳翔候選從九品班朝貴
張榮等均堪憫惻相應請

旨飭部分別從優議卹以慰忠魂所有添派官軍分路進剿連克楚雄南安定遠等府州縣三城緣由謹合詞恭摺馳陳伏乞

皇太后

皇上聖鑒訓示再此次摺報係臣毓英主奏合併陳明謹奏

會奏安甯逆首馬清及前鹽井馬錫晉易門吳鳳臨
龔紹成均已訊明正法片子

再臣毓英據知府岑毓寶等稟報前次克復安甯州
城逆首僞大司令馬清率領賊黨數百名由西門越
城奔潰經該員會同游擊李廷標等跟蹤追殺一面
知會駐紮祿脰之守備楊謙等迎頭堵剿殲擒殆盡
馬清僅帶從賊數十名由祿豐一面衝逃復經知會
李維述分兵兜擊首從悉數擒獲安甯全股賊匪無
一漏網經李維述訊明將該逆首馬清及前在鹽井
投誠復謀不軌之逆首馬錫晉一併派員解省先行

稟報前來臣恐途中疎忽致令巨逆漏網飛檄駐防
富民縣城之知府鍾念祖就近訊明正法其前次克
復易門縣城擒獲之偽參軍吳鳳臨龔紹成等二名
亦經飭令周廷獻就地正法先後據解首級到省已
由臬司程誠委員驗明理合附片具陳伏乞

聖鑒謹

奏

會奏官軍收復昆陽殲除各逆州境肅清並分剿各

路賊匪摺子

同治八年十月

奏爲官軍收復昆陽州城殲除首要楊振鵬各逆州境
一律肅清並現在分兵剿辦各路賊匪情形恭摺仰

祈

聖鑒事竊臣等前將克復楚雄南安定遠等府州縣城池
及昆陽賊匪具稟乞降各情形馳

奏在案本年七月間官軍攻克海口時擒獲賊酋馬光
明求免死罪願爲昆陽州城內應經岑毓寶張保和
等察其情詞懇切密遣之迨省城圍解張保和將昆

陽城外賊壘次第蕩平羣賊畏懾軍威馬光明乘機
開導始有乞降之請而逆首楊振鵬自知罪大難容
雖有畏懼之心終懷詭詐之計臣等嚴飭張保和一
面設法解散一面加勁環攻賊勢難支於九月初八
日馬光明帶領城內被脅難民先赴軍前投誠張保
和佯許之初九日馬光明復偕逆黨馬聯魁至營試
探情形張保和仍以好言安慰並遣把總田春芳書
識姚長齡等隨同入城示以不疑而楊振鵬率領匪
黨分踞城內要地抗拒甚嚴遽難得手臣等恐日久
變生當卽商同提臣馬如龍親往昆陽督令張保和

知縣岑毓琦等相機辦理提臣馳抵州城里許之臥
龍莊審察賊情必須先散黨與方能擒斬首逆卽派
游擊張御鶴入城開導漢回均漸釋疑其勢逐次解
散隨飭官軍進城駐紮布置周妥先將賊目馬似良
李巴嘴馬小潘等擒獲解省正法楊振鵬愈覺自危
於二十二日藉稱出見提臣帶領死黨數十人意圖
乘間逃逸經提臣督飭張保和岑毓琦及都司劉自
馨等伏兵東門外四面圍擊當將該逆楊振鵬及助
逆之已革都司馬聯魁把總李濱署昆陽汛外委馬
國楨等一併擊獲立於軍前正法將首級解省呈驗

其餘越城逃竄賊匪復被城外官軍截殺殆盡尙有該逆之胞兄楊振鴻及往來迤西通賊之馬生龍馬周安馬長壽等四名先期逃逸臣等檄飭總兵馬忠設法密捕均經弋獲解省正法城內投誠回人一百餘戶臣等咨商提臣派兵護解分往新興州屬之九村呈貢縣屬之安江村妥爲安置本處漢民均已歸業仍令署知州張啟辰同知劉廷銓等共籌善後州境現已一律肅清臣等伏查昆陽州城距省西南一百二十里中隔滇池舟行一夜可到自咸豐七年被楊振鵬等襲踞本地漢民被其脅從時出竄擾大爲

省城肘腋之患歷任督撫臣派兵進剿均未得手同
治元年東南回眾就撫楊振鵬仰蒙

天恩免其重罪官至副將委署總兵乃不知感激圖報竟
敢踞城叛逆以致各處回匪望風效尤連陷多城該
逆復運糧米火藥接濟附省賊用實屬喪盡天良萬
死不足蔽辜今幸仰仗

皇威元兇授首所有著名逆黨悉數殲除積十餘年之巨
患一旦盡拔根株實足以快人心而寒賊膽新興軍
務復經詠往助剿之參將馬青雲降日段成功蔡廷
棟□□署總兵田仲興都司王正坤等剿撫兼施九

村一帶賊營相率投誠捆獻西逆首僞大司隸劉綱
僞平虜將軍馬榮科僞驃騎將軍馬天朝及本地賊
目白正坤李正保等交代理激江府知府黃紫詔督
同代理新興州知州江廷珍訊明就地正法將首級
解省查驗現仍督飭該員等竭力環攻州城務期迅
速恢復其省西土堆餘匪屢欲奪路衝逃均經官兵
嚴密截殺先後殲除過半現在僅有千餘人負壘死
拒臣等不時出城親督各營員弁激勵兵勇人等晝
夜圍攻未稍鬆勁惟祿豐激江竹園等處逆匪窮極
反噬疊據各員稟報均稱喫緊臣等恐有疎虞已由

省抽派副將何秀林游擊劉重慶守備楊林陸純剛
等各帶所部兵勇馳往祿豐會剿並飭副將張保和
速移昆陽之師前赴竹園辦理以期迅速撲滅此次
昆陽出力人員容臣等查明彙案奏懇

恩施其各路打仗陣亡之都司銜補用守備馬春恩騎尉
陳國賓外委張鼎及縣丞胡錦元武生許文揚記名
把總劉金書李恩榮王順記名外委俞文元魯安國
等均係前敵捐軀深堪憫惻又立功後在營瘴故之
千總馬治安均應請

旨飭部分別從優議卹以慰忠魂所有官軍收復昆陽州

江表傳 卷一
城殲除首要楊振鵬各逆州境一律肅清並現在分
兵剿辦各路賊匪緣由謹合詞恭摺馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

會奏妥籌整頓營伍擇任鎮將分路進剿以靖逆氛

摺子 同治八年十月

奏爲遵

旨會議具奏事同治八年七月十五日承准軍機大臣字
寄同治八年六月初九日奉

上諭本日據翰林院侍讀學士馬恩溥奏條陳滇省軍務
事宜四條一摺雲南用兵日久師老兵疲地方糜爛日
甚亟應廣籌方略以期日有起色該學士籍隸雲南情
形較熟所稱精選兵勇於川黔就近招募一二萬人是
否可行周達武之軍能否由永北進剿大理滇餉轉運

應否於瀘州或重慶設局辦理著劉嶽昭岑毓英體察情形咨商四川總督妥籌具奏至吏治與軍務相表裏地方得人則民生樂業軍務亦可漸平滇省官常年來日就廢弛著劉嶽昭岑毓英實心整頓其不能稱職者隨時參劾如有勤勞素著輿情愛戴者亦卽據實保奏原摺均著鈔給閱看將此各諭令知之欽此欽遵寄信前來除設局轉運滇餉業經臣毓英函商四川將軍總督已由崇實吳棠奏奉

諭旨欽遵辦理在案毋庸另行覈議又激勵官常一條臣等恪遵

聖訓認真整頓外查該學士所陳精選兵勇一條原奏內稱雲南兵勇漢回並用以回兵攻回匪未免同類相關至於漢民柔懦者不堪用强悍者又多不聽約束宜於川黔就近募勁勇一二萬人爲正兵用壯聲威而資進剿選本省兵勇爲鄉導均給口糧而資協剿此外不在軍營漢回人等令各安本業勿得妄相攻擊庶免牽制而消反側等語伏查用兵之道選將爲先苟能用將得人則兵勇之强悍者可使馴良柔懦者可使奮勇誠如部臣所議天下無必勝必不勝之兵而有可勝不可敗之將將勇而後兵可強也滇省

回勇固多反側由於營伍廢弛正氣不能勝邪漢勇固多桀驚由於餉需奇絀責備不能過嚴臣毓英前陳滇省軍務八條急欲規復營制籌定月餉選任鎮將冀可力挽頹風職是故也若另募川黔之勇不但人地不習難期得力而費餉既多本省兵勇必難兼顧恐散而爲賊將剿之不可勝剿况新撥四川兩湖江西浙江等省月餉自本年四月二十九日欽奉諭旨辦理迄今六月之久僅據湖北籌解銀四萬五千兩內應撥還江西欠解滇餉項下抵解京餉銀二萬兩此項餉銀先由四川籌款墊解現已在途不日可到

但爲數本屬無多有杯水車薪之慮此外各省新撥月餉均未據報解有期是滇省月餉尙無實在著落近來軍務正當得手連克九城並解省圍均無鼓勵之資臣等萬分焦灼然在本省兵勇猶可責以桑梓之誼若另募外勇似此餉需不濟難免餓殍之虞現在滇省新舊調集各路兵勇團練及收獲降卒尙多若認真挑選可得精銳兵勇六七萬足敷分路進剿該學士所請另募川黔兵勇一二萬人之處應毋庸議又所陳分路進兵一條原奏內稱雲南地勢迤西高而迤東下大理距滇省七百餘里崇山峻嶺仰攻

甚難現聞周達武統領川兵在甯遠越儻防堵何如
卽用此兵以剿爲防抑或以四川月餉協滇餉三萬
兩之款酌益周達武之兵俾由鹽源永北一路夾攻
大理以分賊勢杜逆腹背受敵不惟省圍易解大理
亦可指日蕩平等語查杜逆竊踞迤西各城根深蒂
固必須分路進剿方能迅速蕩平臣毓英前陳滇省
軍務八條擬分三路進兵一由三姚永北進剿與該
學士所見略同現在三姚地方已克復大姚定遠兩
縣城祇餘姚州一城尙未收功臣等現飭副將楊玉
科帶兵進攻業已四面合圍又飭參將黃文學駐守

定遠規取永北廳城一俟蕭豐克復定遠後路無虞
即可長驅而進至周達武一軍能否以剿爲防臣等
欽遵恭錄

諭旨咨商四川督臣妥籌辦理接准咨覆該軍已

奏明移駐川北防剿陝甘狗匪未能由永北進剿等情
自應毋庸置議就目前滇省情形而論不難於籌兵
而苦於缺餉若得各省照部撥款項源源解濟俾得
激勵士卒乘勝掃蕩自不難於成功相應請

旨飭下湖北湖南江西浙江四川各督撫將應撥解滇
省月餉迅速飭司籌撥交滇省委員按月轉運來滇

以資接濟臣等身任疆寄責無旁貸自當悉心妥籌
整頓營伍擇任鎮將分路更番進剿以期早靖逆氛
仰副

聖主軫念邊陲之至意所有臣等遵

旨議奏緣由謹繕摺具陳伏乞

皇太后

皇上聖鑒訓示再此摺係臣毓英主稿合併陳明謹

奏

軍機大臣奉

旨另有旨欽此

會奏補參失守城池知縣革職留營摺子

同治八年十月

奏爲補參失守城池知縣請

旨革職留營以觀後效恭摺仰祈

聖鑒事竊查同治六年十月內迤西逆匪先後竄踞武定

元謀祿勸羅次等州縣城業經前護督臣宋延春將失

守城池文職各員據實

奏參並聲明署元謀縣事揀發知州楊思齊不知下落

容俟查實另行辦理奏奉

諭旨在案現已查明元謀縣城被陷時該署知縣楊思齊
先期帶領團練在距城六十餘里之馬街要隘防堵

其元謀縣城係由省派往助剿之回員楊先芝在內駐防十月二十一日逆匪竄撲馬街楊思齊督率團練正在竭力堵禦不意另股賊匪繞越山後直撲縣城楊先芝勾通逆匪以致城池被賊襲踞該員楊思齊聞信馳回救援無及馬街旋亦失守該員帶領團練退守江邊因武定祿勸羅次等城相繼失陷元謀來省之路俱已隔絕久未接獲該員稟報嗣於七年三月內副將楊玉科帶兵繞道四川會理州進攻元謀該員楊思齊帶領團練助剿隨同克復縣城復經楊玉科暨知府鍾念祖先後派委該員前往沿江入

馬地方安撫夷眾於八年七月內安撫事竣由藩臬
兩司札調該員晉省取具親供詳請補參前來臣等
伏查元謀縣城雖因回員通賊變由內生與攻陷失
守者不同該員楊思齊先期帶團在外防剿聞信馳
回救援無及情有可原但職司守土咎有應得相應
請

旨將署元謀縣事同知借揀知州楊思齊卽行革職該員
於失守後退守江邊旋帶團勇隨同官軍恢復城池
尚屬自知愧奮合無仰懇

天恩免其按律定擬仍畱軍營差遣以觀後效之處出自

逾格鴻施謹合詞恭摺具陳伏乞

皇太后

皇上聖鑒訓示謹

奏

軍機大臣奉

旨著照所請該部知道欽此

會奏游擊蘇開元疎防監犯參請革職畱營並蔡杜氏仍交馬如龍嚴加約束及訊明楊鳳翔劉映山張開祥馬光耀四逆正法片子

再前官軍收復嵩明州城拏獲逆首杜汶秀之女蔡杜氏及該逆本宗堂姪楊鳳翔又攻克黑鹽井時拏獲僞大司隸劉綱之子劉映山分別看管禁錮飭令招降逆首贖罪又因澂江回匪踞城復叛當將羈縻在省之澂江匪目馬良驥張開祥馬光耀等拏獲飭司審辦均先後

奏明在案因馬良驥等供詞狡展當將游擊蘇開元撥

兵看管候質乃該員並不嚴加防範致馬良驥一犯於八月初一日夜間乘間逃逸現據土堆逃出難民報稱該逆已在土堆賊營與官兵打仗帶傷諒難漏網惟蘇開元於發交看管要犯竟致疎脫實屬咎有應得相應請

旨將補用游擊蘇開元卽行革職仍畱軍營差遣以觀後效又蔡杜氏一犯其夫蔡廷棟業已招降現在新興隨同官軍打仗出力可否仰懇

天恩免其死罪仍交提臣馬如龍嚴加約束伏祈

訓示遵行至楊鳳翔劉映山二犯辦理招降毫無成效張

開祥係澁江著名賊目馬光耀亦從逆多年均屬法
無可貸經臬司程誠訊明具詳前來當於同治八年
九月二十五日恭請

王命將逆犯楊鳳翔劉映山張開祥馬光耀等四名正法
臬示以昭炯戒理合附片陳明伏乞

聖鑒謹

奏

軍機大臣奉

旨著照所請該部知道欽此

會奏昭通回務就緒川援即可撤回摺子

同治八年十一月

奏爲昭通回務現已漸有就緒援軍於此事竣後即可遣撤回川恭摺仰祈

聖鑒事竊查上年十二月閒尋甸賊勢披猖省城後路喫緊臣岑毓英奏奉

諭旨著崇實吳棠迅派得力將弁酌帶兵勇由東川曲靖分路援應等因欽此並咨明川省俟滇省解圍卽將援軍遣撤決不久爲川累崇實吳棠念切救鄰立派提督唐友耕統軍六千馳來援應臣劉嶽昭派軍正攻尋甸咨請由東川取道會剿尋匪以願省城後路嗣

經果後各營將尋旬州城克復臣又咨請開拔赴省以固根本無如援軍甫經入境奸匪造先滅昭回之謠回民疑懼交深聚眾搶劫遂致大路梗阻漢民愈滋口實疊次要求地方文武必欲援軍剿回以洩其平日之憤臣與臣岑毓英及提臣出示開導並委員前往解散其時漢回固結甚堅援軍不能前進閱時已半年之久臣劉嶽昭再四思維飭令總兵全祖凱帶兵馳往先將營盤分守要隘保護漢民村寨一面嚴拏爲首滋事之人並解散脅從之眾以免糜爛完善之區又恐兵力不濟加委副將楊盛宗知府扎昭

紛添募練勇相機會辦無如禍亂已成回眾銜而走
險漢民牢不可破全祖凱及委員等甫至昭通漢民
卽擁眾至全祖凱行營闕鬧藐抗不遵而唐友耕復
言後路空虛該文武等不得不畱援軍剿辦但援軍
重在省圍豈能中道而止昭魯旣生回響亦須俯順
輿情臣劉嶽昭又咨請唐友耕察看情形酌畱數營
在昭餘仍開拔赴省以期兩益前於八月十七日在
曲靖行營具

奏在案到省後接據楊盛宗孔昭紛等稟稱唐軍在昭
恐與職等意見不合漢民有所藉口必至仍蹈前轍

無益地方等語當卽批飭迅速前往已據稟報帶領兵勇一千二百名赴昭會辦又本年十月十六日承准軍機大臣字寄同治八年九月十七日奉

上諭唐友耕一軍前據崇實等奏稱該處文武稟畱當諭令劉嶽昭從長辦理茲據奏稱唐友耕籍隸昭通所部實係滇練肆口復仇致魯甸威甯各處回民疊出剽掠該軍與之接仗數次互有損傷現在東昭大路復多梗塞等語此間回民聞謠自固與公然叛逆者不同唐友耕既經崇實等派令援滇何得以先辦昭回爲名使漢回從中生釁卽著崇實吳棠嚴飭該提督趕緊拔隊前

進不准藉詞逗遛劉嶽昭亦當迅飭孔昭鈐等相機妥
辦如唐友耕仍執成見玩視省城並著劉嶽昭等據實
參奏等因欽此伏查前准崇實吳棠來咨以川滇相距
數千里礙難遙度軍情援軍進止機宜悉決之於臣
等現又接准移咨錄送奏稟所有唐友耕近日接仗
情形業經入

告並請

旨飭下臣等就近妥商從長辦理今唐友耕統兵在昭將
及十月經臣劉嶽昭具

奏之後力圖振作剿撫兼施頗稱得手又據全祖凱稟

稱昭屬之黑石坳魚脊水營五里坳等處匪首李文
撤得明薛瑞麟李文鳳等率眾抗拒本年十月初一
初二初三等日出隊接仗均有斬擒初七日該鎮督
飭滇軍攻剿賊巢生擒賊首馬有福馬六十一等正
法並斃匪數十名千總李洪陣亡初八日收復長寨
脅從之夷目安士奉等均各投誠隨卽安撫附近村
寨十餘處頃據東川營參將劉萬勝稟報川軍圍攻
賊壘回眾窮蹙業已獻首乞降以昭魯回務論之本
因懷疑生變現在既有就緒自應由唐友耕辦理完
結以免兩岐臣岑毓英原案俟省圍解後卽將援軍

遣撤現在雲南省圍已解本省兵練足敷調遣援軍
將此事告賊即可遣撤回川俾符原案而紓餉力其
未盡事宜仍由臣等督飭各該文武隨時相機辦理
用期周密除咨明四川將軍督臣及唐友耕外所有
昭通回務漸已就緒援軍於此事竣後即可遣撤回
川緣由謹合詞繕摺由驛具陳伏乞

皇太后

皇上聖鑒訓示謹

奏

軍機大臣奉

旨另有旨欽此

會奏督攻附省土堆卽可肅清片子

再查附省土堆悍匪經臣等隨時出城親督各營員
弁晝夜圍攻先後斬擒餘賊過半該匪仍敢負壘死
拒將土堆村內分築十餘壘村外環築碉樓四面俱
有水濠三道寬深數丈又踞紅廟相爲犄角勢甚披
猖十一月初五日臣等親赴先鋒營督飭李家福鍾
福俊吳永安蔡錦青蕭德揆廖士彥岑毓寶邵天貴
吳奇忠譚美李朝相李國棟等挑選奮勇許以重賞
翻草填濠進攻期於必克兵勇人人用命攻至初六
日丑刻賊勢不支官軍越濠而進當將紅廟賊壘及

土堆村外賊礮十四座全行攻克臣等卽在營盤駐紮連日均未撤隊初七八等日用開花田雞洋礮及萬斤大礮轟擊先後斃賊五百餘名賊已窮蹙尙有悍匪一千餘名臣等晝夜督兵力攻日內卽可肅清理合先行附陳伏乞

聖鑒訓示謹

奏

軍機大臣奉

旨另有旨欽此

會奏補參失守州城文職各員摺子

同治八年十一月

奏爲補參失守州城文職各員請

旨卽行革職以肅功令恭摺仰祈

聖鑒事竊查上年正月內迤西逆匪大股下竄圍逼省垣
先後襲踞昆陽新興晉甯呈貢嵩明尋甸等州縣城
池該州縣文武各官均不知下落業經前護督臣宋
廷春由驛具

奏並另案陳明嵩明尋甸兩州失守城池之文武各員
容俟確查實在下落另行覈辦等情奏奉

諭旨此案彼時因該逆竄撲省垣各路均被阻塞未得確

切探報現已逐一查明嵩明州地方因回弁馬盈洲
申通從逆之馬汶成楊先芝馬添順等於七年二月
二十二日將該州城池暗行襲踞其署嵩明州知州
事試用同知定森先期奉委在楊林捐辦糧米交收
後旋署不料馬盈洲早令內奸引導賊匪入城直入
衙署卽將該署收捆禁屢欲加害經紳糧等力爲解
救仍復幽閉密室派人看守以致求死不得迨至本
年賊勢窮蹙防範稍疎始於三月十九日乘間逃出
又尋甸州知州伊勒通阿於六年十一月二十八日
到任七年正月西逆竄擾附近州縣該牧親赴各鄉

齊圍紫營堵禦要隘正在料理間接據密報城內回
眾與西逆勾通剋日舉事該牧馳回州城傳集紳民
加意撫輯欲安反側詎意城外之賊已與城內連合
同時並圍衙署居民槩被搶擄旋將該牧捆禁密室
派人看守求死不能追至本年三月該逆被剿窮蹙
防範稍鬆乘間逃出惟查嵩明尋甸兩城失守均係
逆匪勾通奸細自內生變猝不及防與外匪攻陷者
有閒該牧等雖無棄城逃避及甘心忍辱情事究屬
職司守土均有應得之咎茲據藩臬兩司查明詳請
奏參前來臣等覆查無異相應據實參

奏請

旨將署嵩明州事試用同知定森尋甸州知州伊勒通阿
一併革職畱營効力贖罪儻再不知愧奮另行從嚴
參辦所有補參失守州城文員職名各緣由謹合詞
恭摺附驛具

奏伏乞

皇太后

皇上聖鑒訓示謹

奏

軍機大臣奉

旨著照所請吏部知道欽此

會奏川滇官軍剿撫昭通並水營等處現已一律肅

清摺子 同治八年十二月

奏爲川滇官軍辦理昭通回務剿撫兼施攻克水營魚脊黑石坳等處賊巢現已一律肅清恭摺仰祈

聖鑒事竊臣等於本年十一月十一日將昭通回務漸有就緒緣由合詞馳

奏在案拜摺後疊准提督唐友耕咨報打仗獲勝擒斬首犯李本終等並接四川將軍督臣來咨抄送奏彙所有詳細情形業經由川具奏計已仰蒙

聖鑒未敢再事瀆陳查昭魯漢回起釁之初臣劉嶽昭卽

派總兵全祖凱帶隊前往相機辦理旋又添委知府孔昭鈞副將楊盛宗馳往會籌剿撫以期迅速賊事十月十七日全祖凱督同總兵陳遐齡參將馬麟飛進攻水營賊壘並派游擊王正昌涂開科楊再清等堵截黑石埧魚脊兩路援匪官軍與賊接仗自辰至午攻克新營五里坳兩巢斃匪一百餘人十八十九二十二二十二等日逼攻魚脊該匪勢窮計竭愈覺驚惶於二十三日回目馬世有撤得明劉忠開率眾赴全祖凱行營乞降並呈繳軍械數百件其時水營黑石埧負固依然突出悍匪數百於二十七日攻撲我

軍礮樓參將馬麟飛帶隊擊退游擊熊財興中礮陣
亡十月二十八至十一月初九等日全祖凱分派各
軍進取水營黑石坳兩巢四面合圍將水營攻破生
擒僞元帥劉忠貴匪首薛正紀薛正萬羅解匠等十
餘名正法斃匪八十餘名救出難民數百分別安置
其黑石坳老巢本極兇獷地勢亦堅該匪出仗被官
軍擒斬最多一聞水營已破賊膽愈寒自願捆獻爲
首滋事之人呈繳軍械全祖凱恐其詐降當將隊伍
層次環列分派委員鄒煒梁焯等親入巢內逐一查
點其中回民僅六百餘人老弱過半且多被脅入夥

均願繳械投誠全祖凱勒兵於外飭獻首匪十四十五等日捆出僞元帥楊慶芝木存柱馬萬俊馬萬鵬馬萬升僞統領劉忠禪馬德馬定柱李文籠李文萃李文貴胡萬春曾玉柱並捕獲稔惡之余練頭趙么余美美趙黑巴陳狗兒安福壽辛五臧長春楊小喜楊昭等共五十三名解至昭通府城由護知府李應華等訊明正法地方一律肅清至於善後事宜孔昭鈞與該文武從長籌議全祖凱並請移駐汛防以資分守各等情先後具報前來臣等查此次昭魯回亂李本終實係罪魁先因未解省圍難分兵力幸賴四

川將軍崇實督臣吳棠派令提督唐友耕援滇先固藩籬拔除禍本故能迅速蕙事惟現在漢民失業困苦最多而賈回散漫無歸仍屬可慮先剿者就一時而言求治者必多方以計臣等已嚴飭地方印委各員訪查奸匪庶免遇事生風其漢回產業轆轤太多只須就緒理絲未可操之過急轉滋變亂以期仰副朝廷綏靖邊陲之至意至此次剿撫防守該文武員弁均有辛勞合無仰懇

天恩俯准將異常出力之署昭通鎮印務提督銜騰越鎮總兵確勇剛勇驍勇巴圖魯全祖凱

賞換清字巴圖魯名號總兵陳遐齡遇有總兵缺出請

旨簡放儘先參將全玉品以副將畱溟儘先補用儘先參

將陳貽舉

賞加副將銜參將銜儘先游擊馬麟飛以參將畱溟儘先

補用並

賞加副將銜儘先游擊鄧經忠以參將儘先補用藍翎把

總林志良免升千總以守備儘先補用並

賞換花翎護昭通府事補用同知直隸州石屏州知州李

應華開缺免補同知直隸州以知府用同知銜候選

知縣彭緒瑄

賞給正五品封典指發廣西試用州同全慶以同知仍畱
廣西儘先補用候選從九品鄒煒梁焯均免選本班
以州判畱滇儘先補用並

賞戴藍翎之處出自格外

鴻慈其餘查明彙案請獎至打仗陣亡之補用游擊熊財
興昭通鎮左營左哨千總李洪把總馬君榮投効四
川武舉楊逢春東川營左軍額外錢忠祿候選從九
品彭緒瓚擬保把總軍功楊福昌羅鴻儒等八員名
相應請

旨飭部從優議卹以慰忠魂所有川滇官軍辦理昭通回

務攻克水營魚脊黑石坳等處賊巢現已一律肅清
緣由謹合詞繕摺馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

附奏擬撤楚軍以節川餉片子

再臣所部果後營楚勇本係六千餘名隨臣轉戰湖南湖北廣西江西四川陝西貴州等省十有餘年均能出力上年臣入滇之時准前署四川督臣崇實咨會以二千五百名歸臣統帶入滇助剿以二千八百名撥交四川候補道劉嶽曙統帶防黔均經先後奏明在案楚軍入滇後克復尋甸塘子救援貴州普安並會合滇軍力解省圍防堵各隘亦皆勤苦惟臣察看近日情形雲南民兵較多足資防剿本省協餉原係仰給四川而楚軍口糧亦復由川撥解雖接濟隨

時而持籌非易且以道途較遠轉運爲難每有緩不濟急之勢況滇軍就地調派口糧甚輕若以楚軍較之未免懸殊以川餉論之又須分解似應撤去楚軍並歸協餉臣與撫臣自當懍遵

聖訓遇事和衷庶無彼此之分章程又歸畫一但現在附省甫就肅清東路又不容稍懈所有楚軍二千五百人仍令分駐省城曲靖尋甸馬龍等處並會剿潞江新興踞逆一俟兩城克復之後則東路可以無虞滇軍亦數分布臣卽將楚軍分別撤去俾節川餉除咨會四川將軍督臣外理合先行陳明謹

奏

軍機大臣奉

旨知道了欽此

532



11

滇黔奏議卷七

湘鄉劉嶽昭蓋臣著

男鎮楚錫恩謹編

會奏官軍攻克麗江等府廳州城及馬街紅巖巨巢
並請催解協餉摺子 同治九年二月

奏爲官軍攻克麗江緬甯彌渡賓川劍川等府廳州城
池及馬街紅巖各賊巢軍務日有起色請

旨飭催各省協餉以期乘勝掃蕩恭摺仰祈

聖鑒事竊臣等於上年八月間克復楚雄南安大姚定遠

等府州縣城池後卽飭楊玉科乘勝進攻姚州張士
進規取鎮南錢大川馮長壽等進攻雲南縣陳定邦

高發安根等攻取賓川州王鍾祥劉興等進取彌渡
尉遲品玉尉遲東曉李安邦等分攻鎮南景東接壤
之馬街一帶賊巢是爲中路正軍又飭署永北同知
劉昌笏代理永北營參將王遇春進攻永北廳城署
維西協中軍都司張潤守備李文元署麗江縣知縣
胡邦傑等由維西出攻麗江府城以爲北路偏軍又
檄署迤南道張同壽督飭署普洱府知府許繼衡代
理威遠營參將李雲等由普洱進攻威遠復派同知
張家銘前往會同規復緬甯以爲南路偏軍併力會
剿逆巢嗣於祿豐縣城克復後又飭李維述移兵督

攻鎮南黃文學移兵督攻永北疊據稟報姚州鎮南
雲南縣各處官軍均連獲勝仗將城外賊壘次第掃
平圍逼城下並分兵攻克鎮南州屬之沙橋普湖鷓
鴉關雲南縣屬之菽禾米甸雲南驛等處要隘將賊
匪後路截斷王鍾祥等進攻彌渡於九月二十三日
分兵三股以所部吳懷連等攻取上川大理衛賊巢
高其位毛迎祥等進攻下川阿克邑賊巢王鍾祥劉
興親帶李壽椿余彭壽等大隊進攻中川彌渡廳城
及王彥厥賊巢該匪出巢數里分股拒敵自辰至午
勝負未分王鍾祥偵知賊巢空虛密囑劉興陣前抵

住賊匪該員自帶精銳兵勇數百名掩旗息鼓由山左繞出賊後襲取廳城該匪猝不及防官軍一擁而進立將廳城克復劉興乘勢夾擊賊匪大敗跟踪追至王彥厥斬級甚多餘匪退入營內抗拒官軍逼柵環攻至十月初八日破壘而入生擒僞大參軍馬遇春等多名殲斃賊匪無算時吳懷連進攻上川已將大理衛土城攻克惟下川阿克邑賊巢地極險固高其位等帶兵進攻尙未得手王鍾祥將上中兩川布置周妥卽商之劉興李壽椿等分兵進攻趙州所屬之紅巖賊巢以斷大理賊援王鍾祥親赴阿克邑督

戰十四日有蒙化賊首馬萬春沙慶春等率黨三千
來授王鍾祥督兵戰於大寺頂賊鋒甚銳官軍奮擊
大破之追至黃草壩斬首一百餘級奪獲器械無算
阿克邑賊匪見援賊敗退一夜數驚官軍乘勢急攻
當於十五日攻入賊巢擒斬僞大將軍朱燦及賊黨
多名餘匪伏巷死拒官軍縱火焚燒斃賊五百餘名
無一漏網彌渡上中下三川一律肅清而劉興進攻
紅巖亦連克下村班竹村及紅巖附近先鋒賊營七
座僅餘紅巖孤壘於二十七日克之擒斬僞中郎將
杜義等二百餘名墜巖撲河死者不計其數該處距

大理府城僅九十里最爲險要當卽派兵扼守一面
會合王鍾祥進攻蒙化廳城時尉遲品玉李安邦等
進攻馬街賊巢先於十月二十三日攻克背籠村先
鋒賊營四座卽移營逼攻馬街土城二十四日有瓦
祿大捲洞南澗五頂山各處賊匪大股來援聯營
聚山頂尉遲東曉乘其初至夜出奇兵襲之踏毀賊
營十數座援賊悉潰二十五六等日乘勝力攻遂將
馬街土城攻克二十七至十一月初八等日又連破
五頂山牛叢柳德村上下羅保七村河摩呵苴龍潭
口瓦尾祿庫麟街等處賊壘數十座先後斬擒無算

南澗一帶漢夷懾於軍威紛紛反正該股官兵遂與王鍾祥攻剿蒙化之師首尾相聯查蒙化廳城僅距大理府一百二十里踞賊最多又有大小圍梗兩賊巢與廳城相爲犄角尤爲堅固王鍾祥商派劉興攻剿圍梗賊匪而親督吳懷連等圍攻廳城正在得手忽於十一月初十日王鍾祥因追賊深入被礮陣亡臣等聞報一面飛飭劉興等權爲統率照常攻剿一面添派游擊劉重慶千總董正性等分起帶兵赴援幸無疎虞而陳定邦高發安根軍功奎譜馬中馭等進攻賓川州先由大古者平川古底新城牛井一帶

節節掃蕩連破賊壘數十座十一月初三初四等日
又將附城之大羅城馬光營周光營白沙模等處賊
壘攻克卽晝夜環攻州城賊勢不支於初七日開城
出降陳定邦等整隊入城分別解散安撫當將州城
收復查有距城三十里之賓居街老巢尙有踞匪已
飭移營攻剿務期全境肅清此中路官軍克復彌渡
賓川廳州兩城及紅巖馬街各處賊巢之情形也其
北路劉昌笏王遇春等進攻永北連破周武營清驛
金江宋官馬軍石灣順州抵禦各要隘賊壘掃蕩前
進該逆見官軍深入負壘死拒復分悍賊數千人攜

帶雲梯乾糧繞襲舊衙坪官軍後路糧臺幸守備崔
正明豫有防備力戰四晝夜匪等糧盡潰退官軍乘
勢追殺擒斬四百餘級後路得以保全現在黃文學
已抵該處合兵環攻永北廳城可期得手張潤等進
取麗江該處被脅人民望風歸順隨同官軍助剿於
十一月二十三日當將麗江府城克復卽乘勝進攻
劍川州城於十二月初九日克之南路張家銘等圍
攻緬甯之師正在得手適有龍陵軍功林光耀帶勇
二千餘人前來助剿於十二月十五日架梯攻入廳
城該逆在城死拒林光耀奮勇當先縱火沿燒賊踞

房屋眾軍勇氣百倍殲賊無算其餘被脅賊黨俱跪地乞降張家銘分別解散安撫當將緬甯廳城克復而劉光瑛李鳳祥等正圍攻永昌騰越府廳兩城現在緬甯克復永昌騰越道路已通疊有稟報到省許繼衡李雲等圍攻威遠廳城已將附近賊壘先後掃蕩現在薄城環攻旦夕亦可得手各等情稟報前來

臣等伏查迤西賊匪前歲竄撲省垣所有兇悍賊黨業經殲除大半故此官軍進剿得以連克多城惟東南尙未肅清全師未能西上猶有兵分力弱之勢而各省協滇月餉報解無幾兵勇每多枵腹

臣等願

後瞻前萬分焦灼况新復之賓川彌渡兩城逼近大理尙有鎮南姚州雲南縣三城在後未下懸軍深入更屬可慮除添派知府鍾念祖游擊林守懷帶兵馳赴麗江會同該處文武防守已得之地一面進攻鶴慶州城並檄同知尉遲品玉移兵規取順甯飭副將李棠秀前往趙州招集難民相機進剿飭署同知周廷獻周平瑞署游擊楊林各帶兵勇駐紮景東鎮沅等處分投策應外合無仰懇

天恩飭下湖北湖南四川江西浙江各督撫臣速將月協滇餉按月如數報解不准遲延推諉俾免貽誤事機

至此次克復各處城池出力文武員弁容臣等查明

彙案奏懇

恩施其打仗陣亡之副將銜補用游擊牟永昌副將銜補用都司王鍾祥守備銜千總王克鞏記保縣丞奎譜記名拔補把總韓洪春何榮富等均係前敵捐軀深堪憫惻相應請

旨飭部分別從優議卹以慰忠魂所有官軍攻克麗江緬甯彌渡賓川劍川等府廳州城池及馬街紅巖各賊巢軍務日有起色請

旨飭催各省協餉以期乘勝掃蕩各緣由謹合詞繕摺馳

陳伏乞

皇太后

皇上聖鑒訓示謹

奏

軍機大臣奉

旨另有旨欽此

會奏會商激江新興軍務及察勘地勢情形片子
再滇省軍務從前辦理未能得手多誤於忽近圖遠
致官兵後路屢被賊乘前署提督褚克昌所以全軍
覆沒也現在迤西軍務雖日有起色而東南激江新
興兩城圍久不下館驛竹園婁兮等處賊巢尙未肅
清實爲省城肘腋之患查總兵馬忠副將潘文元等
圍攻激江副將田仲興都司王正坤等圍攻新興非
不竭力剿辦奈係賊匪老巢其中資財軍火積蓄甚
多匪等戀其家室皆以死力抗拒是以遯難得手臣
等再四熟商必將東南賊匪先行撲滅再以全力進

剿大理庶無內顧之憂擬商臣毓英督辦激江提臣

馬如龍督辦新興臣嶽昭暫駐省城督同司道籌商

巡防事務方議定間適據田仲興王正坤等飛稟竹

園逆首馬敏功等勾結館驛之匪救援新興並分股

竄赴東溝截斷官軍糧路連失數營勢甚喫緊又據

馬忠潘文元等稟報激江賊匪於二月初五六七等

日大股出撲九村大啞口中關一帶官兵營盤晝夜

不退各營中有新收降卒暗通賊匪以致失守多營

紛紛請援前來臣等聞報一面飛飭各營嚴加防剿

臣毓英卽於初八日帶領護衛各營馳赴中關一帶

援剿分派副將何秀林等由陽宗一面接應大啞口
九村各營並由臣嶽昭派撥游擊金仕耀都司馬占
魁等隨同策應該匪膽敢攜帶雲梯草捆乘勢圍攻
龍王廟伊舊村各官兵先鋒營盤經總兵曹星柏游
擊楊福章都司王永安等督兵力戰援兵三面夾擊
疊獲大勝斬首二百餘級當將中關大啞口九村各
處營盤次第恢復十五日提臣馬如龍統帶兵勇馳
赴新興督辦並分兵攻剿館驛等處又飭前署昭通
鎮楊盛宗隨同協剿十六日臣嶽昭親赴中關與臣
毓英察看地勢會籌進攻之策勘得澂江府城東西

北三面皆山南面臨海逆匪占踞多年將周圍數十里內樹木砍伐淨盡使官兵無從樵採又於西山西街子上下左所圍樹營鎮海營右所波羅村紅山等處添築土城九座每土城外又有子營碉樓數十座阻塞要隘使官兵不能逼城環攻現由中關進兵一路適抵賊之西山西街子土城大啞口進兵一路適抵紅山土城九村進兵一路適抵波羅村土城伊舊村進兵一路適抵右所圍樹營兩土城龍王廟進兵一路適抵上下左所鎮海營三土城必將此數處先行掃蕩然後直抵城下是攻澂江府城不啻圍攻十

城而糧米柴草件件爲難_臣等惟有督飭士卒竭力
攻剿以期迅克堅城不留餘孽其_臣毓英署內應辦
一切公事激江距省不遠仍可往來兼顧不致廢弛
_臣嶽昭侯拜摺後自當回省鎮壓至竹園賊巢已嚴
飭總兵張保和楊國發等加力圍攻務期早靖東南
卽統全師進攻迤西以仰副

聖主軫念邊陲之至意所有_臣等會商激江新興軍務及
察勘地勢情形謹合詞附片具陳伏乞

聖鑒訓示謹

奏

軍機大臣奉

旨另有旨欽此

會奏官軍收復新興州擒斬首逆並剿辦東溝館驛妥

籌善後摺子

同治九年八月

奏爲官軍收復新興州城擒斬首逆田慶餘等並現在
剿辦東溝館驛妥籌善後各情形恭摺由驛馳陳仰
祈

聖鑒事竊查新興州城僅距省一百四十餘里同治七年
春聞西逆大股下窺圍逼省城該州紳士已革衛守
備田慶餘暗地勾通開城迎賊遂於是年二月十五
日將州城失陷城內居民盡被脅從並勾結圍省之
賊縱橫響應與東溝相爲犄角勢甚披猖經前護督

臣宋延春奏明並調署騰越鎮總兵副將田仲興都

司王正坤等剿辦年餘未經撲滅本年二月臣嶽昭

與臣毓英再四熟商省城雖已肅清而澂江新興近

在肘腋若不急圖掃蕩終難進規迤西是以議定臣

毓英督辦澂江提臣馬如龍分剿新興三月初七初

十等日馬如龍由玉枕山進攻田仲興圍剿柳家宗

祠均先後被賊鎗傷田仲興旋因傷重殞命業經附

片具

奏在案嗣疊准提臣馬如龍來咨新興以東溝爲糧路

先經調派副將賽春等挑帶勁旅潛赴小東溝阻截

詎該處首匪馬成麟合幘治復勾結館驛悍賊馬敏
功添築逆壘救護田逆自恃糧路無阻驕悍異常四
月初五十一等日我軍分爲四路都司謝敬彪守備
鄭其麟等由後裕鄉進茆曲陀關關箐河一帶截剿
州城東溝往來賊匪都司馬永順守備蔡廷棟等由
州城西南之拱拱橋金家莊葫蘆園較場一帶逼城
連營副將楊盛宗游擊張御鶴都司陳貴同知田嘉
齡等由玉枕山酸水塘一帶連營抄擊同知周平瑞
通判周廷獻等卽紫山後會合攻剿連日四面接仗
斃賊無數十六日我軍圍攻玉枕山下賊壘守備馬

錫晉身先士卒立拔賊碉殲斃悍匪多名忽被秀賊
礮傷右腿登時陣亡並同時陣亡弁兵十餘名帶傷
兵勇數十名自十八至二十三等日我軍四面攻剿
奮力鏖戰晝夜不休並用開花洋礮轟擊斃賊無算
內殲除黑衣賊目數名先後將玉枕山石灰窯及附
城逆壘五處攻破所有該逆運到糧米均被截獲自
此該匪糧路斷絕賊勢漸窮官兵聲威大振馬如龍
指揮各軍趨紮礮營共一百五十餘座當將州城四
面緊圍逆首田慶餘連日率黨拚命出敵皆被我軍
擊退迨至二十九日城內被脅漢回紳民合景春等

受困情急暗地具呈赴營請降自願設法捆獻逆首
田慶餘及甘心附逆各黨羽其餘被脅之眾懇請從
寬免死賞准歸誠當經允准而田逆自衛嚴密無隙
可乘五月初二日馬如龍親督大軍進攻該匪護城
緊要營礮施放開花礮轟斃逆眾無數田逆出城救
援當卽密約合景春等阻其歸路併力夾擊遂將首
逆偽大司輔田慶餘卽在陣前生擒正法解獻首級
到省驗明梟示其逸西之偽大司將軍馬高恩偽二
司戎張應祿偽三司靜馬世興及大小頭目李品金
等八人於官軍入城時均經城內被脅百姓縛獻駢

誅並搜獲金銀銅木各質偽印四十六顆繳營毀銷
其餘脅從人等臨陣棄械投誠該提督仰體

朝廷寬大之恩概免誅戮准予就撫卽於是日將城池收

復各等情咨報前來臣等查田慶餘係由武進士以

衛守備補用身受

國恩不思圖報乃竟甘心叛逆勾賊陷城負隅抗拒實屬
罪不容誅今一旦被擒伏法洵足以伸

天討而快人心惟此起彼降眾均係難民大半籍隸建水縣
屬之館驛及河西縣屬之東溝該二處尙爲賊踞必
俟一律肅清方能分遣各歸原籍當經提臣派委副

將楊盛宗署新興州知州江廷珍分別清查戶口仍令該難民等暫居州城復飭派參將馬青雲游擊張御鶴駐兵城內防守並分棊後裕鄉等處以資鎮壓務使漢回相安不致有意外之虞馬如龍原擬布置周妥後隨即乘勝進剿東溝適因新舊傷痕舉發亟須回省就醫調治兼可與_臣等會商一切查有都司王正坤籍隸河西距東溝不過二十餘里當經提_臣

咨商以該都司情形熟悉且歷年剿匪所帶鄉團尙稱得力飭往攻取東溝或可冀收實效馬永順各軍即令駐棊新興進圖館驛提_臣現已暫行旋省一俟

傷疾稍痊籌備糧餉仍卽親督兵練出剿以期早就
肅清_臣等查此次收復新興州城本應及早馳

奏彼時惟冀將東溝館驛一律掃除並將新興降眾難
民安插妥協始敢詳細具陳不意王正坤進兵兩月
以來陰雨連綿山路泥淖兵馬難行兼之該處賊悍
巢堅非厚集兵力難期得手且值青黃不接軍糧屢
乏以致尙未成功現在趕籌糧餉仍視東溝館驛兩
處軍情緩急統由馬如龍隨時斟酌前往剿辦至收
復新興在事出力人員擬俟東溝館驛肅清後再由
_臣等查明彙案奏懇

恩施其節次力戰傷亡之候補游擊馮勝標陣亡都司銜
儘先守備馬錫晉記名把總馬品馬照馬發林薊連
科王蔭郭徐沛周茂等均係前敵奮勇捐軀深堪憫
惻相應據實奏明請

旨飭部分別從優議卹以慰忠魂所有官軍收復新興州
城擒斬首逆並現在剿辦東溝館驛妥籌善後各緣
由謹合詞恭摺由驛馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

附奏提督馬如龍認真辦事奮勇勤勞片子

再提臣馬如龍秉性忠直膽識兼優自連歲辦理軍

務以來奮勇當先不辭艱險疊次親臨行陣與賊對
壘身被鎗傷猶復力疾衝鋒從無避就該提督自以
受

恩深重亟欲勉圖報稱迅掃逆氛凡軍中每遇餉糈匱乏
亦必隨時設法接濟卽如此次進剿新興湖南撥餉
未到所有賞需糧米時形欠缺皆賴其多方籌辦約
計現已墊用銀三萬兩洵能敵愾同仇顧持大局得
以迅速蕲功至該提督平日認真辦事久在

聖明洞鑒之中臣等近與和衷共濟深資臂助未便沒其

勤勞理合附片陳明仰紓

宸廑伏乞

聖鑒謹

奏

軍機大臣奉

旨另有旨欽此

會奏官軍攻克澂江府西山村等處賊巢摺子

同治

九年八月

奏爲官軍攻克澂江西山村西街子上下左所等處賊

巢恭摺仰祈

聖鑒事竊查澂江賊匪占踞府城並於城外西山村西街子上下左所龍王廟團樹營鎮海營右所波羅村各處分築土城與府城相爲犄角每土城外又環立碉樓數十座恃險抗拒臣毓英親督官兵進剿曾將查看地勢及打仗獲勝攻克龍潭蘿蔔村校場石山菜園棕樹村等處賊壘情形先後

奏報在案隨卽督兵晝夜趨營進攻匪等初立土碉多被官兵攻破該逆繼又改立石碉厚六七尺四面並不開門由碉內鑿地成隧離碉箭許之遠始開一穴出入官軍攻至其下無門可進鎗礮不能破其堅斧鋤無所施其力該逆自暗擊明官軍每多損傷臣思以人攻碉固屬非計而以石碉圍石碉成功亦遲且官軍紮成一碉賊亦可添一碉相接均非善策再四籌思擬造木碉式樣派知縣文靜督工趕造數十架每架十層挑選得力兵勇操演熟習夜閒運逼賊碉片刻合成數壘四面圍困復挖深濠斷賊地道碉內

之賊既不得出外援之賊更不能入逆等計無可施
自六月初三日至七月十八日先後攻克龍王廟妥
白村雙樹村等處賊壘並石礮數十座直逼下左所
賊巢柵門晝夜施放開花洋礮轟擊賊巢斃賊甚多
適道員岑毓寶帶勇到營助剿由紅山一路進攻府
城牽制賊勢七月二十七二十九兩日連獲大勝追
賊直抵城下斬首多級賊勢愈蹙二十九夜總兵馬
忠副將任仕斌都司馬柱乘下左所賊無援應督兵
力攻並購獲被脅回民馬勤放火內應當將下左所
賊巢攻克是夜乘勝進剿未經收隊攻至三十日早

連破賊碉三十餘座上左所賊巢逆猶死拒而城內

及西山村西街子各處賊匪分股來援臣飭辦理營

務迤東道蔡錦青督同參將劉自馨都司楊思潤陸

純剛謝敬彪守備黃才廣張世榮陳采瑁黃興宗等

擊其援賊更番血戰將援賊擊退臣親督副將任仕

斌道員岑毓寶都司岑有富趙廷雲嚴勝美岑應麟

盧得志守備楊好謀縣丞黃翰章千總舒世泰等四

面齊撲賊柵逆等鎗礮如雨官軍束草填濠砍柵而

入力將上左所賊巢攻克逆賊悉就殲擒無一漏網

八月初一初二等日臣仍親督各營乘勝進攻署總

兵何秀林參將熊遇周游擊楊福章何秀楨楊有都
司楊桐李朝有總兵曹星柏游擊王永安梅洪順副
將潘文元參將邵天貴錢汝達柳明泰游擊姜飛龍
都司楊聯桂夏天德余發知州張壽昌等分投並進
賊匪望風披靡遂連破西山村西街子圍樹營掃茅
洞果子園九條溝張家村鎮海營新河口卑娑羅右
所學山毛圍波羅村等處賊巢及附城四面賊營一
百五十餘座先後斬擒悍賊一千數百名救出被脅
百姓男婦千餘人交代理澂江府黃紫詔妥爲安置
城外賊巢一律蕩平

臣

等伏查西山村西街子上下

左所團樹營掃茅洞鎮海營右所毛園波羅村等處
皆賊老巢而西山村西街子二處尤爲險要其中屋
宇千有餘閒糧米軍裝存積不少徵江新舊逆首徐
元吉張元林楊發元等俱出該村附近之江川呈貢
晉甯等州縣百姓屢受其害十有餘年一聞該處攻
克均赴營懇請拆毀以絕後患等情臣擬卽照所請
將西山村西街子二處牆濠屋宇一律毀平以順輿
情現在僅餘孤城官軍四面合圍晝夜趨營逼攻不
難克復此次出力文武員弁容俟徵江軍務一律肅
清再由臣等查明擇尤請獎外其各處打仗陣亡之

游擊銜補用都司袁亮都司銜補用守備尉遲毓芹
張萬和千總蕭常把總李壽椿蕭聲華外委楊有貴
額外外委段有志立功後在營瘴故之運同銜候選
同知李維鏞副將銜補用游擊馮長壽等均堪憫惻
相應請

旨飭部分別從優議卹以慰忠魂所有官軍攻克西山村
西街子上下左所等處賊巢情形理合繕摺由驛馳
陳伏乞

皇太后

皇上聖鑒訓示謹

奏

軍機大臣奉

旨另有旨欽此

附奏官軍圍攻鎮南並剿邱北開化廣南各屬逆匪
疊勝片子

再總兵李維述圍攻鎮南州城於六月二十五日已
將近城之鸚哥山堡子山賊築土城二座石礮數十
座一律攻克分派官兵駐紮憑高擊下城內西門一
帶屋瓦俱碎該逆復由城中增壘抵拒李維述督率
官軍逼近城濠紮營四面開挖地道又被該逆挖濠
橫截臣等慮其相持日久先後派撥都司林大任等
帶領開花礮隊馳往助剿現在晝夜環攻務期迅拔
堅城總兵張保和楊國發等圍剿竹園賊匪自將下

壩肅清後卽併力攻剿上壩賊巢該逆被剿窮蹙屢次勾結館驛婁兮各處賊匪大股來援均被張保和等分兵擊退該逆復勾結邱北縣屬之紅花山苗匪過江接應張保和先派游擊李崇魁前往堵剿未能擊退隨將竹園軍務交總兵楊國發同知張來慶等督率圍攻張保和親往沿江堵剿連戰皆捷卽追苗匪渡江直抵紅花山賊巢四面環攻於六月初十日將紅花山苗巢攻毀斬首四百餘級仍回竹園督剿時值久雨未晴賊巢四面水田官軍難於進攻張保和等激勵兵勇步步爲營前進自七月二十日至八

月初八日先後攻克竹園上壩之韓師寨趙林寨濫泥寨龍母溝石板橋鐘營新房子禮拜寺雙糖房歪頭寨毛家寨等處賊壘四十餘座擒斬著名賊目金常興及悍賊五百餘名並將竹園街老巢東南兩柵賊礮攻克與賊隔牆相持旦夕即可撲滅又查開化府屬有賊法江那田心茂克等處爲賊巨藪廣南府屬西路有猥多驛地方係賊老巢皆與竹園賊匪狼狽爲奸臣等檄飭署開化鎮總兵麟志署廣南營參將袁得華署知府榮恩華國清李應華都司李朝相黃金琳守備季國清等籌畫糧餉軍火各帶本處兵

勇分投進剿以牽賊勢四月二十六日麟志督同千
總成天培袁致和把總李品等業將賊法賊巢攻克
生擒逆首馬勝朝馬明馬有才馬登馬青春保申王
自凱李在申馬莊馬在輔等正法斬馘一百餘級五
月初九日李朝相季國清黃金琳等亦將猥多驛賊
巢攻克殲賊二百餘名解散脅從夷民數十寨廣南
府屬一律肅清麟志乘勝移兵進剿江那土城賊匪
已圍逼賊巢疊獲勝仗先後稟報前來除飭該員等
激勵兵勇分投加勁攻剿以期迅速掃蕩外理合附
片陳明伏乞

聖鑒訓示謹

奏

軍機大臣奉

旨知道了欽此

沈氏家譜



會奏官軍攻克永北等城擒斬各遊地方一律肅清

摺子

同治九年十月

奏爲官軍攻克永北鶴慶鎮南廳州三城擒斬首要各遊地方一律肅清恭摺仰祈

聖鑒事竊查鎮南州東界楚雄南聯蒙化西北與姚州雲南縣相爲犄角城池堅固賊糧軍火積蓄最多自成豐九年被賊占踞官軍屢次進剿從未得手又永北一廳孤懸金沙江外與四川之會理州鹽源縣毗連地勢險要鶴慶州東界永北南聯鄧川浪穹距大理府城較近均被賊占踞日久逆等增壘設險防守甚

密上年八月閒省圍解後臣等卽飭副將黃文學署同知劉昌笏代理參將王遇春等攻取永北廳城嗣黃文學陣亡復派游擊黃世昌前往接辦並飭總兵李維述督攻鎮南州城知府鍾念祖游擊林守懷等進攻鶴慶州城均經

奏明在案疊據鍾念祖林守懷等稟報鶴慶軍務先經掃蕩城外逆壘直薄城濠開挖地道疊用火藥轟倒城垣數處均被賊匪由內築壘抗拒未能得手本年八月初閒大理逆匪由鄧川浪穹一帶分股竄出援應鶴慶各逆楊玉科在雲南驛聞報卽帶兵勇馳往

截擊而賊已先竄踞北衙姜營相距鶴慶數十里楊
玉科趕至該處出賊不意立將賊壘攻克斬賊一千
餘級另股賊匪竄至白土營附近距鶴慶僅三十里
先經楊玉科檄飭參將段瑞梅游擊蔣宗漢等在彼
紮營扼要堵剿與之相持楊玉科卽馳往鶴慶城外
督率各營員弁盤運柴草填濠而進晝夜力攻自八
月初七日至十九日夜間柴草將城濠填滿並築壘
高與城齊鎗礮環施守陣之賊不能站立官軍四面
架梯登城楊玉科親督各營由西門先登奪據城樓
鍾念祖馬中馭同時越南城而進林守懷姜潤芝由

北門攻入巷戰多時鍾念祖林守懷帶傷而楊玉科血戰愈力逆等抵敵不住由東門衝逃該處前阻大河官軍先已埋伏四面兜殺斬擒殆盡鶴慶州城當於二十日克復惟白土營附近之賊聚眾萬餘勢甚猖獗段瑞梅等均被圍困楊玉科克復州城後將善後事宜交鍾念祖督同代理知州陳宗舜等妥爲辦理楊玉科卽帶兵勇於二十四日親赴白土營救援時該營四面十餘里俱係賊壘無路可入楊玉科查看地勢必將打銅村賊壘攻克糧路方能疎通於二十八夜親督兵勇直撲賊壘該員奮勇當先被賊鎗

傷右臂當時昏暈跌地經兵勇扶救回營因思白土營係緊要之區而段瑞梅等皆得力之員恐因糧盡被陷則鶴慶已得之地必致難守故雖身負重傷仍在營調治晝夜督戰並探得賊糧軍火皆屯積三營地方於初六日夜間分派各營員弁進攻賊壘另以精銳兵勇繞道抄出賊後襲取三營糧臺逆等猝不及防遂被官軍攻入卽時縱火焚燒前面賊匪見後路糧臺已失紛紛驚潰官軍乘勢追殺卽將賊壘一百餘座一律掃平斬擒悍賊千餘名奪獲器械無算餘匪竄歸浪穹鄧川白土營之圍立解此官軍攻克

鶴慶州城及總兵楊玉科赴援白土營帶傷解圍之大概情形也又據李維述稟報由鎮南州高峰哨桂花井一帶趨營進攻連破近城之金汁河大楸樹豬頭山等處賊壘多座並攻克沙橋普溯等處土城截斷賊匪後路惟近城之西南角有鶯哥山地勢極高該逆先經築有土城並環立石礮七座以悍賊併力守之李維述審度形勢必先奪取此山憑高擊下州城方易得手卽分兵一半圍攻州城以一半專攻鶯哥山土城石礮_臣等先後分派都司陸得成林大任等帶開花洋礮前往助剿於本年六月二十五日全

行攻克悍賊殲除殆盡僅餘城內賊匪猶死力抗拒
李維述督率張士進張宗久等逼近城濠紮營四面
開挖地道均被該逆挖濠橫截未獲成功而杜逆派
僞大司旅等率黨數千由蒙化竄入南山前來接應
李維述恐礙垂成之功一面分派副將安紹欽呂鎮
南劉興等前往訥宗莊紮營堵剿一面檄勵兵勇晝
夜加力攻城適有被脅人民馬萬全由賊中逃出深
知城內虛實於八月二十五日亥刻引導官軍由東
南兩面架梯登城當將南門城樓奪據分投巷戰肉
搏相當至二十六日丑刻賊勢不支紛紛越城逃竄

官軍四路截殺斬擒殆盡查點賊屍其計三千餘名
逆首僞大將軍蔡萬舉已斃亂軍之中南山援賊於
青苔坡大矣能等處連焚數十營亦經呂鎮南等奮
力擊退州境肅清此克復鎮南州城之大概情形也
又據黃世昌劉昌笏王遇春等節次稟報永北軍務
先經劉昌笏王遇春等由舊衙坪分道進剿連破周
武營清驛金江宋官營馬軍村石灣順州抵攔各寨
隘賊壘節節掃蕩前進黃文學到後復會同將近墟
賊營次第掃平僅餘廳城及東山賊巢二處逆等屢
守甚堅黃文學因圍攻東山賊巢中礮陣亡復經該

部守備黃泰等奮力圍攻隨將東山賊巢攻破生擒
逆首文會友凌遲處死黃世昌到彼卽督率各營環
攻麻城因有川滇交界之梁山黑夷不時暗送賊糧
以致遽難得手劉昌笏等偵知其故函商四川會理
州知州鄧仁垣將該處邊防兵勇分派一千名就近
會同堵剿以遏賊糧城內賊勢愈窮八月初六日黃
世昌等懸許重賞分派各營官軍四面攻城黃世昌
督率黃泰朱占鼈彭性本子紹周等由南門進王遇
春劉重慶各率所部由東門進劉昌笏劉全忠李洪
發章齡高等由北門進姜廷相潘福蔭附階蘭常順

等由西門進逆等嬰城死拒鎗礮如雨官軍換班輪
攻至初八日丑刻賊氣漸餒鎗礮稍稀官軍一鼓作
氣蟻附而上各營員弁奮力巷戰千總劉全忠殲斃
逆首劉應貴賊勢瓦解官軍層層圍殺共殲悍賊三
千餘名救出難民千餘戶當將廳城克復全境肅清
此克復永北廳城之大概情形也先後據該員等稟
報前來臣等伏查永北鶴慶鎮南三城皆係逆匪老
巢賊悍城堅攻取不易此次分派各員帶兵進剿俱
圍攻年餘之久始克蕝事又值糧餉兩缺各營將士
嘗膽臥薪血戰於蠻煙瘴雨之中歷久不懈實屬異

常勤勞現在楚雄府七屬三井麗江府五屬暨永北
直隸廳地方均已一律肅清臣等檄飭李維述楊玉
科黃世昌等各將所部兵勇分半駐守已得之地藉
資休息分半乘勝輪流進攻以期迅速掃蕩此次克
復城池出力文武員弁容臣等續行查明再行奏懇
恩施其騰越鎮總兵李維述前曾固守省垣力支危局連
年血戰克復楚雄廣通南安鎮南各城擒斬首要多
逆實屬有膽有識卓越尋常提督銜記名總兵楊玉
科節年轉戰武定祿勸羅次嵩明元謀定遠大姚寶
川姚州鶴慶等處連克多城帶傷數次實屬謀勇兼

優勤勞久著該二員職分較大應如何獎勵之處出自

天恩至陣亡之守備銜補用千總楊本春保升千總補用
外委文占元署永昌協左營右哨二司把總伍榮光
在營瘴故之試用通判龍振均堪憫惻相應請

旨飭部分別從優議卹以慰忠魂所有官軍攻克永北總
慶鎮南廳州三城擒斬首要各逆地方一律肅清謹
將大概情形合詞繕摺馳陳伏乞

皇太后

皇上聖鑒訓示謹

奏

會奏攻克鄧浪兩城及鳳羽等處賊巢擒斬各逆北

路肅清摺子

同治九年十一月

奏爲官軍攻克鄧川浪穹州縣兩城及鳳羽白米莊橋
後井鍊鐵長邑村等處賊巢擒斬首要各逆北路一
律肅清恭摺仰祈

聖鑒事竊查鄧川浪穹州縣地方均在大理府之北附近
上關久被賊匪占踞本年八月閒官軍克復鶴慶州
城並解白土營圍後臣等檄飭總兵楊玉科將克復
之地分兵駐守仍卽乘勝進攻業經

奏報在案嗣據楊玉科疊次稟報該員前在白土營剿

賊受傷調治稍愈當於九月初七日督率各營官兵由臨東臨北兩路並發先取浪穹縣城至離城六七里之甸頭地方駐紮查看縣城西南兩面近山東臨浪海左右有峩堆九臺二村四面皆水僅有長堤一徑可通賊匪築壘踞守與縣城相爲犄角楊玉科審度形勢若徒以力攻取恐大理賊匪就近出撲必致遷延時日卽於初十日夜間分派營官蔣宗漢李維通帶兵二千名抄出縣城之南張潤雷有亮姜潤之帶兵千名抄出縣城之西均令埋伏山坳林密之處楊玉科於十一日黎明親率毛金榮馬中馭王廷詔

等督兵由大路直攻峩堆自卯至午賊匪伏巢不出
楊玉科佯令撤隊誘之逆匪果由縣城峩堆九臺三
處大股出追官軍且戰且走引賊漸遠西南兩路伏
兵齊發直撲縣城該逆欲行回顧官軍奮力夾擊層
層圍殺擒斬甚多賊撲水死者不計其數逆首丁在
星洪致書馬良勸斃於亂軍之中蔣宗漢張潤等當
將縣城克復楊玉科督兵攻克峩堆段瑞梅攻入九
臺殲除悍賊殆盡解散脅從難民數千人浪穹縣境
一律肅清惟查鄧川州城相距浪穹甚近恐該處賊
匪聞警固守遽難攻克楊玉科當於是夜密派段瑞

也...
...

梅帶兵三千名扮作逃賊偃旗息鼓而進十二日黎明馳抵鄧川城外出賊不意四面架梯環攻立將城池克復斬擒甚眾餘賊退入上關查有白米莊賊巢在上關之左鳳羽橋後并鍊鐵長邑村等處賊巢在蒼山之後均爲大理賊匪咽喉糧路必先次第攻拔然後可圖進取杜逆聞鄧浪兩城經官兵克復派其本宗胞兄楊占鵬率黨數千固守橋後賊巢與鍊鐵逆首僞大司直馬福壽僞大都督龍其瑞及鳳羽長邑村白米莊各處賊匪互相聯絡以拒官兵楊玉科分遣張潤乘勝攻克鳳羽卽進取橋後賊巢飭段瑞

梅一軍直逼上關以斷賊援楊玉科親督官兵先將
白米莊克復隨即進攻鍊鐵又飭蔣宗漢攻取長邑
村賊壘於十月初八日克之遂合力圍攻鍊鐵初九
日戌刻破壘而入殲除逆首馬福壽生擒龍其瑞訊
明正法餘賊斬擒殆盡時張潤圍攻橋後賊巢正在
喫緊楊玉科移兵前往督攻連破賊礮多座該員右
手食指忽被賊鎗擊斷哀創督攻愈力至十二日亥
刻逆首楊占鵬度勢不支由內舉火自焚官軍乘勢
越壕而進一面搜殺賊匪一面將火撲滅楊占鵬尙
未燒斃當卽擒獲稟請解省審辦等情前來臣等伏

查鄧川浪穹州縣城池及鳳羽白米莊各處賊巢均距大理甚近爲賊必爭之地此次楊玉科督兵進剿一月之間連下兩城並克堅巢多處擒斬首要各逆該員舊傷未痊復受新傷仍在營督剿不懈實屬異常奮勉除飭該員分兵固守已得之地相機而進勿得恃勝輕敵並將杜逆胞兄楊占鵬就近解交鶴慶州訊明正法首級解省查驗俾免長途疎虞其在事出力之文武員弁官紳容俟查明彙入鎮南姚州鶴慶永北城池案內請獎陣亡弁勇另案辦理外所有官軍攻克鄧川浪穹州縣兩城及鳳羽白米莊橋後

井鍊鐵長邑村等處賊巢擒斬首要各逆北路肅清
緣由謹合詞恭摺具陳伏乞

皇太后

皇上聖鑒訓示謹

奏

軍機大臣奉

旨另有旨欽此

會奏提督馬如龍傷痊圖効趕緊籌餉片子

再提

臣

馬如龍前於克復新興州城後因傷發回省

就醫調治擬俟稍痊仍卽出省督兵進剿東溝等處賊巢曾經

奏明在案茲准該提督咨稱前因督隊受傷暨克復州

城疊沐

皇上隆施渥邀

寵眷雖捐糜頂踵不足以仰答

高深除已自行奏謝外現在傷疾俱痊亟圖報効善珍逆

氛請迅撥餉糈等情前來

臣

等伏查前次奏撥湖南

月協餉銀二萬兩原以專濟該提督一軍嗣經湖南
撫臣劉峴以該省援兵四出庫款空虛無力籌撥奏
請停止迄今並未撥解惟滇省地方早已糜爛不堪
而外省協餉亦未能隨時接濟值此進兵之際不得
不設法另籌臣等惟有督同軍需局司道趕緊極力
籌畫俾該提督得以剋日起程前往督剿以期迅速

掃蕩仰紓

宸廑謹合詞附片陳明伏乞

聖鑒謹

奏

會奏川邊蠻匪竄擾滇境急籌剿辦情形摺子

同治

九年十二月

奏爲川邊蠻匪偷渡過江竄擾滇境現已調撥兵練急籌剿辦情形恭摺仰祈

聖鑒事竊據昭通鎮總兵李家福署昭通府知府貴齡稟稱據署右營游擊譚美稟報探得永善縣毘連川界之巴布梁山大木杆阿祿馬各處蠻匪糾約大股出巢營集於下江涵筒口小屋基小河內等處大有竄滇滋擾之勢正在分兵堵禦聞該匪忽於十一月十五日夜潛由上江之小溝小壩子偷渡過江滇岸兵

練軍薄猝不及防致被襲踞營礮數座現又攻破求
兩堡擾至黃菓溪出水洞燕家寨一帶勢甚猖獗尙
有屯集川岸匪黨甚眾永善縣城戒嚴業由該總兵
派兵前往先將城防及各要隘妥爲固守並招募練
丁分投截擊請發重兵剿辦等情前來臣等伏查永
善地方緊連川界與雷波屏山廳縣所屬蠻匪僅隔
金沙一江每值秋冬收割江水枯涸之時往往緣流
涉淺偷入滇境燒殺搶擄爲害匪輕經臣等籌撥經
費責成昭通右營游擊募練嚴防數年以來幸得堵
禦無事詎因本年亢旱太久蠻地甚屬饑荒而江水

低落幾欲斷流沿江上下隨處均可涉越防備難周以致該匪闖入所可慮者大關一帶爲迤東各屬往來要道井渡釐金必由之路乃滇省一線餉源值此激江未克西路軍務正殷萬一該匪蔓延不特入川大道爲之梗阻亦且蹂躪完善全局攸關臣等現已飛調駐防尋甸馬龍之副將劉奇義抽帶勁勇三百名並調各路團練星夜馳往聽候李家福調遣庶期兵力稍厚得以迅殄賊氛惟此次該匪傾巢出擾雖未全數過滇尙多蟻集川岸必得川軍由彼面進剿俾未渡匪黨迅回老巢而入滇蠻眾不難撲滅除由

臣等咨會四川督臣飭令雷波屏山附近兵練併力夾擊並查明游擊譚美疎防情事另行參辦外所有川邊蠻匪竄擾滇境急籌剿辦情形謹合詞由驛恭摺具

奏伏乞

皇太后

皇上聖鑒訓示謹

軍機大臣奉

旨另有旨欽此

滇黔奏議卷八

湘鄉劉嶽昭蓋臣著

男錫楚鎮楚謹編

會奏官軍攻克澂江府城擒斬各逆府屬肅清摺子

同治十年二月

奏爲官軍攻克澂江府城擒斬首要各逆餘匪殲除盡

淨府屬一律肅清恭摺仰祈

聖鑒事竊查澂江府城距省僅一百二十里自咸豐六年
被賊占踞疊次竄撲省垣並攻陷附近之呈貢晉甯
宜良江川等州縣城池大爲肘腋之患前因時事多
艱不能不暫爲羈縻詎意屢撫屢叛實屬罪惡貫盈

臣於省圍解後會同督臣熱商必先肅清東南再以

全力進剿大理庶免內顧之虞適總兵馬忠副將潘

文元等進攻澂江失利臣是以親赴澂江督率圍攻

自上年二月初八日出省即恢復中關大啞口九村

各處營盤漸次趨營前進四五六七等月先後攻破

龍潭蘿葡村校場小石山菜園棕樹村朱家山龍王

廟妥白村雙樹村等處逆匪營礮百餘座八月內克

復西山村西街子上下左所團樹營掃茅洞趙家營

中所右所學山毛園大樹村新河口鎮海營波羅村

窯上等處老巢十一月間復破紅山五靈廟鳳翔寺

及附城四面賊匪營礮九十餘座節經

奏報在案

臣

於十二月初九日拜摺後仍督飭各營員

弁奪據四面城濠分投開挖地道該逆竟與官軍隔濠對壘肉薄相當並於城腳新開重濠砌立石礮堵截地道一任鎗礮火蛋晝夜轟擊逆等伏於新濠以死抗拒殲除悍賊固多官軍亦損傷不少本年正月初一日臣移駐先鋒營盤親督連放地道轟陷城腳賊礮多座壓斃伏賊尤眾該逆外懾軍威內苦逆首逼脅致有彭永壽王德昌等先後殲除逆首姚樹勳耿朝保並擒獻賊目馬貴楊發元來降城內賊勢愈

蹇臣卽督飭副將吳永安潘文元參將柳明泰錢汝
達岑寬德蘇成林吳鳳都司陸純剛楊聯桂李占鼇
崔萬順劉步龍張文友盧得志守備岑應麟黃才廣
鄭良臣韓國秀黃秦千總楊好謀縣丞黃翰章等力
攻西北兩門於二十四日施放地道轟倒西北城垣
十數丈因內層土牆屹立未下賊以全力抗拒該處
遽難攻入當將缺口紮穩仍換班輪攻土牆二十六
七兩夜總兵曹星柏參將熊遇周都司趙廷雲岑有
富楊思潤守備岑宏蔚武永貞等復由南門疊放地
道轟陷城腳石礮四處逆等兼顧不遑二月初一日

總兵馬忠何秀林等購獲內應奪據東門城樓吳永安等由西北城缺一擁而進各營官軍同時架梯登城立將城池克復生擒逆首馬和李萃單丕烈單丕勳馬賢馬學易謝洪馬聯甲馬德等訊明正法餘匪搜殺盡淨逃出之賊復經辦理營務迤東道蔡錦青督兵層層截殺無一漏網是役也官軍五路進剿血戰一年有餘始將全境肅清則因地勢險要逆匪盤踞日久蒂固根深城外又有西山村西街子上下左所鎮海營龍王廟圍樹營波羅村右所紅山等處堅巢星羅碁布四面賊礮林立賊糧軍火件件充足本

處逆匪並糾聚開廣迤西之賊不下萬人皆係百戰
餘孽兇悍異常而周圍數十里內樹木全無官軍紮
營曠野所需木柵柴草轉運綦難主客之情既殊勞
逸之勢迥別逆等又因屢撫屢叛自知罪難再寬無
不拚命抗拒及官軍奪據城濠猶於濠內抵敵兩月
有餘迨至姚逆授首馬貴楊發元耿朝保等次第伏
誅餘匪雖曾具稟求撫仍然閉城負固意在緩兵待
援臣亦不敢遷就了事再遣後患是以成功稍遲城
破之日兵勇人人憤極除老弱婦女外餘皆全行屠
戮從來剿賊之透徹紮營之逼近攻城之竭力未有

如此次者在事文武員弁均屬勤勞日久異常出力
容臣查明另行奏懇

恩施其陣亡之副將銜補用都司楊思潤都司銜儘先守
備祖大章守備銜補用千總飛兆雄趙廷凱五品蓋
翎儘先把總黃勝海從九品職銜胡先迎等均係前
敵捐軀深堪憫惻相應請

旨飭部分別從優議卹以慰忠魂所有官軍攻克澂江府
城擒斬首要各逆全境肅清緣由謹會同雲貴總督
臣劉嶽昭恭摺由驛馳

奏伏乞

皇太后

皇上聖鑒訓示謹

奏

軍機大臣奉

旨另有旨欽此

會奏官軍剿退巴蠻疏通餉道大永肅清並籌辦江

防摺子

同治十年三月

奏爲官軍剿退巴蠻疏通餉道大關永善一律肅清現

飭籌辦江防事宜恭摺仰祈

聖鑒事竊

臣

等前將川省蠻匪偷渡金沙江竄擾滇境調

派兵練剿辦情形馳

奏在案查蠻匪自襲踞求兩堡後分陷燕家寨大小涼
風坳窩羅灘沙坪子等處要隘竄擾永善各鄉村縣
城戒嚴並蔓延大關廳之黃果溪豆沙關梨山頂板
斃山千百成羣嘯聚山箐圍攻村寨勢甚猖獗以致

關井餉道阻塞臣等飛檄昭通鎮總兵李家福署昭
通府知府覺羅貴齡會籌機宜分路剿辦迅圖撲滅
李家福等因接威甯警報城防喫重先經派令副將
劉奇義游擊王銓義守備張嗣曾張連城千總楊元
等前後各帶兵勇取道大關相機進剿先顧鹽井渡
餉道以遏該匪上竄之鋒並飭游擊曹世貴帶兵馳
赴永善會同署知縣夏廷燮防守縣城繼派游擊涂
開科千總孔昭雲楊再清等各帶所部前往永屬之
米貼會同防江游擊譚美規復沿江要隘以截該匪
後路劉奇義各軍於臘底陸續馳抵大關該將官等

料板凳山麻高蕩之賊乘我軍度歲必無防備當計
議於十二月二十九夜四更王銓義督同楊元由左
路四方石劉奇義督同張嗣曾由右路黃果溪兩軍
齊進並於小華田黎山頂山路叢雜之處令張連城
豫設伏兵本年正月初一日黎明均抵賊壘該匪分
股出拒勢甚洶湧我軍四路抄擊鎗礮環轟自卯至
午鏖戰數時陣斬悍匪多名賊勢少卻劉奇義等激
勵將士短兵相接斫倒毡衣蠻酋十餘人士卒勇氣
百倍該匪紛紛潰走我軍面面兜擒殲賊不下千餘
奪獲糧食器械無算遂由小華田奔竄復遇伏兵四

出截殺甚多餘匪奔逃鹽井渡後山合股窺伺釐局
維時委員同知陳廷珍馮克勳知州景福通關哨經
歷署鹽井渡巡檢陳杰等調團固守井市分派守備
薛占鼇張以仁等連日抽隊進攻小溪溝等處屢有
斬馘而王銓義於麻窩蕩板凳山得勝後督隊由大
灣子吉利鋪豆沙關跟踪追剿節節掃蕩陳廷珍等
聞王銓義已抵豆沙關遂約會兩面夾擊該匪偵知
官兵齊集登時潰竄四川筠連宜賓邊界先是成都
將軍臣崇實四川總督臣吳棠聞報巴蠻出巢卽調
提督唐友耕率所部分駐筠宜等處迎頭截剿屢獲

勝捷又經滇軍尾追處處設伏殲滅殆盡此大關一路官軍剿辦情形也曹世貴一軍於臘底馳抵永善與知縣夏廷燮將城防辦妥正月初八日出隊擊退近城側坡之匪跟踪追至米貼適涂開科譚美等均抵該處初九日分路進攻求雨堡該處山勢尤險悍匪拚命死守矢石如雨兵練傷亡數人涂開科由前面山徑奮勇先登直抵堡牆將守堡蠻匪斫斃十餘名譚美孔昭雲楊再清分由後路山梁併力攻擊亦抵牆下拋擲火彈將堡內房屋燒燃該匪內亂我軍兩面越牆而進殺斃甚多立將求雨堡攻克是日乘

勢收復窩羅灘沙坪子永甯箐濶筒口等處水卡餘
匪蟻聚燕家寨小霧基蔣家沱地方涂開科譚美等
於初十日馳抵大霧基連夜督令千總李光廷外委
高品變會同水軍弁委杜得勝武生楊秉光分駕礮
船由水路攻擊譚美涂開科帶兵由陸路接應三更
時齊集水陸並進一鼓作氣轉戰移時殲斃及落水
者三百餘名該匪大股棄礮搶渡過江我軍奪獲賊
船十餘隻生擒黑蠻六十餘人立斬陣前當將蔣家
沱燕家寨沙灣小霧基扁担石孫家沱大小涼風坳
等處各礮卡全行克復境內一律肅清餉道均已疏

通商旅往來無阻據李家福覺羅貴齡稟報前來
臣等查此股蠻匪兇悍殘忍耐饑耐勞懸巖峭壁之上
履險如飛踪跡最爲飄忽仰賴

皇威丕播無遠弗屆該將官等督率兵勇分路馳剿於匝
月之間全數擊退辦理尙爲迅速惟蠻性出沒靡常
必須整頓江防滇境始能永靖除嚴飭該文武修築
礮卡置備戰具並令副將劉奇義將部勇分布隘口
會同原設兵練扼要防守梭織巡查以杜回竄外其
江防疎失之署昭通鎮右營游擊譚美雖經帶兵收
復礮卡功過未足相抵相應請

旨將該游擊暫行革職留營以觀後效此次出力文武員
弁紳團及陣亡弁勇容臣等查明彙案奏請分別獎
卹籲懇

恩施所有剿退巴蠻境內肅清各緣由謹合詞由驛具

奏伏乞

皇太后

皇上聖鑒訓示謹

奏

軍機大臣奉

旨另有旨欽此

會奏官軍進剿東溝壘勝並克小東溝賊巢殲除首

逆摺子

同治十年七月

奏爲官軍進剿東溝壘次獲勝並攻克小東溝賊巢殲

除首逆恭摺仰祈

聖鑒事竊

臣

等前將提

臣

馬如龍攻克新興州城回省調

養傷痕俟傷愈仍赴東溝督剿情形馳

奏在案查東溝係河西縣所屬有大小二寨均依山傍

湖林深箐密地勢極爲險峻大東溝賊首馬成麟小

東溝賊首合輞治各擁悍匪數千互爲犄角盤踞有

年西寇結爲聲援附近遭其荼毒節次官軍進剿均

未得手提臣於上年冬月督率大隊取道新興州屬之龍門九村進紮東山梁海村一帶察看形勢該逆於各要隘密布賊壘層層阻截前面均係水田難以制勝惟探得西路曲陀關等處小道尚可勉強進兵當派副將賽春林懷清參將馬和馬步雲回目馬天順楊先芝等帶練分道進發並令游擊王正坤於河東虛張聲勢攻其前面提臣親率游擊陸得成夏毓秀張御鶴馬永順劉天元署守備張兆麟等繼進以爲各路策應奈小道崎嶇兵練均爬山越嶺鑿險縋幽幸人人有爭先之志甫至杜家營地方該逆大股

拚命前來接仗我軍鎗礮齊施斃匪數十名賊猶屹
立不動移時短兵相接陣殄賊酋馬四代等並斬首
百餘級賊始潰退老巢查點我軍受傷四人正月二
十五日馬天順楊先芝等進至關箐河賊先伏於叢
莽之中突出抗拒兵練奮擊互有傷亡殊賊死力搏
戰楊先芝大呼陷陣殺斃紅衣賊目二名匪勢少卻
楊先芝追敵太猛忽中鎗傷倒地其弟楊茂芝竭力
救護亦受重傷兄弟同時陣亡馬和張御鶴揮軍援
剿交鋒數合殪賊百餘名連踏賊營二座礮樓三座
我軍隨卽分紮二十九日提臣行抵甸苴壩關家營

一帶聞前路礮聲不絕知各營與賊接戰該處路極險窄馬不能前立卽舍騎步行帶領親兵攀藤附葛越嶺而上夏毓秀在山腳與賊交鋒身帶重傷正值危急之際提臣率隊衝下賊眾披靡手刃老賊十餘名賊卽奔潰立將夏毓秀救出各路之兵望見提臣當先馳聘無不勇氣百倍乘勢並進斬首多級卽將附近賊營碉樓全行攻破僅餘孤巢二座維時小東溝之賊畏懼軍威紛紛赴營乞降提臣未經允准次日老民婦女又赴營前泣訴被脅情形乞恩貸死提臣佯爲許諾責以捆獻首逆呈繳器械該民等甘願

遵依至三月十一日果將僞總統合愾治僞將軍馬
雙來張其位舒愾安四人捆送到營並呈繳軍械僞
印提臣察係真誠卽將合愾治等拘押在營其餘脅
從仰體

朝廷寬大之恩悉予免究當卽親率隊伍進寨安撫立將
小東溝收復次日將合愾治等駢戮軍前解首至省
示眾其大東溝之賊見小東溝已拔加釘椿木負嶮
死守我軍晝夜圍攻用開花大礮連環轟擊奈巢堅
賊悍兵練難以近前提臣審視賊巢憑臨溪澗親督
諸軍築隄壅水灌入賊壘復派游擊馬治堂馬和等

赴山後潛挖地洞已至該逆牆腳裝實火藥五月十
四日暗傳號令分布各軍面面埋伏俟賊牆崩倒卽
併力攻擊期於必克不料藥性從壘旁轟出霹靂一
聲煙焰迷空我兵聞響滾煙齊進賊見地洞未成拚
命出撲提臣麾軍縱擊肉薄相當正在得手忽中賊
鎗登時昏暈倒地血流不止參將馬和游擊馬永順
劉天元等併力救護均帶重傷幸各將蜂擁而前始
救回營查看傷痕係擡鎗兩子一從左腿膝蓋穿過
一子陷於骨中極其沉重營中不便調治卽傳副將
賽春參將馬和馬步雲張御鶴馬天順等各營官面

授機宜輪流督隊攻擊旋於五月二十七日回至新
興大營調養適值連日大雨山溪陡漲沖決隄壑提
臣聞報重懸賞號飛令各將官重修隄壑擠紮營壘
現僅距賊巢數丈該將等齊心協力未敢鬆懈賊勢
已萬分窮蹙等情咨報前來臣等查提臣馬如龍秉
性忠直膽識兼優常稱受

國厚恩刻思圖報當此餉楮兩絀竭力籌墊時以大義激
勵戎行每戰必先士卒此次傷疾沈痾猶復誓死滅
賊洵屬血誠肫摯忠義感人正值功在垂成不料猝
被鎗傷又逢霖雨決隄實屬變生意外但該逆久已

窮蹙亦不過苟延殘喘現在嚴飭各營上緊攻剿以期迅拔堅巢仰紆

宸厯至節次出力及陣亡員弁兵勇俟大東溝肅清彙案陳請獎卹所有官軍進剿東溝疊獲勝仗攻克賊巢緣由謹合詞由驛具

奏伏乞

皇太后

皇上聖鑒訓示謹

奏

軍機大臣奉

旨另有旨欽此

會奏保選從九品文童何勳前單誤寫附生應請更

正片子

再^臣等奏請獎勵克復尋甸威遠等處城池出力人員案內請將附生何勳以從九品不論雙單月儘先選用同治九年十二月初十日奉

旨允准欽遵行知在案茲據雲南布政使宋延春詳稱該員何勳原係文童並非附生前因請獎原單開敘錯誤以致原奏清單內亦誤寫附生自應更正等情具詳前來^臣覆查無異相應請

旨飭部查照更正施行理合會同雲南巡撫^臣岑毓英附

片陳明伏乞

聖鑒謹

奏

軍機大臣奉

旨吏部知道欽此

會奏官軍攻克寶居賊巢並收復雲龍州城摺子

治十年八月

奏爲官軍攻克寶居賊巢並收復雲龍州城恭摺仰祈
聖鑒事竊查寶川州城於同治八年十一月初七日經都
司陳定邦等帶兵收復尙有距城三十里之寶居者
巢未卽肅清臣等檄飭陳定邦乘勝進剿前經

奏報在案查該處賊巢接聯大理地勢險要向來漢少
回多自咸豐五年逆首杜汶秀竊踞大理府城該處
賊匪卽將漢民全行殺害肆出蔓延攻陷城池多處
官兵屢次進剿均未得手前署提臣克昌亦沒於

此實屬賊陷巢堅攻取不易陳定邦等於八年十二月間次第移營進剿時姚州鎮南永北三城尙未克復寶川面面皆賊臣等嚴飭該員恪遵

諭旨穩紮穩進相持半載幸未疎虞迨九年四月內楊王科克復姚州城池卽派參將孫聯臣前往接換防剿疊據稟報攻克煉洞巖蓬大營街瓦溪等處賊營漸逼老巢而附巢里許之地賊匪徧植仙人掌刺高與壘齊火不能燒逆等伏匿其中每值進剿之際鎗礮如雨官兵多有損傷徐聯魁督率兵勇乘夜砍伐荆棘節節趨營前進又經數月始將四面棘叢並附近

逆壘次第掃平抵紫賊濠時楊玉科已克鶴慶鄧川
浪穹等處城池北路一律肅清臣等檄飭該員速將
善後布置務須先拔竇居以清後路該員於本年二
月二十六日酌帶將弁兵勇馳抵竇居軍營查看情
形督飭各營員弁分挖地道並輪班晝夜環攻至三
月初五日西面地道先成竇以火藥傳令各營嚴陣
以待戍刻點燃引線霹靂一聲轟倒賊壘數丈楊玉
科揮軍直入賊匪排比如鱗守住巷口死力抗拒勇
目徐聯級楊大奇錢有才等踴躍爭先均被鎗傷陣
亡徐聯魁奮不顧身衝鋒直前殲斃多賊守備李應

舉張有恒等同時由北門進都司朱士雲守備張子成等由南門進游擊蔣宗漢等由東門進四面兜剿屍骸枕藉賊勢不支集眾舉火自焚間有逃出之賊適遇李維述由雲南縣分派都司劉興李維通等前往助剿與追兵會同截擊擒斬殆盡當將賓居賊巢克復賓川州境肅清先是杜逆以趙炳南爲僞大司寇駐守雲龍州該處在大理之西距省千四百里左右有瀾滄潞江之險賊匪久已無備及同治八年八月省城解圍後臣檄飭署都司張潤等由維西中旬帶兵乘虛攻克麗江劍川等府州城飭守備李鳳祥

由永昌分兵攻克杉木河賊巢千總王祖佑收復官
乃山均與雲龍州地界毘連趙炳南畏懾軍威遂具
稟各處乞降王祖佑遣軍功邵長科往取其城李鳳
祥亦派其弟李鳳呈帶兵前往爭競不休而境內未
附之民各懷觀望仍樹白幟此九年二月間事也報
至省城臣等飭司委通判范瓊章馳往查辦卽委署
理州事於八月初六日繞道至彼彈壓解散分派邵
長科一軍移剿關南山賊匪並派軍功曹國寶馬廷
鑿趙育才等將十二關臘鷺寨雞茨登一帶竄匪擊
退於是箭里下節六十八村未附之民旋於十二月

丙望風歸順現由楊玉科處分兵前往協同駐守州
城遣撤李鳳呈一軍仍回永昌雲龍州境業已肅清
各等情據報前來臣等伏查寶居賊匪流毒最深此
次楊玉科督同陳定邦徐聯魁等先後進剿力攻一
年有餘幸拔堅巢盡殲羣醜實足以伸

天討而快人心其雲龍州城未經派兵進剿趙炳南卽行
見機反正尙非始終附逆情有可原該處得手大理
賊勢愈蹙永昌騰越團練亦得與楊玉科聲勢相聯
惟雲南縣城圍攻日久未下而彌渡已得之地復有
大理蒙化賊匪突出竄擾署通判羅熙藻帶團督剿

失利不知下落李維述就近馳往接應已獲勝仗斬
馘八百餘級解省查驗而蔡廷棟復率大股賊匪來
援勢甚猖獗臣等已飭李維述迅速掃蕩早拔雲南
縣城仰慰

宸厯此次攻克賓居老巢並收復雲龍州城在事出力文
武員弁容俟查明併入克復賓川州等處城池案內
另行奏懇

恩施其陣亡之副將銜補用游擊陳定邦游擊銜補用都
司王增補用都司王洪春補用把總王春年謝樹棠
吳在學六品頂戴補用外委王國弼尉遲貴蔡文彬

再目擬保千總徐聯級擬保把總楊大奇錢有才並
解糧中途遇害之訓導黃仲頤均堪憫惻徐聯級楊
大奇錢有才等先於克復姚州城池業經出力應行
獎敘相應請

旨飭部各照該員弁等本職暨擬保官階分別從優議卹
以慰忠魂所有官軍攻克寶居賊巢並收復雲龍州
城各緣由謹合詞繕摺馳陳伏乞

皇太后

皇上聖鑒訓示謹

奏

附奏改派坐催浙餉委員並派坐催江蘇廣東協餉
委員片子

再前派赴浙江省坐催匯解協餉委員准補中甸同
知孫逢源現據稟患足疾未能前往應改派委員前
往催解又廣東江蘇兩省新撥協滇月餉各銀壹萬
兩亦應委員前往催提查有丁憂知府銜准補威遠
同知伊紹洙堪以派赴浙江省補用道員張承頤堪
以派赴江蘇省選用知府夏源堪以派赴廣東省分
投坐催提解據軍需局司道具詳前來除分別給咨
外理合附片陳明伏乞

聖鑒謹

奏

會奏官軍攻克茂克賊巢開化府屬肅清片子

再臣等承准軍機大臣字寄三月初六日奉

上諭著劉嶽昭岑毓英檄飭張保和等迅將田心茂克賊巢一律攻拔毋稍稽遲等因欽此欽遵轉行遵辦去後

茲據張保和稟稱於二月中旬督帶游擊李占春都司張友等由竹園次第移營進攻茂克賊巢連獲勝仗斃賊百餘名當於賊巢附近築立多營四面圍攻至三月十九日將賊巢後山礮壘一律攻克逆等情急出撲勢甚鷓張官軍奮力兜剿自辰至酉交鋒數十次陣斬逆首馬四堂楊智李正東並悍賊多名餘

匪敗退回巢官軍卽由後山添紮四營憑高擊下日
夜鎗礮如雨斃賊無算先是茂克回人馬德等聞官
軍攻克竹園江那賊巢懾於軍威意欲投誠爲逆首
馬四堂楊智李正東等所殺無敢復言投誠者及三
月十九日之戰馬四堂楊智李正東等俱已被殲悍
賊陣斬殆盡餘黨伏匿巢內一日數驚投水自縊者
不少二十三日有老回金萬馬同等率領老弱男婦
齎赴營前伏地乞降張保和查其巢內並無賊匿得
賊所稟係屬真誠卽督令繳械毀堡聽候安置四月
初二日將該降人等概行拔往阿迷州屬之大莊回

寨居住交該處回目馬維騏隨時約束茂克賊巢業
已肅清等情據報前來臣等伏查茂克地方係在開
化府屬與竹園江那田心賦法日者鄉各處賊巢狼
狽相倚積惡十有餘年上年張保和圍攻竹園賊巢
茂克賊匪兩次來援已被官軍截殺多名此次復將
逆首馬四堂楊智李正東等陣前擊斃悍賊悉就殲
除僅餘老弱男婦易地安置一月之內卽將賊巢攻
拔辦理尙稱妥速現在開化府屬業已肅清惟阿迷
州屬尙有田心賊巢邱北縣屬尙有日者鄉賊巢均
與開化地界毗連除飭乘勝進剿務期迅速掃蕩外

理合附片陳明伏乞

聖鑒訓示謹

奏

會奏滇省未復地方並將弁分投進剿邊

旨繪圖貼說進呈片子

再_臣等承准軍機大臣字寄同治十年正月初十日

奉

上諭雲南軍務日有起色未經收復地方尙有若干各路帶兵將弁某員剿辦何處均著繪圖貼說詳細奏聞等

因欽此仰見

聖主軫念邊陲無微不至伏查滇省軍興十七載蔓延徧

三迤郡縣城池淪陷大半_臣等仰承

聖訓刻慄戎機得以掃蕩逆氛先後克復呈貢晉甯富民

嵩明易門安甯羅次祿豐昆陽尋甸武定祿勸元謀
楚雄廣通南安定遠大姚姚州鎮南賓川雲龍鄧川
浪穹鶴慶麗江劍川永北緬甯威遠新興澂江等府
廳州縣共計三十二城現在迤西賊匪尙踞大理等
處九城東南開廣臨安各屬餘匪尙未肅清雖經派
撥將弁分投相機進剿但以臣等愚昧布置一切恐
未能動合機宜謹遵

旨繪圖貼說恭呈

御覽是否有當伏乞

聖鑒訓示謹

奏

會奏通籌全局添兵分剿並報岑毓英出省督辦起

程日期摺子

同治十年八月

奏爲通籌全局添兵分路進剿並

臣

毓英出省督辦軍

務起程日期恭摺仰祈

聖鑒事竊查滇省軍務

臣

等恭承

聖訓激勵戎行先後克復三十二城掃蕩竹園江那賊法

茂克裸多驛各老巢迤西尙有大理永昌順甯蒙化

騰越雲州趙州雲南永平等府廳州縣九城未克東

南尙有邱北縣屬之曰者鄉臨安府屬之館驛雙兮

田心東溝五處賊巢未平所有分兵進剿情形前曾

繪圖貼說詳細

奏明在案伏查迤西未復各城皆距省城較遠卽至近之雲南縣亦距省七百餘里現有總兵楊玉科全軍分駐鄧川浪穹雲龍賓川鶴慶麗江一帶防剿俱極嚴密李維述圍攻雲南縣城日久未下兵力漸形疲敝_臣等已派總兵楊國發帶兵馳往會合攻剿並派遣道員岑毓寶一軍豫備隨時策應惟東南未拔各巢有萬不可緩之勢緣館驛東溝婁兮等處均距省不過二三百里從前屢犯省垣盡係百戰餘孽必須先行剿除將來全師西上方無內顧之憂_臣等於同治

八年卽派參將梁士美由臨安就近攻剿館驛迄今
兩年之久屢次嚴檄飭催該員竟未出府城一步僅
派梁士偉等駐紮通海曲江一帶坐耗軍糧百姓深
爲怨恨前因澱江未克兼顧不遑原議提臣攻克東
溝卽赴館驛督辦而東溝久未得手提臣現又受傷
遠難痊愈恐館驛賊匪乘此竄援東溝必致滋蔓難
圖其妻孥田心二處前飭總兵何秀林張保和分任
防剿適因軍糧缺乏且何秀林一軍甫隨同攻克澱
江張保和一軍疊破竹園茂克等處苦戰日久均成
強弩之末未能驟進僅分兵扼要堵剿尙未逼近賊

巢曰者鄉踞匪責成廣南文武督飭兵團圍攻亦未
 得手刻下新穀漸熟各處俱宜添兵加力進剿臣毓
 英不能不移緩就急親赴迤南督辦以期迅拔各巢
 肅清東南如遇迤西喫緊仍當往來兼顧不敢憚勞
臣等再四熟商意見相同當將派赴迤西兵勇調集
 分起拔發臣毓英即於七月二十六日由省帶兵起
 程以後進剿機宜俟到曲江查明容臣再行

奏報其省城巡防事務並各路餉需軍火臣嶽昭自當
 督同司道及在省文武司事各員盡心籌畫俾免貽
 誤所有通籌全局添兵分路進剿臣毓英出省督辦

軍務起程日期謹合詞恭摺馳陳伏乞

皇太后

皇上聖鑒訓示再臣署日行事件均關緊要應仍帶赴行

營核辦以昭慎重合併陳明謹

奏

• 2000 INYMA

15.1

MA

會奏官軍攻克永昌府城並乘勝合攻永平片子

再

臣

正拜摺聞據總兵楊玉科稟報永昌府城經守

備李鳳祥等帶兵圍攻三年有餘本年三月內楊玉
科攻克賓居賊巢後卽派游擊劉重慶等帶兵前往
助剿並派游擊蔣宗漢疊次擊敗賊援城內賊愈窮
蹙李鳳祥等激勵兵勇晝夜輪攻於七月二十三日
當將府城攻克生擒逆首僞大司馬楊德名僞大司
武馬年三等餘賊殲除盡淨府城內外一律肅清等
情具報前來除查明詳細情形及在事出力文武另

行

奏懇

恩施並飭將善後城防事宜妥爲布置分兵乘勝合攻永
平以期迅速掃蕩外謹將大概情形附片具陳伏乞
聖鑒訓示謹

奏

會奏官軍攻破館驛等處巢壘並收復附賊夷寨摺

子 同治十年十一月

奏爲官軍進攻館驛等處逆巢疊破賊壘附賊夷寨一

律收復恭摺仰祈

聖鑒事竊_臣等前將通籌全局添兵分路進剿並_臣毓英

出省督辦軍務起程日期

奏報在案_臣於八月初七日行抵通海縣城查臨安府

屬之館驛叟兮東溝田心邱北縣屬之曰者鄉五處

賊巢以館驛爲最大賊眾巢堅距臨安府城九十里

距通海縣五十里原有土城係曲江巡檢汛弁駐紮

之地於咸豐六年被賊占踞各處匪黨脅聚其閒不

下三四千戶城外附賊夷寨百餘村名爲五山崎嶇

一百二十里直聯婁兮賊巢爲一氣負有江干之險

與田心東溝曰者鄉三處互相應援臣傳府屬州縣

紳士劉家達王丕欽沈鳳章李秉坤吳桐王正坤李

世康等到齊面詢僉謂大軍必先進攻館驛以扼其

吭則東溝田心各賊巢孤立無援自然瓦解等情臣

審機度勢莫善於此當飭辦理營務迤東道蔡錦青

督飭各州縣官紳在通海縣設立總糧臺籌畫軍糧

所調員弁兵勇陸續到營臣卽飭總兵何秀林督帶

前隊五千人及續到之參將李廷標等三千人均由
曲江進紮直搗館驛派游擊楊謙都司胡陞等二千
人由竹雞河一帶進規五山夷寨以斷婁兮館驛往
來之路派副將趙發游擊楊桐都司魏中達等三千
人進攻婁兮並飭總兵張保和加勁攻剿田心以分
賊勢其東溝賊巢仍係提臣馬如龍所部員弁帶兵
圍攻臣將通海後路布置周妥於九月十三日親帶
總兵任仕斌副將呂鎮南柳明泰游擊林守懷趙廷
雲覃修綱趙林玉等各軍拔赴曲江駐紮距賊巢六
里之沙壩營臣周歷各營看明館驛城外東北面尚

有太平莊梅山哨大小新橋東山壩新隆村妙白山
金家莊菜園河麻栗樹一帶村寨賊營礮樓西南兩
面賊亦環築石礮又有溫塘野馬川矣勒沖放羊沖
各村漢夷原係爲賊裹脅聽其驅使欲取館驛必先
去其藩籬然後可搗其巢穴當卽派任仕斌呂鎮南
等將溫塘野馬川放羊沖矣勒沖各村寨先行收復
於九月二十六日臣親督何秀林等各官軍進攻太
平莊一帶賊壘館驛賊匪傾巢出援惡戰三晝夜將
太平莊至妙白山一路賊營百餘座概行掃除抄出
竹雞河之後楊謙胡陞等亦由竹雞河一面連破大

寨西康勒海田等處長驅而下直抵妙白山與曲江
各營會合五山夷寨一律肅清十月初六日臣復督
飭何秀林李廷標等各軍將西北城外石礮木壘攻
拔卽晝夜紮營直抵城下二十四五等日又攻克東
門外金家莊麻栗樹菜園河各村賊營歷次斬擒賊
匪無算現在城外四面賊壘礮樓均已攻克只餘孤
巢官兵晝夜環攻不難剋期蕝事此官軍進剿館驛
賊匪並收復五山夷寨各情形也至婁兮軍務先是
甯州紳士劉家達等以大石洞爲進兵要路派團練
扼守賊以全力圍攻相持半月營中糧盡幾陷楊桐

帶兵馳往內外夾攻大破之斬首百餘級乘勝攻克
大龍潭九甸各賊營解散脅從千餘人趙發等由路
南進兵亦連克車白綠豆冲上下舍普魯各賊壘均
隔濶兮老巢五六里之地總兵張保和分剿田心賊
匪因軍糧缺乏先派所部員弁張繼聲等由窯房寨
進兵牽制賊勢一面由廣西州籌辦糧米催調兵勇
適逆首馬世德煽惑阿迷州邱北四山夷眾乘閒竄
擾勢復滋蔓張繼聲等實力堵剿疊有斬擒於八月
二十一日攻克田心附近之小壩心營礮數處張保
和親帶後隊復由阿迷大江邊一路節節掃蕩連破

多衣鋪下秦汪家塘壩埂等處陣斬賊首馬讓等割
獲耳記一百五十餘付解驗前來現在逼巢而疊加
勁圍攻可期指日殄滅其曰者鄉踞匪前責成廣南
文武督飭紳團剿辦因廣南西路南路有土匪滋事
未能越境助剿復經張保和派游擊李崇魁李占春
等帶兵前往會合邱北縣知縣林彭齡守備卞永壽
紮營進攻於九月初五日攻克鎮石橋等處賊營脅
從各夷寨紛紛反正賊勢已孤此官軍分剿獲今田
心曰者鄉賊匪各情形也臣現激勵各員弁竭力進
攻擬俟館驛肅清再行分兵添往各處圍剿務期次


第 蕩 平 以 仰 副

聖主綏靖邊陲之至意其歷次打仗陣亡之副將銜補用
都司沈朝覲游擊銜補用守備何應宗都司銜補用
守備毛金榮覃永鳳守備銜補用千總楊思順畢康
壽李民安五品頂戴補用把總何掄元補用把總黃
貴清穆國昌徐榮張紹龍汪占鼇段文秀馬中囑從
九品楊永康等均係前敵捐軀深堪憫惻相應請
旨飭部分別從優議卹以慰忠魂所有官軍進剿館驛等
處逆巢疊破賊壘並收復五山夷寨各緣由謹合詞
恭摺馳陳伏乞

皇太后

皇上聖鑒訓示謹

奏



附奏迤西各路軍務片子

再迤西軍務前因總兵李維述圍攻雲南縣城久未
得手臣等添派總兵楊國發一軍前往會剿曾經

奏報在案嗣據楊國發稟稱帶兵馳抵姚州時李維述
各營因糧米缺乏且疫疾甚眾已暫行退守鎮南約
俟穀熟瘴消再行會合進剿其雲南縣城賊匪於官
軍撤退之後復蔓延雲南驛一帶意欲下竄經李維
述楊國發等派兵出擊賊匪旋即敗退九月二十六
日該總兵等籌備軍糧各帶所部兵勇仍進紮雲南
驛之老張營等處疊獲勝仗於十月初六初八等日

連破阮家營文昌宮水磨山桿香村華里村酒藥村
焦旗營白石奶濟海驛賊壘多處現乘勝進攻縣城
並據總兵楊玉科稟報大理賊匪於八月下旬大股
竄出上關攻撲關外各營勢甚鴟張經該員親督力
戰相持半月斬擒悍賊千餘人於九月十七日逆等
仍退入關負嵎抗拒查該處懸巖壁立面臨洱海勢
難力攻現仍督飭各營加意防堵一面分兵進攻永
平縣及漾濞巡檢地方以孤賊勢又據知府尉遲昂
玉守備蘇三寶稟報順甯雲州賊匪於八月二十四
日復竄擾緬甯廳城業經該員等帶兵馳往援剿各

等情據報前來臣等檄飭該各員相機穩紮穩進勿稍疎虞其永昌府城新復署知府屈紹培現在督攻騰越廳城該府善後事宜未能兼顧臣等已檄飭署麗江府知府鍾念祖就近馳往督同帶兵各員妥爲布置俟稟覆到日續行

奏報外所有迤西各路軍務情形理合附片具陳伏乞
聖鑒訓示謹

奏

同治十年十一月初二日奏十一年正月初四日奉
旨知道了欽此

會奏官軍剿除威甯槓匪餉道肅清摺子

同治十年

十二月

奏爲官軍出境剿辦威甯州槓匪全數撲滅餉道肅清

恭摺馳陳仰祈

聖鑒事竊照貴州威甯州地方爲川滇黔三省要道其地
山多箐密而漢回夷裸雜處其間自軍興以來土匪
嘯聚甚眾出沒靡常焚掠肆擾名曰梳槓其著名稔
惡爲首者楊紹濟李照四盤踞香爐山陳大桿盤踞
紅巖招其悍黨千餘人結寨爲巢厚積藥鉛糧米樹
旗鑄礮抗拒官兵

臣

據昭於同治七年夏間自舉節

統師入滇道經威城卽擬先行剿辦時因省圍甚亟
兵力難分兼之迤東一帶賊氛方張更恐牽合蔓延
轉成燎原之勢當飭該文武等設法辦理迄今尙無
成效上年十二月間該匪等勾結水城苗逆巖大五
攻陷威甯州城旋經官軍克復苗匪竄去而槓匪則
恃險負隅仍復燒殺淫擄千百爲羣實爲邊疆之患
本年夏間滇省軍務稍鬆臣等會商以該州係滇省
餉道此股槓匪亟應派兵殄滅當經函商貴州撫臣
曾璧光意見相同卽由臣等札委署督標中軍副將
吳奇忠補用副將蔡標挑帶勁勇一千餘名授以襍

宜馳往該州會同各該文武妥爲辦理旋據稟稱六月二十九日馳抵威城會商貴西道奇克慎威甯鎮總兵萬化林署威甯州知州蘇忠廷等先將城防布置出示曉諭各鄉團解散脅從並札調儻塘把總饒文釗從九周世蘭可渡外委史繼賢把總馬連發保冬桂練目桂尙華等帶隊助剿七月初八日吳奇忠蔡標帶領兵團分路前進吳奇忠行至黃土坡駐紮查看香爐山賊巢形勢孤峯高聳東西南三面山路極其險峻該匪多設滾木擗石據險不出當派游擊姚增榮都司陳芝發把總周忠凌等分紮各要隘斷

賊樵汲之道並購令與賊素識之楊得才帶團練十
餘名潛投賊營相機內應初十日午刻我軍分道進
攻攀藤附葛猱升而上賊營鎗石如雨都司王學魁
奮勇先登腦中兩石登時陣亡吳奇忠等指揮守備
蔡正坤把總馬連發等分路接應自午至酉鎗斃傷
賊楊大麻子陳七四等多名我軍血肉相薄亦有傷
亡天晚收隊回營是夜二鼓月明如晝內應楊得才
報稱賊匪水道斷絕欲乘閒逃竄約於夜間舉事吳
奇忠遂令各營另挑勁勇於三更時分進攻並派姚
增榮等埋伏山逕我軍直抵寨門舉火爲號楊得才

糾合被脅難民從中掩殺賊眾大亂我軍拋擲火器
飛入賊牆燒燃房屋乘勢越牆而入生擒悍匪一百
數十名其餘被焚及投巖而斃者不計其數匪首楊
紹潰力不能支率其死黨從山後殺出欲圖逃竄姚
增榮等伏兵四起合力兜擒該匪手執大刀亂砍傷
勇甚多王青雲蔡正坤王齊壽蔡正友奮勇上前鏖
戰移時殄除黨羽楊紹潰力竭就擒我軍混戰一夜
天明收隊吳奇忠親入賊寨搜剿餘黨救出難民五
百餘名將寨內房屋牆砌概行平毀十二日蔡標亦
誘擒紅巖賊首陳大桿解入威城商同貴西道奇克

慎威甯鎮總兵萬化林等訊據楊紹潰陳大桿供認
逆情不諱並稱李黑四一犯已先期潛逃不知去向
當將楊紹潰陳大桿及悍黨一百餘人就地正法香
爐山紅巖賊匪均經掃蕩無遺威甯餉道一律肅清
等情前來臣等查此股積匪積惡多年應援外寇實
屬叛逆今一旦擒渠掃穴洵足以伸

國法而快人心所有文武員弁妥速蒞事著有微勞合無
仰懇

天恩俯准將此次異常出力之總兵銜補用副將鎮雄營
參將健勇巴圖魯吳奇忠請以總兵

訛名遇有缺出請

旨簡放雲南儘先補用副將蔡標貴州畢赤營游擊儘先
副將楊開祥均請

賞加總兵銜花翎儘先補用游擊姚增榮請免補游擊以
參將儘先補用貴州補用都司趙步雲補用都司陳
芝發藍翎補用都司朱克曾均請免補都司以游擊
儘先補用朱克曾並請

賞換花翎藍翎守備謝金樑補用守備蔡正坤均請免補
守備以都司儘先補用謝金樑並請

賞換花翎儘先千總羅登瀛熊培德王青雲均請免升守

備以都司儘先補用把總饒文釗史繼賢均請免補
把總以千總儘先拔補雲南候補知府陳席珍請

賞給三品頂戴同知銜貴州候補知縣蘇忠廷請

賞戴花翎雲南候補知縣吳開基周瑞璧均請俟補缺後
以同知用先換頂戴揀選知縣袁允孚請以知縣發
掣省分歸候補班前先補用並請

賞戴藍翎六品翎頂候選知縣蕭仁恬請以知縣留於口
南歸候補班遇缺儘先前補用並請

賞加同知銜候選府經歷劉銘請免選本班以知縣留於
貴州歸候補班先用並請

賞戴藍翎六品藍翎候選從九品周世蘭請免選本班以
縣丞留於貴州儘先補用附生彭鏡青請以縣丞
不論雙單月遇缺儘先卽選並請

賞戴藍翎可否之處出自格外

鴻施至打仗陣亡之花翎都司王學魁儘先把總張新初
尹得勝呂德勝等均係臨敵捐軀深堪憫惻相應請
旨飭部從優議卹以慰忠魂除已將吳奇忠蔡標所部兵
勇調撤回滇札飭該文武等將善後事宜隨時妥辦
仍嚴拏逸犯李黑四務獲正法其餘傷亡兵勇彙案
辦理外所有剿除威甯積匪竣事緣由謹合詞由驛

具陳伏乞

皇太后

皇上聖鑒訓示謹

奏

軍機大臣奉

旨另有旨欽此

附奏馳報官軍收復大東溝片子

再提

臣

馬如龍傷疾愈後督飭員弁將新興州城降

眾暫遷龍門九村安插卽親赴東溝行營激勵兵勇
先將附近之漢夷村攻拔斬馘甚多旋卽乘勝進逼
老巢晝夜環攻於十二月初四日辰刻將大東溝克
復附近村寨一律肅清等情據報前來

臣

隨卽飛咨

提

臣

督同地方官將善後事宜妥爲辦理俟提

臣

咨

報到日再行詳細具

奏謹將大概情形先行馳報以期仰慰

宸厪理合附片陳明伏乞

聖鑒謹

奏

軍機大臣奉

旨知道了欽此

附奏會剿興義府等處片子

再貴州之興義府縣暨普安廳與雲南之羅平州平彝縣均係接壤同治八年興義回匪猛撲普安廳城

經臣派軍出境獲勝解圍兩稔以來不敢復窺邊境

而興義府貞豐州新城等處賊皆負固如前未能殄

滅本年接准貴州巡撫臣曾璧光提臣周達武來咨

會商乘機夾擊並據該官紳等稟懇合剿前來伏查

黔匪滇回本屬同氣而臣以兼圻軍務利害相因本

無畛域之分適際艱難之會前已揀派委員馳赴該

處會同貴州文武激勵兵團布置要隘現在黔軍已

至安南相離較近而賊蹤尙無定向奔突宜防所幸
東溝現已得手如滇軍尙可抽撥臣無論如何爲難
亦當力圖兼顧以期早靖邊圉謹附片具陳伏乞

聖鑒訓示謹

奏

軍機大臣奉

旨知道了欽此

滇黔奏議卷九

湘鄉劉嶽昭蓋臣著

男錫楚謹編

會奏官軍力破館驛並克田心等巢殲除各逆摺子
同治十一年正月

奏爲官軍力破館驛西北兩門並攻克田心等處賊巢
殲除首要各逆恭摺仰祈

聖鑒事竊臣等前將官軍進剿館驛漢谷田心日者鄉等
處賊巢疊破賊壘情形恭摺馳

奏本年正月初六日承准軍機大臣字寄同治十年十
二月初三日奉

上諭臨安府屬之館驛等處賊巢現經岑毓英督兵進剿已將五山夷寨收復並分剿溷兮田心曰者鄉賊匪脅從各夷寨紛紛反正賊勢已孤卽著劉嶽昭岑毓英飭令何秀林等督率前敵官軍乘勝進攻先將館驛賊巢攻破一面分兵圍剿各處賊壘以期迅掃逆氛等因欽此仰見

聖訓周詳無微不至欽奉之下懍惕益深伏查館驛軍務自掃平附城賊壘後臣毓英逐日親赴前敵督飭何秀林李廷標任仕斌柳明泰林守懷趙廷雲楊謙等直薄城下環築營壩施放開花礮晝夜攻城燬壞房

屋甚多逆等乃於城內塞巷增壘掘地爲營並由地
穴通出城濠上覆木石開列鎗眼伏賊死守臣查看
情形必用地道轟擊方能破之卽飭何秀林李廷標
任仕斌柳明泰等督兵分頭開挖於十二月十六日
西門地道先成三穴實以火藥同時點放轟倒城垣
三十餘丈濠內伏賊壓斃殆盡官軍卽由缺口衝入
血戰一晝夜殺賊甚眾逆等踉蹌房屋及各地穴死
力抗拒官軍遂於城內紮立十七營肉薄相當復於
西北門開放地道二十餘穴轟倒房屋一層進紮一
層將西北兩門城垣房屋全行奪據殲斃悍賊固多

而官軍亦損傷不少現在仍用地道節節掃蕩日可望撲滅此官軍力破館驛西北兩門大概情形也至田心軍務疊據總兵張保和稟稱該處賊巢恃有車白泥紅果樹暮龍三處堅堡首尾相連外又建有礮樓八十餘座防備周密而車白泥四面水田尤爲堅固張保和督率兵勇開溝瀉水由泥渚中趨營逼攻飭游擊李崇魁張致和等堵剿曰者鄉援賊於十一月內連破所求大鐵白色姑等處賊寨先後斬賊六百餘級截斷曰者鄉田心賊匪往來之路始得專力圍攻乃逆首馬世德又暗遣匪黨竄踞開化府屬

之黑末地方煽惑各處夷寨阻截官軍糧運勢甚危急張保和卽將田心車白泥軍務暫交守備張繼聲上緊攻剿該員分帶兵勇回顧糧路於十一月十八日至十二月初十日連克洒戛竜大小石牙白魚洞水冲彌勒灣土基冲白兔末落施札等處賊寨擒斬首逆胡亮及兇悍逆黨四百餘名署開化府知府陳廷珍署游擊宋錦由開化聞報亦卽挑帶兵團赴援連破黃龍山舍舍寨馬蝗冲棠栗冲等處前來會攻黑末賊壘於十二月十二日破之擒斬賊目馬連升馬添順林珍馬美楊植戴美鄭有榮及從逆餘匪數

百開化府屬糧路暢通張保和帶兵馳回田心途次
樂棲舊地方接據張繼聲稟報於十二月十三日已
攻入車白泥南柵及附近賊碉二處適臣毓英分派
都司陳金鑑把總俞慎修等帶領開花礮隊到彼助
剿乘勝轟擊至十四日午刻將車白泥賊巢全行克
復殲除賊目李成馬興馬先及悍賊三百數十名撲
水死者無算張保和回營後卽分派都司劉萃張有
春李占春楊國寶等攻取暮龍賊寨該員親督張繼
聲黃金森張科等分攻田心紅果樹賊巢於正月十
三日先破小石山及沿海各處賊碉數十座官軍勇

氣百倍乘勝分投力攻拔柵越濠而進立將田心紅
果樹暮龍賊巢同時攻破擒斬賊目納高司馬發金
二帥主等多名逆首偽大司靖馬世德率眾巷戰交
鋒數次力不能支退入火藥局內舉火自焚從賊數
百名悉爲灰燼當時樑棟摧折瓦礫騰飛張保和親
督官兵冒火衝突亦多損傷田心賊巢業已掃蕩肅
清等情具報前來臣等伏查田心地方久爲賊藪勾
結附近夷寨蒂固根深臨安開化廣南各屬均受其
害而逆首馬世德身受

國恩曾膺顯秩前因省圍喫緊竟甘心附逆受賊偽大司

職東南各處回匪紛紛蠢動均由該逆煽惑所致今
幸仰仗

皇威巨憝授首掃蕩積年老巢實足以伸

國法而快人心其曰者鄉勇等處賊巢均經官兵圍

剿窮蹙乘此聲威不難迎刃而下臣等自當慎遵

聖訓激勵諸軍先將館驛全城迅速克復並將各處賊巢

早日肅清以期仰副

聖主軫念邊陲之至意惟上年各省解到協餉共計不足

二十萬金而本省水災之後饑饉漸棘糧餉萬分乏

絀各營員弁兵勇營膳臥薪力破堅巢實屬異常艱

苦可否仰懇

天恩俟館驛全城克復容臣等查明擇尤保

奏出自

逾格鴻施其各路打仗陣亡之游擊銜補用都司朱占楚
陳學游擊銜補用守備黃發祥都司銜補用守備鄧
占洪守備銜補用千總林開勝王祥楊詔張臣韓國
忠藍翎千總黃開文把總許有邦楊兆王洪順戴澤
元李大賢王有才李得勝陳敬銀金范鍾英外委趙
儀相徐永發王得貴樊振茂陳占敷朱占甲立功後
在營療故之游擊林大任等均堪憫惻相應請

海國通言 卷二
旨飭部分別從優議卹以慰忠魂所有官軍力破館驛西
北兩門並攻克田心等處賊巢擒除首要各逆緣由
謹合詞恭摺馳陳伏乞

皇太后

皇上聖鑒訓示謹

奏

附奏官軍攻克哈臘左賊巢並雲南縣城指日可復

片子

再迤西軍務疊據總兵楊玉科稟稱該員分派官軍
圍攻永平縣城及曲洞漾濞等處賊巢正值得手忽
據探報逆首蔡廷棟糾聚江迤賊黨數千竄踞哈臘
左地方前來接應該員卽將曲洞軍務暫交都司李
應舉張潤極力圍攻隨帶副將段瑞梅游擊蔣宗漢
等由龍街黃連鋪沿江一帶分路截擊連獲勝仗大
挫兇鋒於十二月十九日進攻哈臘左賊巢克之斬
首二千餘級跳江淹斃者不可勝計餘賊逃脫無幾


現在曲洞濠溝賊援已斷不難迅速攻拔又據總兵
李維述楊國發等稟稱雲南縣軍務自十月二十日
攻克後所土城後卽移營直抵城下四面圍攻於十
二月十二十三等日將東西北三面濠邊賊礮次第
攻克大理蒙化賊匪疊次大股來援均被官軍擊退
孤城指日可下等情具報前來除檄飭該員等激勵
士卒迅圖掃蕩賊壘恢復城池仍隨時嚴防賊援外
理合附片陳明伏乞

聖鑒訓示謹

奏

軍機大臣奉

旨另有旨欽此



奏陳官軍出境會剿貴州興義賊匪並派文職大員

總理營務摺子 同治十一年二月

奏爲官軍出境會剿貴州興義府屬賊匪恭摺馳陳仰

祈

聖鑒事竊查貴州興義府城踞匪及新城賊巢久爲滇黔

兩省邊患臣前擬抽兵會剿附片陳明在案本年正

月疊據署興義府知府葉正固署普安廳同知嚴鼎

金粟稱賊勢猖獗並環立棚樓抗拒官軍等情當飭

各該文武激勵兵團認真攻剿惟查該處賊悍巢堅

負隅日久非厚集兵力不足以資懲創幸東溝業經

克復堪以抽調兵勇臣體察情形檄飭記名總兵署
督標中軍副將吳奇忠總兵李文才副將李嘉谷參
將金仕耀等管帶忠義長勝果字等營二千名由興
義縣一路進征飭委貴州候補知府李維通候補知
縣曾善權副將劉占宏翦聯陞等管帶銳字左右營
勇丁六百名由普安廳一路進征已於正月十八等
日次第拔發所需糧餉軍火因滇庫奇絀無款可籌
業飭貴州軍需局籌解接濟惟是諸軍出境誠恐號
令不齊必須文職大員前往督率以一事權查有布
政使銜雲南鹽法道沈壽榕明練老成素持大體隨

臣辦理貴州軍務多年於地利民情最爲熟悉堪以
總理營務節制諸軍臣授以機宜飭令馳往興義會
合黔省官軍妥商辦理其鹽法道印務札委糧儲道
韓錦雲暫行兼辦臣與雲南撫臣岑毓英貴州撫臣
曾璧光往返函商意見相同除分別移行遵照外所
有官軍出境會剿興義賊匪緣由謹專摺由驛馳陳
伏乞

皇太后

皇上聖鑒訓示謹

奏

A large rectangular frame containing ten vertical lines, resembling a blank ledger page. The lines are evenly spaced and run from the top to the bottom of the frame. The frame is defined by a thick black border.

Handwritten text on the right margin, possibly a page number or reference code, oriented vertically.

Handwritten mark or symbol on the right margin.

奏陳官軍攻克永平雲南兩城及曲洞漾濞等處賊

巢摺子

同治十一年四月

奏爲官軍攻克永平雲南兩縣城池及曲洞漾濞等處
賊巢恭摺仰祈

聖鑒事竊

臣

等前派總兵楊玉科攻取永平縣城總兵李

維述楊國發等攻取雲南縣城所有進剿獲勝疊破
賊壘情形曾經

奏報在案嗣據楊玉科稟稱自將哈殿左援賊擊敗後
永平曲洞賊勢愈熾該員激厲兵勇加勁圍攻於正
月二十四日挖成地道十二穴實以火藥同時點放

當將四面城垣全行燬平參將蔣宗漢徐聯魁都司
張潤馬中馭等由東南兩門衝入都司李應舉千總
馬士成等由西北兩門齊進知府鍾念祖府經歷趙
子驥馬伯良等分督後隊層層兜剿巷戰一晝夜擒
斬悍賊二千數百名餘賊退踞房屋猶以死力抗拒
官軍舉火焚燒無一漏網永平縣城及曲洞賊巢均
於正月二十五日全行克復惟蒙化廳屬之漾濞巡
檢地方原有回逆三千餘戶分爲上下兩街係賊老
巢與永平縣地界毘連先經分派副將段瑞梅帶兵
圍剿賊已窮蹙楊玉科於克復永平後乘勝督兵前

往併力圍攻先將鐵索大橋賊營攻燬連拔賊礮十餘座卽抵上街賊濠立營三月十一日分派參將蔣宗漢由西面渡河就上下兩街適中之地紮立連營二十餘座斷賊往來逆匪傾巢出撲俱被官軍擊敗楊玉科卽督飭段瑞梅等乘勢架梯環攻上街賊巢晝夜不退於十二日挖通賊牆上面礮樓六座官軍奔據上層逆匪猶伏下層併力死拒肉薄相當段瑞梅督率各軍蟻附而登巷戰兩日夜連破內牆木柵五六重斃匪甚多餘賊力不能支聚眾舉火自焚當官軍力攻上街之時下街賊匪屢次衝突來援經楊

玉科親督蔣宗漢等奮力擊退乘勢遂將下街附近賊礮五十餘座並龍王廟大石橋一帶賊壘一鼓蕩平四面逼巢圍攻適上街賊巢已破下街賊匪聞風潰竄官軍層層截殺擒斬殆盡漾濞上下兩街賊巢卽於三月十四日全行克復生擒逆首僞大司武器耀武及僞將軍都督等五十餘名訊明正法斬馘四千餘級此攻克永平縣城及曲洞漾濞等處賊巢大概情形也其雲南縣軍務先據李維述楊國發稟報大理蒙化順甯雲州各處逆首僞大司徒丁存星僞大司定馬成喜等糾聚死黨數千屢次竄援雲南縣

城均經官軍擊敗先後斬馘一千數百級餘賊退回
趙州又添逆首蔡廷棟蔡廷揚等逆黨合共一萬數
千名於二月初三日由南澗木古郎一帶竄出窺伺
官軍後路糧臺李維述楊國發聞報當將圍城各營
分派戰守一面馳回小橋豫備堵擊布置甫定逆匪
驟至一股竄踞馬房阮家營白石巖等邨與小橋官
軍相持一股竄踞清華洞山梁連荼多壘欲與城內
賊匪聯合屢撲官軍各營楊國發等用避銳擊惰之
法每日午後俟其困憊始行出隊擊之屢獲大勝二
月二十四等日連破白石巖清華洞一帶賊壘數

十座惟馬房阮家營之賊盤踞不動李維述等願許重賞鼓勵士卒於十五日分派四面進攻兵勇人人憤極誓死相拚當將賊壘五十餘座全行踏毀斬首二千餘級生擒五百餘名奪獲器械旗幟無算逃竄之賊復被官軍追剿沿途屍骸枕藉適臣添派助剿之游擊岑有富李飛龍等帶兵亦抵該處楊玉科又派參將徐聯魁帶兵前來助剿晝夜加力環攻將附城石礮賊壘數十座次第攻拔四面越濠立營開挖地道於四月十六日先後告成二十餘穴當卽實以火藥派定隊伍於是日戌刻同時點放霹靂連聲四

面城垣俱平李維述督率徐聯魁劉興等由東門衝入楊國發督同張宗久等由西門擁進李維通張仕進岑有富等由南北兩門齊入分股巷戰斃賊甚多逆等退入縣署及禮拜寺內以死抗拒官軍圍攻多時挖牆而入逆首馬天寶馬萬興郝安邦及賊黨多名悉被殲擒撲火跳井死者無算雲南縣城內外業已肅清各等情具報前來臣等伏查永平雲南兩縣爲大理前後門戶被賊占踞十有七年逆等防備最嚴救援甚力而曲洞濠溝兩處均係逆賊老巢異常堅固此次楊玉科李維述楊國發等督兵分投進剿

當糧餉兩缺之際能以大義激勵各軍奮勉出力次第攻拔堅城克復老巢所有兇悍賊匪殲除殆盡實足以伸

天討而快人心惟所克復地方均距大理甚近年來苦戰日久兵民交困尤宜布置穩妥臣毓英將迤南軍務趕辦肅清卽赴迤西督同楊玉科李維述楊國發等分別妥籌辦理仍一面酌派新軍先往協同防守將疲憊民兵換回休息以紓民力各處出力員弁咨俟臣等查明另行具

奏仰懇

恩施其打仗陣亡之副將銜補用參將李棟材梅洪順游擊銜補用都司姜廷相都司銜補用守備張宗仁姜潤芝張有恆李愛清守備銜補用千總李文元梁鴻貴補用千總楊福順補用把總楊郁文苟方正楊崇興艾紹南五品頂戴補用把總陳青龍楊鳳山楊棟勳和玉華梅有貴知州銜補用州同李華桂試用府經歷唐秉吉在營遭故之六品銜選用從九品戴超賢等均堪憫惻相應請

旨飭部分別從優議卹以慰忠魂所有官軍攻克永平雲南兩縣城池及曲洞濠溝等處賊巢緣由理合恭摺

馳陳伏乞

皇太后

皇上聖鑒訓示謹

奏

會奏滇省軍務得手需餉孔急請

旨飭催各省協餉摺子

並附呈各省欠解滇餉銀兩數目清單同治十一年八月

奏爲滇省軍務得手需餉孔急請

旨飭催各省協餉以濟要需恭摺仰祈

聖鑒事

竊臣

等於上年六月因軍餉奇絀復遇水災情形

危急曾將各省欠解協餉開單具奏欽奉

諭旨著各該督撫督飭藩司將前欠滇餉無論何款趕緊
先解一半其廣東江蘇新撥每月協餉各壹萬兩未經
起解並著飭司迅速撥解嗣後各該省應解協餉仍當
源源接濟毋得稍涉推委等因欽此欽遵在案迄今一

年之久不惟舊欠餉銀各省俱未起解卽按月應撥協餉只江西一省撥解過半其餘各省所解均不及三分之一計自上年六月起至本年五月底止四川省解到銀十萬兩湖北省解到銀二萬八千六百零六兩廣東省解到銀四萬兩江蘇省解到銀三萬兩浙江省解到銀六萬兩江西省解到銀十三萬八千二百一十餘兩通共僅收到銀三十九萬六千八百數十兩欠解之數甚鉅以致左支右絀萬分掣肘現雖東南兩迤軍務次第肅清迤南克復多城俱兵燹之餘民力凋敝辦理善後各事分撥留防兵勇需用

更覺浩繁而杜逆久踞大理且有順甯騰越雲州名
處城池尙未克復根深蒂固未易殄滅刻下官軍雲
集分投進剿掃穴擒渠在此一舉若協餉仍前疲滯
稍有貽誤關繫匪輕伏思各督撫

臣仰體

朝廷軫念邊陲莫不顧持大局而滇省軍饑民困亦各省
所盡知當不致意存膜視但未將應解滇餉劃定有
著之款按月撥解每至臨時酌籌或不免先彼後此
遂致兼顧難周迨積數月之久始獲撥解一次杯水
車薪萬難分潤當此播巢喫緊需餉孔急之際若不
另籌長策屢次奏瀆

聖聰亦覺有失體制據軍需局司道宋延春等會詳前來
除將各省欠解餉銀數目繕具清單恭呈

御覽外合無仰懇

天恩飭下四川湖北浙江廣東江蘇江西各督撫臣於此

次奉

旨飭催後務將每月應解滇餉在於各該省釐金稅課有
著款項按月如數劃存發交滇省坐催協餉委員源
源匯解來滇俾濟急用如有原撥餉銀爲數較多未
能全數籌撥究竟能撥若干亦宜劃定實數一面即
行起解一面迅速

奏明其不敷之數或改撥別省有著之款或仍飭該省
添撥足數應由部臣核明辦理其四川一省距滇最
近尤賴緩急相通查該省每月籌解貴州提臣周達
武軍餉銀五萬八千兩係由川東釐金局就近撥解
並無蒂欠滇省事同一律所有川省每月應解協滇
餉銀三萬兩擬請亦由川東釐金項下按月劃扣存
局交重慶轉運滇餉委員吳寶森就近催提解滇務
期餉如時至庶得激勵士卒早竟全功至協濟滇餉
之各省督撫藩司既有督催籌解之責儻能籌解無
誤俟全滇軍務肅清應否隨摺聲明候

旨施恩之處出自

逾格鴻慈

臣

等未敢擅便所有滇省軍務得手需餉孔急

情形謹合詞恭摺具陳伏乞

皇太后

皇上聖鑒訓示謹

奏

同治十一年九月二十九日准

兵部火票遞回原摺後開

軍機大臣奉

旨另有旨欽此又准

軍機大臣片開

貴督撫具奏請催各省協餉一摺已奉有寄信

諭旨令廣東等省督撫按照單開各數撥解矣爲此知會

This image shows a blank ledger page with 11 vertical columns. On the right side, there is a header section with several rows of text, which is partially obscured and difficult to read. The page is otherwise empty of any data or markings.

謹將四川湖北浙江廣東江蘇江西湖南等省欠解
協漢軍餉銀兩數目繕具清單恭呈

御覽

計開

四川省每月協漢餉銀三萬兩自同治十年六月起
至十一年五月底止共應撥銀三十六萬兩

已解到銀十萬兩

欠解銀二十六萬兩

連舊欠銀六十萬兩共欠解銀八十六萬兩

湖北省每月協漢餉銀二萬兩自同治十年六月起

至十一年五月底止共應撥銀二十四萬兩

已解到銀二萬八千六百零六兩

欠解銀二十一萬一千三百九十四兩

連舊欠銀四十五萬兩共欠解銀六十六萬二千

三百九十四兩

浙江省每月協滇餉銀三萬一千六百六十兩零自

同治十年六月起至十一年五月底止共應撥銀

三十七萬九千九百二十餘兩

已解到銀六萬兩

欠解銀三十一萬九千九百二十餘兩

連舊欠銀七十三萬三千一百六十兩零共欠解銀一百零五萬三千八十餘兩

廣東省每月協濟餉銀一萬兩自同治十年二月起至十一年五月底止共應撥銀十六萬兩

已解到銀四萬兩

欠解銀十二萬兩

江蘇省每月協濟餉銀一萬兩自同治十年二月起至十一年五月底止共應撥銀十六萬兩

已解到銀三萬兩

欠解銀十三萬兩

江西省每月協濟餉銀二萬兩自同治十年六月起
至十一年五月底止共應撥銀二十四萬兩

已解到銀十三萬八千二百一十七兩七錢零

欠解銀十萬一千七百八十二兩二錢九分零

連舊欠銀二十六萬一千三百四十六兩共欠銀

銀三十六萬三千一百二十八兩零

湖南省舊欠協濟餉銀四十二萬兩未經起解

會奏官軍剿除館驛踞匪東南兩迤肅清遵保出力

員弁摺子

同治十一年十月

奏爲官軍剿除館驛踞匪今積年踞匪擒斬首要各逆東
南兩迤地方一律肅清遵

旨保獎出力人員恭摺仰祈

聖鑒事竊查滇省迤東迤南各屬地方自上年官軍攻克
激江府城並蕩平竹園江那威法茂克裸多驛各賊
巢後尙有臨安府屬之館驛踞匪田心東溝邱北縣
屬之曰者鄉五處賊巢未平均距省不遠必須先行
剿滅西征大理方無內顧之憂

臣

等前通籌全局

江蘇通志 卷之九
奏明由 臣 毓英出省督辦分道進剿遵拔田心曰者鄉
各賊巢並掃除館驛城外及五山一帶賊營力破四
門進紮城中疊次陳

奏在案查東南各屬著名逆首係馬世德馬敏功納善
馬萬四名馬世德占踞田心於官軍破巢時舉火自
焚前經查明

奏報馬敏功納善馬萬等各股悍賊麀聚館驛自官軍
將四面城垣攻破該逆填街塞巷掘地爲營死力抗
拒官軍層層擠紮或用火藥轟擊屋瓦皆飛或由地
道穿通短兵相接半年之久尺取寸收將城內房屋

奪據過半強悍賊匪斬擒殆盡逆首馬敏功等率領
餘黨踞守核心糧米軍火俱已缺乏被脅難民紛紛
逃出環泣求撫又據存省籍隸建水縣各回員公稟
家屬被陷賊中懇請拯救等情不能不設法保全分
別良莠仰副

朝廷除暴安良至意當卽密授鶴麗鎮總兵馬忠總兵何
秀林吳永安等機宜示諭各脅從共擒首逆立功贖
罪眾皆樂從而逆首防備甚嚴無隙可乘未能得手
迨至九月二十三夜該總兵等挑兵埋伏詐撤先鋒
各營以誘之逆首馬敏功納善果乘間衝逃伏兵四

起併力兜圍當卽擒獲發交營務處迤南道蔡錦青
禁錮檄飭臬司程誠由省委候補知府廣潤前來審
訊取具確供於十月初三日押赴海通縣城外正法
示眾以彰

天討而快人心至馬萬一犯據馬敏功納善供稱先於七
月內病死查驗屬實其次賊目馬國政納金受黃國
元納友馬禾馬連有馬雙喜金勻得馬志興馬來春
田玉春金士元馬貴陽馬香等均已按名殲除先後
救出各處難民計男婦老幼共五千餘丁口賁成鶴
麗鎮總兵馬忠分投安置各歸各業原住館驛城內

各戶亦飭概行遷出分住回民邨寨並將善後事宜妥籌辦理以期長治久安總兵張保和參將趙發等進攻瀟弓於本年六月將四面邨寨賊營碉樓百餘座全行掃除陣斬逆首馬紅平殺斃匪黨千餘人直抵馬街賊巢圍攻兩月奪據外層牆濠匪等力不能支哀詞求撫經張保和具稟請示臣等示以殲厥渠魁脅從罔治該總兵卽轉諭一切眾回夷遂於九月十六日斬獻逆首馬美開門迎降守備張繼聲等勒兵進紮馬街將賊目李正春馬登金付陣李中搜擒訊明正法查點投城回夷男婦老幼共計二千餘丁

口原籍均有業可歸張保和會同甯州知州鄧家榮
陸續遣撤完竣已將原住漢民招安歸業等情稟報
前來臣等伏查滇南之變自臨安而開賊勢之強以
館驛爲最計省垣初次被困卽由館驛糾眾尋仇實
爲倡亂之首勝後流毒之深將及廿載殺戮之慘殆
遍三迤該逆首自揣罪大惡極必爲法所不宥故雖
城破巢傾糧空食缺猶復穴地而處巷戰相持希冀
館驛之師牽制一時則大理之圍稍鬆一日此數月
以來所爲以死相拒之實在情形也幸賴

天威士卒用命當夏秋之際不避煙瘴不計死亾卒能掃

穴擒渠全功克竟東南兩迤地方現已一律肅清前
奉

諭旨攻克田心等處出力各員俟館驛全城克復准由臣
等擇尤保獎仰見

聖主激勵戎行微勞必錄欽感莫名今館驛全城克復謹
將迤東迤南各路軍營尤爲出力員弁繕具清單恭
呈

御覽願懇

恩施內有請獎稍優實係疊次出力併案獎勵出自
逾格鴻慈其應請以把總外委拔補各弁及軍功虛銜項

戴均由臣等另行咨部註冊各路打仗陣亡之副將
銜補用游擊趙廷雲游擊銜守備畢萬春守備銜千
總李能周榮昌梁文才千總李得勝胡發李湘源母
有福熊文興把總尹朝相劉恩榮王士忠李增旺李
恆忠王殷李發何起相余耀光朱朝貴楊魯同王洪
順王捷青范瀛劉發國楊興發普天章六品頂戴外
委張貴林唐貴榮張林李自有張雲王永順張連蘇
得俊王天佑夏洪發邵文英繆承逸楊海順劉祺楨
李春唐福姜占雄何天發吳得亮侯王生楊其光內
獎六品軍功張恆張雲才汪沛外獎記名拔補把總

梁澤瑞韋彩安馬樹達李含玉董毓之汪現龍陳鶴
林井朝綱從九品職銜王安字立功後在營瘴故之
都司銜補用守備王家麒石美正楊潤都司職銜李
三麟守備陳恩培守備銜千總謝廷雲羅金林千總
梁誠美馬登雲把總張國富龐廷廣覃紹明吳岐山
杜保明莫慶泗杜理朝廖榮李暹外委王桂生李榮
楊正才尹金堂譚士益張志成楊天順鄒雲勝楊國
安韓天順羅得明盧應樸升用知府補用同知直隸
州尉遲品玉試用同知張家銘建水縣知縣倪銓補
用府經歷宋紹蘇杉木河巡檢呂蘊輝候選府經歷

王孟岐州同銜試用巡檢邱爾循州同銜補用從九品邱寶成候選從九品岑鳳昌孫有材張開棟縣丞職銜邵鍾貢生吳允馥擬保從九品蔡應祥均堪憫惻仰懇

天恩飭部從優議卹以慰忠魂所有官軍剿除館驛溲合積年踞匪擒斬首要各逆東南兩迤地方一律肅清遵保出力員弁各緣由謹合詞恭摺由驛馳陳伏乞

皇太后

皇上聖鑒訓示謹

奏

會奏彙報第四次查明陣亡官弁兵勇殉難紳民婦

女請

分別旌卹摺子

並附呈清單三件
同治十一年十月

奏爲彙報第四次查明陣亡官弁兵勇殉難紳民婦女

請

旨分別旌卹恭摺仰祈

聖鑒事竊照滇省

奏請設立採訪忠義局派委司道督同委員紳士經理

業將第一第二第三次查明請卹官紳兵民先後具

奏在案茲據該局司道宋延春等將第四次查明各屬

陣亾殉難之訓導楊碩臣外委段上文及兵勇紳民
婦女人等共二千五百四十四員名丁口呈請具奏
前來臣等覆加查核該員楊碩臣等或臨陣捐軀或
見危授命或積勞殞命或懼辱完貞均屬深明大義
忠烈可憫相應繕具簡明清單恭呈

御覽仰懇

天恩飭部分別旌卹以勵忠貞而彰節義除將報到清冊
咨部核辦仍飭該局司道詳加確訪俟續報到日再
行彙奏外所有滇省採訪忠義局第四次查明請卹
緣由謹合詞恭摺具

奏伏乞

皇太后

皇上聖鑒訓示謹

奏

軍機大臣奉

旨楊碩臣等均著照所請交部分別旌卹單三件併發欽

此

天
地
人
三
才
圖



天

謹將雲南採訪忠義局第四次查明節年陣亡殉難
被戕瘡故文職銜名繕具簡明清單恭呈

御覽

計開

陣亡文職銜名

前任昆陽州訓導楊碩臣

前任阿迷州學正俞膺詒

元謀縣教諭劉溱

畱滇補用同知直隸州署巧家同知張錫璜

以上四員均臨難不避力戰陣亡忠烈可憫請

照例從優議卹

殉難文職銜名

原任昆明縣教諭蔡宗城

以上一員臨陣捐軀情殊可憫請照例議卹

被戕文職銜名

署龍陵同知事鶴慶州知州秦炳章

新授南甯縣教諭陳高捷

以上二員均臨難不避慘被戕害請照例議卹

傷亾文職銜名

儘先升用府經歷縣丞署猛統巡檢王祝三

候補從九品汪霖生

以上二員因傷亾故均請照例議卹

軍營病故文職銜名

開復畱滇補用知縣署阿迷州知州榮光

以上一員請照軍營立一等功後積勞病故例

議卹

2000

1000

1000

謹將雲南採訪忠義局第四次查明節年陣亡被戕
瘡故武職銜名繕具簡明清單恭呈

御覽

計開

陣亡武職銜名

開化鎮中營左哨外委千總段上文

拔補開化鎮右營左哨二司把總王正舉

臨元鎮中營左哨千總陳文元

臨元鎮中營守備車國才

藍翎補用把總游太平

臨元鎮中營左哨二司把總兼署左營守備全鶴
鳴

大理城守營世襲恩騎尉劉光增前署永北營參
將順雲協右營守備梅萬年

擬保五品頂翎儘先把總署劍川營千總徐兆麟
外委姚長年

儘先補用把總余飛龍

藍翎守備銜儘先補用千總趙聯

六品頂戴儘先拔補外委楊兆

拔補外委張升 陳洪

都司銜補用守備維西協右營千總余彭壽

以上陣亡武職員弁共十六員請各照本職從

優議卹

被戕武職銜名

五品頂戴藍翎補用千總唐得勝

以上被戕武職一員請照本職議卹

軍營瘴故武職銜名

永善縣屬阿興檜溪土千戶兼襲恩騎尉安瑞圖

藍翎儘先守備鶴麗鎮右營外委徐佑

以上瘴故武職二員請照例議卹

--	--	--	--	--	--	--	--	--	--

Emil Andresen

C. 10

10.

謹將雲南採訪忠義局第四次查明陣亡殉難被戕
遇害傷亡病故兵練紳民婦女分別繕具簡明清
單恭呈

御覽

計開

兵丁項下

陣亡各標鎮協營馬步戰守兵丁王春等六十四
名

殉難兵丁韓有龍等八十五名

被戕遇害兵丁李位等十二名

傷亾兵丁段長生等二名

瘴故兵丁朱寅等八名

以上通共陣亾殉難被戕遇害及傷亾瘴故馬
步戰守兵丁一百七十一名均請分別照例

議卹

練丁項下

陣亾練目練丁潘德等六百三十四名

殉難練丁陳鳳等二十四名

被戕遇害練目練丁聶紹仁等六名

傷亾練丁陳有亮等八名

瘴故練目練丁湯應順等二十一名

以上通共陣傷亾故被戕瘴故練目練丁六百九十三名均請分別照例議卹

紳士民人婦女項下

陣亾紳士李定邦等九十一員名

殉難紳士魏象和等二百二十二名

被戕遇害紳士崔蘭等五十二名

軍營病故紳士李玉樹一名

陣亾民人金家駒等一百零二名

殉難民人魏大勳等三百七十二名

被戕遇害民人金騰魁等四百八十九名

殉難婦女魏李氏等及幼小子女共三百一十七

口

被戕遇害婦女金李氏等五口

以上陣亡殉難被戕遇害病故紳士民人婦女

及幼小子女一千六百五十一名口均請分

別照例旌卹

會奏候選同知陳泰琨報効軍火捐資帶勇到滇並
隨剿出力懇

恩賞免選本班以知府加道銜畱滇片子

再候選同知陳泰琨前遣抱家丁赴都察院衙門以
捐購軍火赴營投効等詞呈請代奏欽奉

上諭該同知以情殷報効購備軍火欲赴軍營効力其志
尙屬可嘉但所稱寄存上海各軍火是否實有其事著
馬新貽丁日昌確切查明如果所稱軍火等項實已購
備卽著給咨飭令該同知攜帶軍火迅赴雲南聽候劉
嶽昭岑毓英差遣等因欽此當經前兩江督

臣馬

等查明該同知所購花旗新樣馬鎗三十桿子母藥
六千出七門手鎗一百桿銅帽子藥一萬出步兵鎗
四百桿大號金花銅帽十萬顆洋火藥二千斤均尙
可用

奏明給咨運赴滇省該同知因路途遙遠運費浩繁回
廣東原籍措資盤運並自備資斧招募粵勇二百名
護解軍火各物於同治十一年七月初五日到滇交
軍需局司道驗收卽帶勇到臣毓英軍營隨同剿除
館驛餘匪尤爲出力所交軍火洋鎗子藥等物據軍
需局司道如數收訖詳報前來臣等查候選同知陳

秦琨報効軍火捐資帶勇到滇所費不資復隨營剿
匪出力尙屬奮勉有爲該同知係奉

旨發往雲南差遣之員可否仰懇

天恩賞准免選本班以知府畱於雲南儘先補用並
賞加道銜以昭激勸出自

逾格鴻施謹合詞附片具陳伏乞

聖鑒訓示謹

奏

同治十一年十月十二日奏十二月十二日奉

旨另有旨欽此同日准 兵部火票遞到同治十一年十

一月初十日內閣奉

上諭同知陳泰琨著免選本班以知府留於雲南儘先補用並賞加道銜該部知道欽此

會奏克復大理逆首伏誅全郡肅清摺子

同治十一年十二月

奏爲克復大理府城逆首伏誅羣酋盡滅全郡一律肅

清恭摺仰祈

聖鑒事竊

臣毓英遵

旨進攻大理於同治十一年十一月二十七日會將帶兵
行抵鎮南日期頭隊官軍進紮下關相機接應及各
路打仗情形

奏報在案

片

拜摺後卽日兼程前進沿途接據提督楊

玉科及續派助剿各員弁稟報自十一月初十一
等日官軍由地道轟陷東南城隅直從缺口衝入因

裏面建有土城城角環築柵樓城濠週圍木柵乘銳
攻之礮石如雨損傷精銳甚多楊玉科傷痕未愈仍
負創臨敵一面督軍力紮缺口以攻其前一向向土
城下開挖地道以通其內十四日地道告成十數穴
引火施放牆垣傾壓瓦石飛空計轟陷之土城約百
餘丈官軍乘勢擁入賊匪排比如鱗左右衝突互有
損傷游擊周作祥臨陣退縮卽斬以徇自此人人用
命銳莫可遏晝夜鏖戰至十七日共計斃賊二千餘
人將城內校場蓮花池一帶賊營概行奪據惟西北
半城尙爲賊踞且土城內又有僞禁城一道卽杜逆

僭造僞府之地凡心腹逆黨及慣戰回眾悉衛其中
官軍屢次乘夜梯攻急切難下此攻入東南兩層外
城之情形也楊玉科窺察形勢度從東南面逼攻愈
緊則逆等之蟻聚愈眾不如四面合擊約時並進使
賊首尾不能相顧其勢既分其力必單適於二十日
新軍已趕到五千餘人當派撥分路齊進以副將徐
聯魁所部及都司趙竊斗董良弼范桂興守備趙欽
徐成林千總董正性孫毓等軍攻其正東以游擊李
蔭舉張潤守備姚綱千總木逢春馬遇春王珍等軍
攻其正西以副將蔣宗漢蔡標游擊陸純剛彭子祥

都司寇文通馬士成守備董雲慶彭子興千總龔聯
元周慶安楊發貴魯達等軍攻其正南以總兵段瑞
梅都司和述廷劉全忠千總雷耀龍李占魁把總魯
國棟李自新段文昇趙時義等軍攻其正北四面之
外又以游擊李朝相許士坤黃才廣覃修綱都司馬
應麟農得勝知府陳泰琨守備楊志光等軍分攻四
隅楊玉科率領副將和耀會都司楊建勳知縣馬驥
良趙子驥劉尙中守備黃河洲奚長清楊發科邵洪
盛州判李光裕縣丞劉紫綬千總胡德成李舒錦馬
雙元李春盛單玉林馬從泰戴盈照等各營中軍親

兵分馳策應結成圓陣面面相聯又飭參將雷應山
一營官兵將此次運到開花大礮二十位排列城上
晝夜環擊所有賊營棚樓木柵攻毀大半礮石擊入
內城守陣之賊逐日傷亾杜逆見事勢危迫於二十
五日巳刻親率死黨萬餘由僞禁城衝出接仗楊玉
科督軍迎敵戰至二十六日衛明不能撤隊而四面
官軍偵知杜逆出戰均各帶勁旅兜剿前來更番疊
戰屍骸枕藉血流成渠斃賊約五六千眾杜逆敗潰
入城閉門死守正在逼攻之際有衰邁老回數十人
鼻杜逆出城泣稱該逆自敗回後勢窮情急已率同

家屬服毒自盡其逆黨僞大司衡楊榮僞大經畧蔡廷棟僞大冢宰馬仲山等趁杜逆服毒尙未氣絕遣令該回等獻解來營並將僞帥印僞衣冠一同呈繳情願求撫等情楊玉科見杜逆嘔吐不言已將氣絕再延時刻反逃顯戮當就軍前正法割取首級同僞印僞衣冠解呈查驗並將可否准其就撫之處請示前來此杜逆出戰敗後授首之情形也臣毓英行抵紅巖地方接據稟報時祇踞大理府一百二十里當卽馳赴五里橋駐紮於初四日親往城外週圍巡視見西北兩面城中賊營賊礮十分堅固又密探得內

城之賊填街塞巷壘石修垣當卽嚴訊出降老回馬
大鵬等據供杜逆子女俱匿寄楊蔡二逆家中並無
全家自盡之事窺其言語支吾恐係詐降緩兵况蔡
廷棟前次圍省被獲業經奏明交提臣馬如龍嚴加
管束立功贖罪旋復逃回大理貽害又已三年是其
怙惡罔悛非恩義所能化導臣毓英商飭楊玉科督
令各營慎密防備並傳諭城內各回如果傾心投誠
予限三日騰城繳械並趕造丁口清冊呈報以憑遣
散歸業乃於限滿後概未遵辦再三開導祇許署木
和縣知縣譚席珍及一二武員帶兵二百名進城安

撫俟半年後人心大定方能騰城歸業等語其奸謀已顯而易見臣等熟思兵法謂上兵伐謀其下攻城又兵貴速不貴久該逆等既以詐來不如卽以智取遂密商各將領擬派員挑帶敢死之士二百人暗帶乾糧短械同譚席珍進城安撫借查看僞帥府爲名混入僞禁城奪據要隘有險可憑內外夾擊或可得手惟膺斯任者必得謀勇兼優方能隨機應變遍詢各將領都有難色惟楊玉科以受

國深恩誓以死報毅然肩任忠勇之氣形於辭色臣等以

此舉成敗所關更須妥爲布置當密派段瑞梅徐騰

魁等軍伏於東城先鋒各營蔣宗漢蔡標等軍伏於
南城大營又派和耀曾李蔭舉陸純剛范桂興和述
□劉全忠彭子祥馬士成等軍伏於西北二門此外
上下兩關及沿海各要隘早經分派范清劉步龍馬
中馭趙騫斗董良弼趙欽徐成林岑應麟李德濺陳
發科王用梅游輔廷等嚴密防守後楊玉科卽照議
定機宜傳諭城中回眾准於十二月初七日協同署
太和縣譚席珍入城安撫該逆等以三百人爲數無
多遂行允許楊玉科正在嚴整戎裝將次入城適有
良回馬德良李瑞年出城密告以蔡廷棟楊榮等先

已埋伏地礮在楊榮家中外面佯爲粉飾公館宜豫
先防備免中奸計等語楊玉科得此密報厚賞該回
仍飭旋城密探卽與譚席珍入城直到太和縣署駐
紮該逆等屢請移住楊榮家中均借辭推諉佯爲不
知其詐追查探城內虛實的確後定期密稟前來
卽密諭各將領豫備接應初九日巳刻楊玉科由縣
署濶入僞府喝令兵勇占據僞府之礮樓賊眾驚亂
遂出悍賊四五百人層層圍攻幸僞府牆垣堅厚樓
閣崇高居上擊下最爲得勢不致爲賊所乘其時四
面伏兵一聞號礮無不爭先恐後併力衝鋒因該逆

死守偽禁城各門官兵不能聯絡戰至日暮廿親督各軍乘夜四面架梯登城楊玉科亦由偽府揮兵夾擊立將偽禁城南城樓奪據內外聯絡輪班血戰至初十日官軍傷亾以千計而賊之死者已萬餘人該逆見勢不能支於十一日黎明舉火自焚分股由東南北三門奪路狂奔東門一股直奔海邊意欲奪船而渡經段瑞梅同徐聯魁等軍跟踪追殺共斃逆黨五百餘人撲海死者不計其數生擒偽大冢宰馬仲山偽參謀馬遇春段惺惺偽左輔楊彩元偽將軍撤登科馬芋偽兵馬司馬平川偽中郎將馬文彩偽參

軍馬紹榮等八十九名北門一股逃往上關經守關之范清馬中馭董良弼等扼住關口不能衝過回窟喜洲又被派駐該處之趙騫斗趙欽徐成林魯國棟各營攔路截殺李蔭舉和述廷張潤劉全忠趙時義等由後追至兩面合圍將三千餘賊殲除淨盡生擒一百二十一名僞大司衡楊榮僞三元帥楊占鶴僞大都督劉貴馬增榮僞右弼馬國臣僞參謀馬崑山亦被擒獲其南門一股衝至五里橋意圖闖出下關經臣毓英督飭岑寬德覃修綱黃才廣李朝相羅均德王永齡錢汝清等各營伏兵兜剿蔡標和耀會由

城內追出四面圍殺生擒僞大經畧蔡廷棟僞大司
旗馬國璽僞左將軍劉名揚僞參軍蔡文英馬貞吉
及酋目一百三十五名殺斃一千數百名及追至下
關又經守關之岑應麟李德濊王用梅游輔廷等擒
斬三百餘名撲水死者千餘名次日駐防趙州之黃
章李錦標等復搜獲逸匪馬爲駿等七十三名楊玉
科肅清城內將火救熄後果從楊榮家內挖出地礮
火藥三千斤並由蔡廷棟馬國璽住宅搜出杜逆幼
子三人幼女一人解送臣營驗明長子名宗揚年
十三歲次子名廣揚年十一歲三子名成揚年九歲

幼女年三歲均發交署太和縣知縣譚席珍審訊據
供杜逆服毒自盡實係情急子女託寄蔡馬各逆實
爲搆遁起見訊明後同杜逆首級委員解省交按察
司程誠分別收禁其杜逆之子如何處治該逆首級
應否獻馘恭候

諭旨飭遵其擒獲之逆曾楊榮蔡廷棟馬仲山馬國璽等
經隨營之署迤西道顏培高督同發審委員覆鞠僉
供於咸豐丙辰年與偽帥杜汶秀謀逆曾攻破城池
多處戕害文武官員並圍攻省城妄圖大業各等情
實屬罪大惡極卽於軍前凌遲處死傳首被害地方

以昭炯戒共救出城內老弱婦女四千餘人分別安置統計大理一役將弁士卒先後傷亾者六千餘人而賊數萬之眾或死於出戰或死於守城或死於火焚或死於水溺兇酋悍黨悉數殲除此官軍攻入內城肅清全郡之情形也臣等查杜逆倡亂以來流毒一十入載攻陷五十三城西擾及四川會理等州東竄踞貴州興義各屬蓄髮變服鑄印設官僞造禁城僭規王制其逞志於滇省者直欲追蹤金陵之洪逆而並駕一時當年占踞迤西不過區區一隅何致如火燎原不可撓邇實錄大理天生奇險以上下兩關

爲鎖鑰蒼山洱海爲藩籬唐宋之際蒙段割據五百
餘年李密之師下關覆軍二十餘萬卽以時事而論
凡西征者四次迄無成功咸豐六年提臣文祥調川
兵助剿克紅巖圖寶居而東南各處回眾圍省退兵
回援則彌渡雲縣由此失矣九年署提臣褚克昌克
鸚鵡關雲南驛等處正可乘勝進取而館驛激江回
眾攻陷廣通楚雄鎮南以襲其後則褚克昌之全軍
覆沒矣同治二年臣在署藩司任內連拔景東鎮沅
永北楚雄廣通定遠進規鎮南而馬聯升馬榮率霑
益尋甸之眾占踞曲靖馬龍平彝撤兵回顧則大理

之役遂不果矣六年提臣馬如龍甫至定遠前軍失利而合輜安楊振鵬等內外勾結連失定遠楚雄以次二十城則省圍幾莫解矣推原其故皆由東南黨援未除則迤西寇氛愈熾故先從各路征剿克曲靖而東隅固解省圍而內患清復激江而近地甯平臨安而南徼定由此內顧無憂遠圖易舉臣等所以先事東南而後專事迤西者職是故也第念臣等猥以庸材忝膺重寄深虞賊情負固師久易疲雖前派之軍已百戰而俱捷恐積年之患非一朝所能平尤有慮者各省之協餉稽遲滇軍之奇窮尤甚計自同治

八年奏奉

諭旨每月撥給滇餉銀十二萬一千六百餘兩迄今四年
所得不及三分之一臣毓英此次帶兵出省僅由軍
需局司道湊獲銀一萬五千兩率爾進兵而楊玉科
統軍數萬之眾鏖戰三年之久積欠鹽菜賞需爲數
亦鉅百計籌畫焦急如焚幸將士和衷始終用命不
以師勞日久稍有懈心不以餉匱軍饑微萌退志更
不以巢堅賊悍視爲畏途卒能一鼓蕩平殲除元惡
是皆仰賴

朝廷德威遠播

聖武布昭靖邊境之干戈登斯民於衽席臣欽承

謨訓幸免愆尤惟有矢勤矢慎趕將應辦善後事宜妥爲

區畫務使全滇災黎重享

昇平之福庶仰答

天恩於萬一至此次攻克大理殲厥渠魁臣等分所應爲

不敢妄邀獎敘惟賞穿黃馬掛記名提督開化鎮總

兵瑚松額巴圖魯楊玉科連年血戰克復多城實屬

謀勇兼優力當艱鉅應如何

加恩破格優獎之處出自

格外鴻慈在事尤爲出力員弁兵勇謹擇尤開具清單懇

懇

恩施俾資鼓勵其餘出力文武及各路籌辦糧餉人員容

臣等續查明確再行請獎各路打戰陣亡之都司銜

補用守備李正昌補用千總木映芳楊建李芳林段

得才李鴻才鍾成鳳補用把總謝香廷趙時傑和文

饒青雲蕭汝霖楊儀韓有才薛正邦和本善馬鏡星

倪成仙李春華記保千總周文彩蘇顯達李有惠劉

永泰洪長保楊世興張秉義杜金玉趙福祿馮昌力

福壽姜義得姜毓華魯得華李春施尹才胡先覺任

正道李中珠沙錦溢姜如龍張瑞譚開科莫貴賢劉

坤董潤生李品元寸潤榮洪步戎楊沛廷李得才楊
沛王喜萬得生沈占春牟友周升段正邦段文壽趙
滿李培趙義趙松盛余龍李發貴段福保孫之李發
桂魯國祚李長福和學文范三李金和增茶祿蔡德
昌尤之元袁中山趙阿發蒯尙德張文星商林周文
秀李茂林王占標李洪順杞洪張先發牛曉曙彭子
龍藍金榜倪雲龍陳仕高張洪高趙鵬章何仕賢尙
聯陞楊萬勝傷亾之副將銜補用參府涂秀清都司
銜補用守備子品高補用千總趙春山等均屬可憫
相應請

旨飭部從優議卹以慰忠魂此次繳到杜逆自用赤金偽
帥印壹顆偽衣冠拾件及逆酋蔡廷棟金包銀偽經
畧印壹顆謹封送軍機處恭呈

御覽所有克復大理府城首逆伏誅羣酋盡滅全郡肅清
緣由謹合詞繕摺由驛六百里馳陳伏乞

皇太后

皇上聖鑒訓示謹

奏

會覆遊

旨查明迤西已復未復城池各情並辦理善後整飭捕務
片子

再臣等正拜摺聞承准軍機大臣字寄同治十一年
十一月初十日奉

上諭滇省賊擾多年現在迤東迤南肅清省西府州縣城
未復者尙有幾處已復各城尙有餘匪滋擾者又幾處
著劉嶽昭岑毓英詳細查明據實具奏一面慎選賢能
守令將已復地方善後事宜實力興辦並整飭捕務嚴
查奸宄以靖地方等因欽此仰見

聖主軫念邊陲無微不至伏查邈西各府廳州縣自同治八年至今先後克復楚雄麗江永昌永北蒙化彌渡龍陵威遠緬甯廣通南安定遠大姚姚州鎮南永平鶴慶劍川賓川雲龍鄧川趙州浪穹雲南縣共二十四處城池所有著名賊巢如寶居漾濞曲洞以及賊匪盤踞之邨寨均已一律蕩平每克復一城一邑臣等均督飭該將領搜捕餘匪後仍畱兵駐防隨時查拿並飭地方文武官到任招撫流亾妥爲整頓不准粉飾了事現在大理府城亦經克復首逆羣酋殲除盡淨其未復地方僅有順甯府城雲州城及所屬之

小猛統猛郎錫臘又騰越廳城及所屬之烏土寨馬家邨並蒙化廳屬之大小圍埂共計府廳州城池三處賊巢六處此外均已一律肅清並無餘匪滋擾應辦善後事宜臣等謹遵

聖訓慎選賢能守令實力興辦整飭捕務嚴查奸宄不敢因循粉飾貽誤邊陲臣毓英將大理善後籌辦周妥卽督同楊玉科等合剿圍埂賊巢至騰越係總兵李維述實缺應飭該員帶領所部前往辦理以專責成惟順甯雲州兩城提臣馬如龍以餉缺尙未出省所派之頭隊官兵爲數無多難敷分布亟應乘勝迅圖

掃蕩免致患貽養癰臣毓英擬就近分軍相機規取
以期全省廓清仰副

朝廷綏靖邊疆之至意所有遵

旨查明各情謹合詞附片具陳伏乞

聖鑒訓示謹

奏

滇黔奏議卷十

湘鄉劉嶽昭蓋臣著

男錫楚謹編

會奏查明雲南銅廠實在情形請另籌撥工本以資

採辦摺子 同治十二年三月

奏爲查明雲南各銅廠實在情形請

旨飭部籌撥工本以資採辦恭摺仰祈

聖鑒事竊 臣准戶部咨議覆都察院奏雲南補用知府徐

承勳呈請採辦滇銅一摺請

旨飭下雲南督撫確切查明各廠實在情形銅斤應如何

開採究竟每年能採若干於文到三月內條議奏明

辦理至銅本是否卽在各省協滇餉銀內勻用抑另籌接濟之處統俟該督撫將辦銅章程奉到由部酌核奏明辦理等因於同治十一年八月初一日奉

旨依議欽此欽遵咨行到滇當經恭錄轉行布政使宋廷春按察使程誠督飭有廠各府廳州縣確查妥議去後茲據查明舊章及現在各廠情形會議詳稱滇省額辦京銅正運加運每年計六百三十餘萬斤歲撥銅本銀一百萬兩除運腳雜費外實解到滇銀八十餘萬兩從前均係前三年撥解如丙年工本滇省於甲年具題部中卽核指應撥省分定於乙年夏季如

數到滇至各廠章程向係由官處預借底本陸續交銅又由辦廠之爐戶頭人籌墊油米炭薪廣招丁役通力合作從容攻採彼時民物滋豐財力充裕縱曠日持久此或無力彼復繼之有一廠經一二年更三四輩而後得礦進山鑿鑿深入真脈顯露故百餘年廠多豐旺銅不缺乏自軍興以來銅務停辦十餘年爐戶逃亡砂丁星散各廠礮礮礦路或被荒土填塞或被積水淹沒廢弛已久開辦甚難同治四年前撫臣林鴻年奏請將東川府屬各廠招商墊辦嗣又准戶部以京局鼓鑄需銅孔殷奏明咨滇將東川各廠

每年應辦京銅三百六十餘萬斤趕緊照舊辦解彼
時因省圍未解尋甸尙未克復炭工難覓經臣等奏
請展緩辦理奉

旨允准在案嗣附省及東南軍務肅清即經先後通飭有
廠各屬並委員赴東川一體招商試辦原冀辦有頭
緒即

奏報解運京銅乃今兩年有餘尙無成效推原其故實
因滇省疊遭兵燹商民困窮不能多墊工本深開遠
入僅就山膚尋苗而取礦路一斷又覓他引此處不
獲又易他處名雖採礦實皆僥倖嘗試况廠民五方

雜處良莠不齊厥之大者以萬人計小者亦以千人計從前請

國帑爲工本繩以官法尙慮忿爭滋事若旣非官本卽難繩以官法其自爲計也本出無聊又非恒業何所顧惜有礦卽爭無礦卽散是招商辦廠不惟無益銅政且恐別滋事端刻下全省軍務將次告竣若照舊由部豫撥工本歸官處開辦慎選賢能之員專司其事不但裨益銅政卽各屬游民散勇亦得藉以資生且銅政一復錢法疏通旣有便本省民生更可招鄰省商賈誠如該知府徐承勳所呈三利實爲今日之

急務惟銅本一項戶部所議是否即在協滇餉銀內
勻用抑另籌接濟之處統俟該督撫將辦銅章程奏
到由部酌核奏明辦理等語伏查各省協滇餉銀截
至同治七年止歷年已撥未解不下八百餘萬兩又
自同治八年奏奉

諭旨連常年兵餉每月撥銀十二萬一千六百餘兩迄今
四年所得不及三分之一各省欠解協滇餉銀又不
下四百餘萬兩以致各路軍需萬分掣肘現在軍務
正當得手需餉尤殷指日全省肅清辦理善後各事
需費亦鉅此項銅本若由各省協滇欠餉內提用仍

恐有名無實貽誤匪輕必須另籌有著之款劃定撥發詳請奏明請

旨飭部查照舊章於前三年豫撥銅本所有滇省各銅廠請自乙亥年辦起其應需銅本酌籌若干卽於今癸酉年撥定飭令協撥省分務儘甲戌年夏季全數解滇交清以便豫發各廠員將爐房器具壤木劈柴及應洩積水之處修製齊全妥定章程認真攻採如獲連堂大碇立卽隨時煎銅務期乙亥年卽有銅斤可供採運其每年能運若干此時兵燹之後人民凋零不但砂丁爐戶僱募爲難卽柴薪器具價值亦增數

倍況由各銅廠至四川瀘州陸運三四十站不等運費尤屬不資若照承平時部定銅價斷難辦理實不敢預定數目惟有督飭各廠員儘辦儘解據實開報工價運費俟數年後地方復舊再照定章至迤西所屬之甯臺等廠現在大理已經克復不日一律肅清自當委員開辦以期多多益善各等情具詳前來查滇省銅務從前豫撥工本由官處發給爐戶頭人隨時辦解繩以官法免起爭端定章實屬妥善自軍興以後停辦日久各廠概行廢弛近來復因庫款支絀不能籌撥工本招商墊辦毫無裨益值此全滇軍

務將次肅清自應漸復舊制若撥餉辦銅不惟可復錢法銅政而滇省各屬散勇游民藉此謀生亦善後之要務該司等議詳各節臣逐一核查均屬實在情形合無仰懇

天恩飭部將應撥滇省銅本酌量指撥有著之款仍照舊章於今癸酉年撥定並飭應撥省分務儘甲戌年夏季全數解滇俾得豫發各廠員修製一切器具並借給爐戶砂丁認真採辦務期乙亥年卽有銅起運其每年能運若干以及銅價運費此時人民凋零百物昂貴不能遽定數目惟有先行儘辦儘解據實報銷

俟有成效再照舊章辦理以昭核實所有查明雲南各銅廠實在情形請

旨飭部籌撥工本以資採辦各緣由謹會同雲貴總督

臣

劉嶽昭恭摺

奏伏乞

皇上聖鑒訓示再此案因迤南有廠之元江州等處距省較遠往返行查是以稍逾限期邀請免議合併陳明

謹

奏

會奏官軍攻克順甯府城並錫猛賊巢殲除各逆及

攻雲州獲勝摺子

同治十二年三月

奏爲官軍攻克順甯府城並錫猛賊巢殲除首逆

各逆及圍攻雲州獲勝情形恭摺仰祈

聖鑒事竊臣等前將派記名提督段瑞梅等進攻順甯記

名提督蔡標等進攻雲州各情

奏明在案嗣攻克圍城巢後復派記名提督蔣宗漢

總兵和耀曾副將李應舉彭子祥參將和述廷等統

帶兵勇八千人赴順甯策應又派道員向邦俸倪懋

禮副將呂鎮南楊好謀參將軍修綱岑有富魏春游

擊岑應麟武永貞等共帶兵勇六千六百人赴雲州
助剿又因段瑞梅蔣宗漢等均係記名提督楊玉科
部下營官恐其號令不一復飭楊玉科親統後軍各
營會同辦理營務迤南道蔡錦青知府李鳳書馳赴
前敵督同辦理均授以機宜次第拔發去後疊據稟
報順甯賊匪於官軍未到之先大股出撲兵團原紮
大小中山各營團勇眾寡不敵多有潰散時提臣馬
如龍委帶頭隊之總兵馬青雲尙在蒙化養病屢
秀僅帶數百人駐紮馬鹿塘一帶相距尙遠力難應
援幸段瑞梅於正月二十六日行抵右甸當卽帶同

許士坤周之楨輝師尹劉重發等星馳援剿將所失各營恢復並查明首先潰營之守備楊萃正法示眾卽分派各軍由東南面木街一路移營前進自正月二十八日至二月初七逐日惡戰均獲大勝連破馬裏邑平村街棠梨樹山等處賊營碉樓三十二座殺賊八百餘人官兵亦有損傷守備楊昌善縣丞王廷瓚把總李元吉外委葛發皆先後陣亡等情臣毓英以順甯賊鋒尙銳必須分攻牽制當經飛飭夏毓秀馬青雲帶領所部往攻錫臘賊巢以分賊勢旋據稟覆該員等均因傷病舉發且兵勇單弱萬難專責其

事請給假調理等情時楊玉科已親統後軍行抵順甯臣復飛飭該員分兵攻取楊玉科督飭蔣宗漢李應舉和述廷等挑帶精銳於二月十一日夜間馳抵錫臘出其不意架梯登牆逆匪倉猝出戰官軍更番疊進施放噴筒火箭引燒賊房戰至十二日午刻火勢燎原賊死甚眾紛紛衝逃官軍四面追殺斬擒殆盡當將錫臘攻克段瑞梅許士坤等亦連日鏖戰並施放地道將東南北三面之橋頭山東嶽廟朱家坡施家墳白墳接官廳等處賊營木壘礮樓八十餘座概行攻克殺賊二千餘人惟西面之鳳山虎山係赴

錫臘要路該逆紮有營礮二十餘座卽飛飭蔣宗漢等以錫臘得勝之師移往圍攻於十六七等日連戰克之十八十九二十一等日逆首僞大司征馬得中率領悍黨攻撲各營均經楊玉科督同段瑞梅蔣宗漢和耀曾許士坤等分投擊卻斃賊多名乘勝奪據舊城街象塘寺三官閣祭祀壇東山寺等處直抵城下將沿濠賊壘全行掃除開挖地道晝夜圍攻二十四日地道告成實以火藥卽於是夜施放轟陷城垣數處楊玉科督飭段瑞梅李應舉和述廷許士坤等進攻西北二門蔣宗漢和耀曾蔡錦青陳泰現等進

攻東南二門匪等全力堵禦倒口官軍一面由倒口衝突一面架梯登城內外夾擊賊勢不支退守大街楊玉科懸不資之賞嚴退後之誅指揮各軍節節掃蕩巷戰至二十五日午刻將順甯縣署及東南西三門各街巷攻破殺賊三千餘人屍骸枕藉逆首馬得中率領悍黨一百餘人奔赴北門城樓負隅死守官軍層層圍攻東草壘木四面堆積縱火焚燒直至戌時火勢燎原各逆悉成灰燼府城內外一律肅清楊玉科已親統各軍赴雲州督剿此攻克順甯府城並錫臘賊巢之情形也雲州一路蔡標等由蒙化進兵

於正月二十二日行抵猛郎查看賊巢有烟戶二千餘家築土城兩層牆高濠深城外又環列營礮四十餘座堅險異常州城至猛郎僅六十餘里聲息相通欲攻猛郎必須截斷雲州賊援方易得手當經分派陸純剛黃才廣蘇三寶李春陽等各軍由邦蓋丙弄一帶扼堵賊援進規州城以李朝相呂鎮南覃修剛楊好謀楊步瀛及已革副將黃世昌等圍攻猛郎蔡標自率董雲慶蔡興國馬中馭蔡正坤等各營往來策應正月二十六日一戰將猛郎賊匪擊敗攻克大山頭礮四座官軍長驅而下連紮五十餘營自二

月初二至十七日董雲慶楊發貴楊安等連破東北
面賊營礮樓六座蔡興國黃世昌李成鈺張連元全
正國等又克賊營木礮八座礮樓五座殺賊三百餘
名雲州逆酋僞大司疆馬標率黨屢次來援均經陸
純剛等截剿該逆又繞山徑小路欲襲官軍之後復
經同知謝家瑞王家霖帶勇擊退彼此不能相連惟
雲州城外各要隘逆匪紮立營礮尤爲堅固官軍據
難深入蔡標等查探地勢賊情知距城數里之水磨
平掌三村保州城咽喉要地須先圖該處方易進兵
隨即設法購獲內應派令尉遲東曉李春陽王榮等

帶兵勇三千餘人於二月十九夜間繞至永磨村後
內應舉火爲號尉遲東曉等揮兵衝入殲除悍賊二
百餘人當將水磨平掌三村攻克次早逆酋僞大司
隸冶維煥僞大參軍蔡雙全由城內率黨數千前來
圍攻尉遲東曉等竭力抵禦午後蔡標率援軍趕到
派令陸純剛李朝相黃世昌黃才廣蘇三寶李春陽
等軍分左右翼先出迎敵該員親率蔡興國董雲慶
等帶領後隊直搗中堅自未刻戰至酉刻交鋒十數
次陣斬逆酋蔡雙全及悍賊多名冶維煥亦中鎗斃
命賊大潰官軍跟踪追殺擒斬三百餘人取獲耳記

百餘付追至城邊陸純剛等復乘勝奪據附城之河灣村賊營五座其猛郎賊巢經呂鎮南覃修綱蔡正坤馬中馭楊步瀛等於十八九日內又攻克西南面木壘石礮十六座將巢外賊營一概蕩平蔡標卽分派各官兵直逼賊巢牆下二十夜施放地道轟陷頭層土城該逆仍踞二層蔡標激勵眾軍晝夜輪攻並飭雷應山用開花大礮環列轟擊攻毀巢內房屋多間至二十三日逆酋僞大都督丁雁九亦被礮子擊斃賊黨驚亂官軍乘勢衝入擒斬賊匪六百餘名逃
出之賊復被黃才廣等各營截殺殆盡當將猛郎攻

克蔡標留兵駐防卽率領前軍馳往雲州圍剿各等情稟報前來臣等伏查順甯府雲州地處極邊界連緬甸乃蠻煙瘴雨之鄉咸豐八年雲州回逆僞揚威大都督蔡七二竊據順雲二城破緬甯屠永昌陷騰越戕害官民不可勝計與杜逆聯爲姻亞結爲腹心蔡七二死後其子蔡廷棟繼之匪黨愈眾十數年來杜逆連破各府廳州縣並圍困省城皆此股悍賊居多上年克復大理蔡逆伏誅尙有蔡雙全馬得中馬標冶維煥丁雁九諸逆酋分踞順甯雲州及錫臘猛郎各賊巢互相聯絡爲死守計臣等以各逆皆百戰

餘孽竊據邊疆倘稍延時日坐失事機尤恐勾結緬夷則邊患伊於胡底且該處一屆夏令煙瘴盛發兵勇難支而糧餉維艱利於速戰當攻拔大理府城時各營士卒莫不以師勞役久暫求休息臣毓英與楊玉科所以再三激勵急圖殄此餘孽早奏廓清者非好勞而貪功實因民困未蘇引領望救

聖恩高厚圖報無由故欲滅此朝食稍慰

宵旰之慮今仰仗

朝廷福威一月之內連拔順甯府城並錫臘猛郎老巢計全省賊踞之地祇餘雲州騰越兩城及小猛統馬家

村烏土寨三處不難次第肅清官民同深欣幸此次之捷臣等不敢照軍功例妄邀

獎敘卽楊玉科頻年苦戰連拔堅城掃穴擒渠戰功卓著亦未敢擅擬請獎惟在事員弁著有微勞謹擇尤開具清單籲懇

恩施俾資鼓勵其餘出力文武人員容臣等續查明確再行請獎此次打仗陣亡之都司銜守備楊昌善候選縣丞王廷瓚補用把總李元吉涂連升補用外委葛發李日全及在營傷故之副將銜補用參將趙騫斗均堪憫惻相應請

九鼎三言 卷一 三
旨飭部分別從優議卹以慰忠魂所有官軍攻克順甯府
城並錫獵猛郾兩處賊巢殲除首要各逆及圍攻雲
州獲勝情形謹合詞恭摺由驛馳陳伏乞

皇上聖鑒訓示謹

奏

附奏添派各軍規取騰越片子

再騰越鎮總兵李維述所部兵勇於攻克圍埂賊巢後已陸續拔赴騰越該員亦於二月初六日親率後軍由蒙化起程前進臣等現遵

旨責成該員規取騰越廳城又添派記名提督徐聯魁副將彭子祥帶兵勇一萬人馳往分攻騰越廳屬之馬家村烏土寨至小猛統賊巢已派記名總兵和耀曾參將和述廷守備輝師尹帶勇三千人前往攻剿分起拔發去訖俟雲州克復無論何處未克俱添派各軍馳往助剿務期迅掃逆氛不畱餘孽以仰副

朝廷綏靖邊陲之至意理合附片具陳伏乞
聖鑒訓示謹

奏

會奏官軍攻克雲州城池逆酋悍賊悉數殲除摺子

同治十二年四月

奏爲官軍攻克雲州城池逆酋悍賊悉數殲除恭摺仰

祈

聖鑒事

臣

等前飭記名提督楊玉科於克復順甯府城

後移師進攻雲州記名提督蔡標於攻克猛郎賊巢

後馳赴雲州圍剿又擬派記名提督徐聯魁等分攻

騰越廉屬之馬家村烏土寨賊巢記名總兵和耀曾

等分攻小猛統賊巢均經

奏明在案嗣楊玉科以雲州城堅賊悍非全軍難以收

功請留徐聯魁和耀曾等軍助剿俟州城克復再分道進攻等情臣毓英以所請尙合機宜照准辦理蔡標等於二月二十八日先抵雲州北面之文筆山與前派去之陸純剛等連營前進楊玉科飭段瑞梅蔣宗漢徐聯魁和耀曾各軍由順甯拔發均於三月初一二等日到雲州紮營初三日賊大股出城攻撲蔡標段瑞梅和耀曾等帶隊迎敵正相持間蔣宗漢率參將和述廷都司丁槐用奇兵抄出賊後破新興街前面賊碉二座腹背夾擊大敗之乘勝追殺連破新興街草皮街一帶賊壘四十五座陣斬偽大司疆焉

標及賊眾一千餘人遂渡河直薄城下開挖地道十
三十四等夜岑有富覃修綱裝實火藥施放轟倒外
城十數丈官軍由倒口衝進賊以全力堵禦都司張
德全中礮陣亡精銳多有損傷未能得手楊玉科聞
報由順甯親統後軍馳抵前敵查看州城東南北三
面臨河官軍不得地利惟城西之象山可俯瞰城中
欲取州城必先奪象山而山勢絕險崎嶇萬狀賊扼
要築礮防禦甚嚴楊玉科傳集諸將會議進攻之策
以蔣宗漢攻西門象山蔡標攻北門段瑞梅攻南門
徐聯魁攻東門楊玉科自率中軍和耀曾等分投接

應日夜輪戰逼城而壘十九二十二日蔣宗漢先將
象山腳礮樓三座奪據蔡標段瑞梅徐聯魁等復將
東南北三面附城賊壘二十餘座概行蕩平楊玉科
親率和耀曾等圍攻象山中間賊營亦卽攻克共殺
斃悍賊五百餘人城外賊營祇有象山頂之觀音寺
及前面礮樓二座楊玉科一面督飭蔣宗漢穴地道進
攻一面嚴飭東南北三門官軍連開地道二十餘穴
次第施放雖將城牆轟陷數處而賊以死相拚隨陷
隨築游擊伍起雲都司朱彪等皆力戰陣亡兵勇亦
傷亡不少二十四五等日連次大雨河水漲發地道

多被淹沒軍糧又復告匱加以煙瘴漸起士卒多病
事勢艱難臣毓英疊次飛催楊玉科卽督飭蔣宗漢
等用開花大礮環擊觀音寺屋瓦皆飛二十八日先
將寺外礮樓掃蕩三十日攻破觀音寺後層賊退踞
中層前層楊玉科遂由後層連開地道五穴至初一
日夜告成實以火藥傳齊各軍初二日辰刻施放轟
陷城牆二十餘丈觀音寺中前兩層全行震倒壓斃
賊匪甚眾蔣宗漢和耀曾奪據山頂憑高擊下楊玉
科身先士卒力破西門蔡標陸純剛李朝相黃才廣
由北門倒口衝入段瑞梅徐聯魁李應舉許士坤由

東南兩面架梯登城分投巷戰自辰至午肉薄相當
守備李元吉王正科夏延齡千總和炳山羅永安等
同時陣亡官軍更番疊進立斬逆酋僞大司招馬遇
元僞大司營馬雲驤賊勢不支紛紛潰亂官軍四面
兜剿屍骸枕藉戰至酉刻尙有僞大司制馬安邦等
率領悍賊五六百人死踞城中房屋十數所官兵圍
至初三日楊玉科親督各軍堆集柴草縱火焚燒悉
成灰燼統計此次攻取雲州官弁兵勇共傷亡千有
餘人而賊萬餘之眾先後殲除殆盡城內外一律肅
清等情稟報前來臣等伏查雲州城池襟山帶河形

勢險要自逆首蔡七二及其子蔡廷棟踞爲老巢迄
今十有四載增修牆濠環建礮壘糧餉軍裝無不充
足兇悍賊匪聚集尤多且該處煙瘴較順甯爲尤甚
非實心任事之員人地相宜之軍不能剋期底定
等欽奉

諭旨責成提督楊玉科督同剿辦仰見

聖主知人善任欽感莫名該員受

恩愈深圖報愈切雖糧餉萬分支絀不敢藉詞推延奉檄
之後督同諸將血戰月餘力拔州城殄滅羣醜是皆
上賴

朝廷福威始能收此速效官民同深慶幸現在通省賊嘍
之地僅有騰越廳一城及小猛統烏土寨馬家村三
處_臣等仍飭和耀曾移攻小猛統徐聯魁等馳赴騰
越會同李維述加勁圍攻廳城及馬家村烏土寨並
飭楊玉科統軍繼進合兵攻剿務期迅掃餘氛廓清
全省仰答

高厚於萬一此次克復雲州在事出力員弁擬俟攻克小
猛統賊巢再彙案

奏請

獎敘其打仗陣亡之副將銜補用游擊伍起雲副將銜補

用都司張德全游擊銜補用都司朱彪都司銜補用
守備李元吉王正科夏延齡顧發守備銜補用千總
和炳山羅永安李應泰何天發五品頂戴補用把總
苟坤正楊飛熊李成德蔡必勝六品頂戴補用外委
潘有發王有貴羅芳顯劉得勝羅芳勝謝珩李鍾祥
洪耀光千總職銜羅啟祥候選從九品胡運新外獎
記名拔補把總魏層董文瀛趙祿魏錫楊紹田李如
璧呂紹東和楫劉士明李培玉陸金規周有典韋懷
忠董濤蔣文發金玉記名拔補外委唐光慶張朝開
記保縣丞文生楊鳳藻在營瘴故之游擊銜守備楊

文記保訓導廩生劉鴻達均堪憫惻相應請

旨飭部分別從優議卹以慰忠魂所有官軍攻克雲州城
池逆酋悍賊悉數殲除緣由謹合詞恭摺具陳伏乞
皇上聖鑒訓示謹

奏

會奏彙保節次克復城池賊巢擒斬首要各逆尤爲

出力文武員弁紳團摺子

同治十二年四月

奏爲彙保節次克復城池賊巢擒斬首要各逆尤爲出

力文武員弁紳團恭摺仰祈

聖鑒事竊照官軍於同治十年七月二十三日克復永昌

府城十一年正月二十五日克復永平縣城及曲洞

賊巢三月十二日攻克漾濞賊巢四月十六日克復

雲南縣城前經臣等先將克復情形

奏報在案聲明在事出力文武另行彙案奏懇

恩施又鄧川州浪穹縣兩城及鳳羽白米莊長邑村鍊鐵

橋後五處賊巢先於同治九年九月十一十二及十月月初八初九十二等日次第克復均經恭摺

奏報其在事出力員弁聲明俟查明彙入克復鎮南姚州等城案內請獎嗣彙辦鎮姚各案時正值軍務喫緊各將領轉戰奔馳不遑開報故未附案請獎_臣等伏查永昌府地處極邊昆連緬甸自咸豐十一年被賊攻陷通商外夷藉資糧餉以致逆氛愈熾永平曲洞漾濞乃大理赴永昌必由之路鄧川浪穹爲大理北門鎖鑰雲南縣係大理南面屏藩又有鳳羽白米莊長邑村鍊鐵橋後各賊巢與鄧浪上關聯爲一氣

而橋後鹽井利益尤多杜逆之狡焉思逞蓋有所憑藉而然也當永昌失守時有都司李鳳祥等邀約難民結寨山岡共圖義舉賊攻之不克招之不從同治七年西逆傾巢竄省經臣毓英檄飭乘虛進攻爲釜底抽薪之計該員等遂起兵進剿將永昌城外村寨次第恢復圍逼府城因賊援四集未能成功嗣於同治九年提督楊玉科等連克迤西多城軍聲丕振臣等卽飭分兵進取楊玉科以官軍旣圖永昌當先取鄧川浪穹以牽賊勢攻曲洞漾濞以斷賊援時該員南拔鶴慶州城帶傷未愈負創出敵血戰一月連破

鄧浪二城暨鳳羽白米莊長邑村鍊鐵橋後各賊巢
該員食指復受鎗傷旋卽進攻永平曲洞漾漣並派
所部營官劉重慶等帶兵馳赴永昌與李鳳祥會合
圍攻復籌措軍餉分濟永昌各營提督李維述亦派
候選知府李世傳帶勇前往助剿而杜逆大股援賊
屢由漾漣一帶衝突經楊玉科督同營官徐聯魁蔣
宗漢等扼要兜剿斬擒甚眾永昌之賊久無應援始
能攻克其永平曲洞漾漣楊玉科復身冒矢石力攻
半載始先後肅清李維述楊國發等久攻雲南縣未
下楊玉科於破漾漣後派營官徐聯魁一軍助剿並

親統後軍力剿賊援亦卽攻克各處著名逆首如杜
逆同母兄楊占鵬僞大司馬楊德名僞大司武馬年
三僞大司徒丁在星僞大司直馬福壽僞大都督龍
其瑞等均已伏誅計自拔浪穹鄧川而大理之後路
已空克永昌橋後而杜逆之財源已竭取永平雲南
二縣以撤其藩籬殲楊占鵬等諸逆酋以翦其羽翼
於是官軍遂得長驅而入連克趙州蒙化進拔上下
兩關以成蕩平大理之功湖厥由來皆克復永昌等
處城池賊巢有以基之也節次在事出力文武員弁
兵勇當糧餉兩缺之時賊勢猖獗之際臥薪嘗膽連

克五城七巢均屬著有微勞據帶兵各員擇尤稟請
奏獎前來臣等詳加覆核彙繕清單恭呈

御覽仰懇

恩施此中請獎稍優者實係屢次出力併案獎勵尤出自
逾格鴻慈至應請以把總外委拔補各弁及軍功虛銜頂
戴均由臣等另行咨部註冊外所有彙保節次克復
城池賊巢擒斬首要各逆尤爲出力文武員弁紳士
緣由謹合詞恭摺具

奏伏乞

皇上聖鑒訓示謹

奏

海國圖志

卷一

三

會奏川滇邊界游練土匪聚眾滋事兵團剿辦獲勝

摺子

同治十二年四月

奏爲川滇邊界游練土匪聚眾滋事兵團剿辦獲勝情形現在一律肅清恭摺仰祈

聖鑒事竊據昭通鎮李家福署昭通府知府衍謙稟稱據署大關同知華國清署左營游擊王銓義稟報探稱鹽井渡所屬之仁富鄉興隆場等處現在外來游練勾結本地土匪郭心齋卽朱井沈自稱大元帥糾聚匪黨千餘名勢甚猖獗大有分竄之虞飛稟前來臣等查大關一帶爲迤東各屬來往要道井渡釐金必

由之路乃滇省一線餉源正值西路軍務得手之際萬一該匪蔓延不特入川大道爲之梗阻亦且蹂躪完善全局攸關飛飭昭通鎮李家福署昭通府知府衍謙調集兵團約會川軍剋期進剿去後旋據李家福等稟稱該鎮等聞報卽派左營游擊王銓義等督率兵團星夜開拔約會川省筠連防軍兩面夾攻並派前營游擊涂開科挑帶鎮標勁勇一千名馳往接應把總李玉美團紳彭廷訓率兵團駐紮鹽井渡以遏該匪下竄之路千總王定國團紳陳有章率兵團由分水嶺一路抄襲興隆場股匪都司施文質府經

歷褚衍慶各率兵團分扼臨江溪寶龍場以防該匪
後路王銓義馳抵底坪埧探知匪黨已攻破蒿枝埧
職員蕭本愚寨堡卽約施文質褚衍慶等由仁富鄉
西路前進都司吳嗣華軍功王安邦帶團埋伏左近
要道王銓義於二月初二日親督隊伍直搗仁富鄉
賊巢大隊甫抵後山該匪遙見卽分股迎拒兵團奮
勇直前鎗礮刀矛更番疊進陣斃紅衣賊目四名執
旗賊三名該匪正驚潰間適川軍隊伍分路而來涂
開科接應亦到該匪腹背受敵鼠竄狼奔吳嗣華等
伏兵四起立擒首匪朱井沈從賊王金榜王定川馬

老么曹松柏林管事等多名斬於軍前餘匪被剿窮
蹙翻山越嶺而逃各營隨分隊沿山搜剿次日追至
興隆場該匪遂由荷麻溝一帶奔竄把總張炳銓馮
順等率隊分擊復擒悍賊羅獨手劉大咁陳洪興伍
老九等多名就地正法零匪竄逸山洞該處均係深
山老林大霧迷漫兵圍四路搜捕先後斃匪四百餘
名救出難民老小八十餘名分別遣散回籍王銓義
酌留兵勇駐紮仁富鄉以資鎮壓等情臣等伏查昭
通府屬幅員遼闊在在與川境毗連其地皆崇山密
菁最易藏奸難地方文武隨時查拏而路逕分歧此

擊彼竄大爲地方之患除飭李家福衍謙認真舉辦
團練緝查保甲搜捕山箐以靖奸宄外此次王銓義
等約會川軍剿辦數日之間擒斬首要全股肅清辦
理尙屬妥速其在事出力文武員弁兵團不無微勞
足錄合無仰懇

天恩俯准附入興義府城案內獎勵之處出自

逾格鴻慈所有川滇邊界游竊土匪聚眾滋事兵團剿辦
獲勝情形緣由謹合詞繕摺由驛馳

奏伏乞

皇上聖鑒訓示謹

奏

附奏兵練甚眾糧餉艱難提督馬如龍暫緩開拔片

子

再迺西軍務自上年撫臣奉

旨進征後軍威大振連克多城剿辦最爲得手第兵練甚

眾正值糧餉艱難之際時虞百密一疏臣屢次函商

撫臣督率各鎮將申明紀律務期張一軍收一軍之

效得一處安一處之民以免反側之虞提臣馬如龍

疊奉

諭旨俟部署齊備剋日帶兵逕赴順雲一帶合兵會剿以
竟全功應需餉項著劉嶽昭妥籌接濟毋令缺乏等因

欽此臣當飭軍需局司道趕緊籌辦糧餉以便提臣
全軍剋期進發茲據該局詳稱已委同知龔運光等
攜銀馳赴順雲適中地方設立糧臺豫備支應奈該
處過於彫敝採辦甚難尙未接該委員等稟覆前來
又署鶴麗鎮楊玉科稟稱該鎮克復順甯後卽親率
大隊馳往雲州會同總兵蔡標副將陸純剛各軍四
面圍剿合計滇粵兵練不下六萬餘人兵力足敷調
遣惟所需糧米均由大理蒙化接濟奈路途崎嶇挽
運維艱以致各軍食米不能按期支放兵練時虞枵
腹稟請設法籌撥以資接濟並准撫臣來函亦以前

敵各軍糧米支絀爲慮情形適相符合臣通籌全局
與司道再三熟商若提臣全軍遽行開拔勢必需米
愈多萬一饋餉不敷轉滋饑疲之患且軍務貴於統
一歸一不得不體察情形商之提臣飭令管帶頭隊
之楚雄協副將馬青雲等隨同各軍併力進剿該提
臣整齊後隊一俟糧米有著再行開拔庶兵練不致
擁擠餉糈亦無缺乏似於軍事較有裨益是否有當
謹附片據實陳明伏乞

聖鑒訓示謹

奏

附奏 懇請貴州巡撫曾璧光暫緩入都

陛見片子

再貴州軍興以來變亂十有餘年通省幾無完土歷
經前_臣撫_臣辦理因餉精不濟訖無起色自同治六
年撫_臣曾璧光抵任後籌餉籌兵不憚艱苦始能調
和將士激勵軍心並與各路援師聯絡聲勢將著名
各股匪黨次第掃除全黔底定此皆

皇上知人善任指示精詳故能成功之速_臣查黔省地險
山多民苗錯處軍務雖已告竣而深林密箐保無漏
網餘孽遁跡其中又收復各處城堡投誠就撫者最

多雖經分別安插仍須加意防範現聞各省援軍陸續凱撤僅恃本境兵練分駐彈壓必須布置周密庶可弭患未形臣思撫臣辦理多年成效卓著軍政吏治實力講求規模漸復舊制而駕馭降眾尤爲操縱得宜人人畏威懷德潛消異志是撫臣之於黔省固已思信交孚臣聞該撫臣擬循例陳請

陛見恐一時舉動於地方不無關繫可否仰懇

天恩俯念黔省軍務甫就敕平善後一切尤關緊要

飭令撫臣曾璧光暫緩入都

陛見庶辦理不致紛岐於黔事大有裨益臣爲大局起見

是否有常謹附片陳明伏乞

皇上聖鑒謹

奏

會奏官軍攻克騰越並各賊巢雲南全省肅清摺子

河治十二年六月

奏爲官軍攻克騰越廳城並小猛統烏土寨馬家村各賊巢雲南全省一律肅清恭摺仰祈

聖鑒事竊

臣

等前於克復雲州後飭楊玉科分派所部營

官記名提督和耀曾進攻小猛統記名提督徐聯魁馳赴騰越會同李維述圍攻廳城及烏土寨馬家村

業經

奏報在案查小猛統地方毗連鎮康土知州疆界自逆匪倡亂後有代辦土知州刀悶戾圖聚集土民竭力

固守賊匪屢次圍攻均經擊退境地賴以保全本年

正月官軍進攻順甯雲州臣毓英檄飭該土職乘勢

率團攻剿又飭守備王誠派其部弁千總段綸品等

帶勇會合夾攻二三月內先後掃蕩老街踪街竹園

關廟等處賊營二十餘座附近夷人畏威投誠惟河

尾村三寨賊悍巢堅遽難得手四月十二日和耀曾

督軍馳抵該處查明地勢賊情分派參將李飛龍都

司丁槐守備輝師尹會同刀悶晟圖段綸品等擇要

紮營四面圍攻十五六等日賊匪連次出撲均經和

耀曾督軍擊敗陣斬偽強武大將軍馬應紅偽虎威

大都督楊雙喜等多名賊勢窮蹙刀闕戢圖乘虛購
獲內應於二十夜間奪據寨後禮拜寺舉火爲號和
耀曾揮軍四面攻入戰至黎明殲賊八百餘人生擒
逆首僞右軍大將軍馬言升僞將軍馬從一崔志高
楊增月安金保僞參軍崔志升等六十餘名因路途
寫遠解送爲難卽就軍前正法割取首級耳記解驗
前來順甯府屬全行肅清此攻克小猛統之情形也
至騰越軍務先是都司劉光煥守備王祖佑李珍國
軍功王聯升等帶領兵團分投剿辦節次掃蕩瓦房
街蓋田垵牛旺蒲標等處賊營土城扼守沿江渡口

堵截大理賊援前於同治八年經臣毓英

奏報在案嗣王祖佑王聯升先後陣亡臣復檄飭王祖

佑之胞弟守備王誠接帶兵團會同李珍國等於去

歲八月進兵維時正值楊玉科等克復趙州蒙化上

下兩關圍攻大理逆匪兼顧不遑遂得先後攻克官

乃山施甸墩子南京里等處要隘賊營王誠卽率兵

進取烏土寨於本年三月初三日攻克殲除逆首僞

正武大將軍馬開林僞撫東大將軍馬聯二餘賊斬

擒殆盡乘勝移攻馬家村時李維述派總兵劉興張

宗久等帶頭二隊官軍先後趕到會合王誠將附近

賊營碉樓三十餘座一律掃除殺賊六百有餘直逼賊巢牆下紮營圍攻三月初五日李維述率後隊兵勇親到前敵查明馬家村距騰越六十里地當衝要必須先取此處方易進兵當卽鼓勵各軍晝夜環擊至初七日有村內被脅難民反戈殺斃首逆僞忠信將軍馬萬應奪開柵門王誠率兵先入李維述亦督軍四面齊進復有僞中郎將馬維華僞將軍閃會元等率悍黨千餘拚死衝突副將張漢威首先迎敵登時陣亡官軍人人奮極戰至午後一鼓殲殲卽將馬家村攻克所有反戈難民及老弱婦女均分別救出

安置妥當李維述卽率全軍馳抵騰越查探城內逆首僞大司強馬太廉僞大將軍馬錫齡沙顯揚僞定北參軍馬國升僞大都督馬雙龍僞監軍楊武等逆酋悍黨四千餘眾城外村寨除王誠等節次攻克外尚有賊營碉樓百餘處均係牆高濠深堅固異常李維述督率總兵劉興張宗久等由東南面綺羅中山瞿家營一帶紮營進攻又飭王誠同游擊馬士誠都司李安邦守備李珍國等由西北面觀音塘馬腸河太平街一帶連營而進環攻二十餘日掃平水碓村大莊何家寨等處賊營四十三座先後斃賊一千有

餘惟西南面有雙坡地方係廳城咽喉要地該逆修築土城外環營礮守禦甚嚴李維述懸立重賞挑選敢死之士於三月十二日攻破賊礮五座直逼土城牆下束草填濠圍攻四晝夜逆匪拚死抵敵守備邵長科力戰陣亡游擊馬士誠亦帶重傷至十五日將土城攻克殺賊四百餘人節節趨營前進二十二日徐聯魁率軍到營會商李維述以城外賊營尙多若不設法掃蕩何能直薄城下况新軍初到尤宜乘銳進攻以收速效當卽商飭各營於二十四日黎明出隊攻城逆匪大股迎敵李維述督軍接戰徐聯魁挑

帶精銳擇要埋伏戰至未刻官軍佯敗回營賊匪跟蹤追擊待其深入伏兵四起面面截殺立斬首逆馬錫齡馬雙龍殺斃悍賊千餘人乘勝將城外賊營木城礮樓概行掃除徐聯魁卽會商李維述分派劉興張宗久等進攻東門王誠等進攻西門李杞材李安邦等進攻北門徐聯魁自率鄭開元陳德昌馬雙元孫毓等進攻南門李維述分投策應各軍皆逼城而壘開挖地道該逆見事勢危急晝夜出撲官軍換班輪戰互有傷亡五月初三日東南面地道告成實以火藥卽於是夜施放轟陷城垣十餘處各軍四面蟻

附而進分投巷戰至初四日戌刻各門城樓均爲官軍奪據該逆自料難支紛紛衝逃經李維述徐聯魁督軍內外夾擊殲除馬太廉馬國升沙顯揚楊武等首從二千餘賊卽將騰越廳城克復永昌府各屬一律肅清等情稟報前來臣等伏查雲南軍務自咸豐六年迄今十有八載不惟文武員弁紳士兵民死亡者難以數計卽前任督撫臣或死於危急或死於戕害或死於憂勞禍如燎原不可嚮邇較髮逆之踞江浙捻匪之擾兗豫歷時更久收功亦難蓋由滇省地處極邊毘連外域名爲一州一縣實則縱橫數百里

或千餘里其中峻嶺崇山蠻煙瘴雨兵少則不敷分
布兵多則糧運維艱非如平坦之區形勢燎如指掌
中原之地四面易於兜圍此用兵之難於地形者一
也江南山東等省沃野千里商賈輻輳雖遭兵燹尙
有易籌之款項不竭之餉糈若滇省地瘠民貧承平
時錢糧稅課不敷開支歲需外省協濟軍興以來正
款收獲無幾協餉尤多積欠故滇軍每名月餉六錢
且不能屆時卽領此用兵之難於軍用者二也當日
髮捻各逆奪地掠民意在竄擾而滇省之賊踞隅負
固意在割據究之竄擾者其勢易分故深入適以取

敗割據者其勢彌固故堅守難於進攻賊所恃者兩
結漢民則人無異心外連諸夷則退有餘地甚至大
理已破餘孽猶據順雲騰越三城爲死守計皆血戰
而後克之此用兵之難於謀攻者三也况臣等用兵
之初羣雄別戶而分門內外懷疑而構怨既苦於
君門萬里憑訴無從更苦於轉戰數年成敗未定處危疑
之地策久遠之圖無時不惕厲戰兢迺蒙

朝廷不棄庸愚疊經游擢昇之疆寄以重其任寬之數年
以一其權凡得力將弁一經薦拔悉邀不次之

恩破格之

賞以激勵人才而其

軫念邊陲與當日髮捻之擾害

近畿不分軒輊各將弁士庶仰體

皇恩高厚

聖主憂勤無不授命致身毀家紓難故得挽從前之逆劫
而共享此後之

昇平也抑臣等不敢壅於

上聞者計統師以來雖賴羣策羣力而獨當一面百折不
回則以楊玉科爲最當省圍初解時附省東南賊氛
尙熾臣等兼顧不遑而楊玉科孤軍深入縱橫轉戰

不以糧餉掣肘而觀望遲疑不以煙瘴盛發而畏難
退縮並不以負創患病而請假偷安用能掃穴擒渠
既收大理之功復報順雲之捷而騰越廳城及各處
賊巢皆得以次削平是皆仰賴

皇上宸謨廣運

訓示周詳

治炳中興

功邁前古樞部諸臣籌策剴餉贊成定遠之勳臣等遭逢
際會倖免愆尤曷勝慶幸第念傷亡將士眷屬無依
烽火殘黎元氣難復惟有督飭司道及地方各官將

善後事宜妥籌辦理以期長治久安仰答

鴻恩於萬一此次肅清全省及攻克騰越廳城各處賊巢
並前次克復雲州城池除記名提督雲南開化鎮總
兵騎都尉世職楊玉科應如何

加恩破格優獎之處出自

聖裁其尤爲出力員弁謹擇尤開具清單恭呈

御覽顯懇

恩施至應請以把總外委拔補各弁及軍功虛銜頂戴由
臣等另行咨部註冊其餘出力文武並節年各路籌
辦糧餉各員容臣等續查明確再行請獎歷次打仗

陣亡之廣東補用副將張漢威副將銜雲南補用游擊周之楨補用參將何湛源游擊銜補用都司陳學游擊銜補用守備邵長科都司銜補用守備董良知余彭壽彭玉鶴麗鎮右營千總奚祖培守備銜補用千總吳壽蔡正有補用把總楊李保吳萬元李中山袁世才杜允和李成才單雙林李盈沈頻發外獎記名拔補把總李萬鎰傅聯培趙美章王聯升傅聯勝田彰岳丕榮補用府經歷范亮寅及在營傷故之游擊銜補用都司韋學輝在營瘴故之運同銜補用同知直隸州耿炳青三品銜休致守備楊天保世襲雲

騎尉曹安國曹人傑均堪憫惻相應請

旨飭部分別從優議卹以慰忠魂所有官軍克復騰越麻
城並小猛統烏土寨馬家村各賊巢雲南全省一律
肅清緣由謹合詞恭摺由驛馳

奏伏乞

皇上聖鑒訓示謹

奏

會奏查明副將闔門殉難懇

恩旌卹建祠摺子

同治十二年六月

奏爲查明副將闔門殉難死事最烈懇

恩優加旌卹並准建立專祠以彰忠節恭摺仰祈

聖鑒事竊查咸豐十年順甯府屬緬甯廳城失守署順雲

協副將楚雄協副將魁昌署順甯府事知府銜候選

同知汪堃署緬甯通判盛際唐巡檢胡錦堂王兆泰

守備譚嘉祿把總何懷清等被戕並魁昌家屬殉難

各情經前撫臣徐之銘具

奏請

旨飭部旌卹在案臣昔到雲南軍營早聞魁昌忠勇之名
深爲悼惜上年統軍克復大理移駐蒙化督攻順甯
雲州據故老遺民面述該副將戰守之苦死難之慘
莫不歔歔流涕聞者皆爲感動本年順雲肅清臣卽
檄飭署順甯府知府陳泰琨署緬甯通判馮祖祺詳
加採訪據查明順雲協副將原駐緬甯廳城咸豐七
年十月雲州逆首蔡七二等竊踞州城魁昌與署雲
州知州吳景蘇帶兵募勇前往圍攻直薄城下因大
理蒙化援賊猝至腹背受敵退守緬甯吳景蘇力竭
陣亡八年九年賊疊次攻撲緬甯均經擊退十年正

月蔡逆復大股圍逼麻城百計環攻誓在必取魁昌
倡首同在城官紳毀家紆難苦戰支持若當時督撫
臣能遣兵赴援或普洱永昌各文武就近出師策應
內外夾擊亦不難破賊解圍乃屢申告急之文僅有
耿馬宣撫司罕恩澤情殷報

國志切同仇助以土兵濟以糧餉方幸有此一獲生機
詎意罕恩澤爲族人謀害緬城援絕糧盡遂不能支
矣先是魁昌有老母迎養在署及賊逼緬爾欲遣丁
送母他避其母曰汝能盡忠於

國我死無恨不可先去以爲民望又欲遣子出亡爲存

宗祀計其子曰父爲臣死忠子爲子死孝各得其所
曷忍獨生魁昌乃慨然浚井以待而早有城亡與亡
之志矣自十年正月二十六日至閏三月初七日賊
用地道轟陷城垣二十八處魁昌皆力戰卻之初八
日黎明忽有內亂賊遂由側口衝入魁昌巷戰多時
身受數傷退入署中負母投井其妻及子女隨之同
時死焉當其帶傷旋署有把總何懷清率兵丁數人
禦賊署外逆鋒稍卻故魁昌等得從容就義而該弁
兵亦卽戰沒署知府汪堃等同日被戕又有把總楊
玉成誓不從賊舉家自焚其餘紳民被害甚眾因蔡

逆多傷精銳欲得魁昌而甘心聞其投井引出支解
備極慘傷至今相去十有餘年百姓猶哀慕不已共
擬建祠奉祀呈請轉懇

奏聞各等情稟覆前來臣伏查署順雲協副將楚雄協
副將魁昌扼守孤城支持三載忠孝節義既以萃於
一門俎豆馨香允宜垂乎千古合無仰懇

天恩飭部優加旌卹並

賞准於死事地方建立專祠飭部臣行查該副將旗籍都
統佐領開具該副將母氏及其妻氏子名咨滇附祀
以闡幽光而彰忠節至同在城殉難之署知府汪莖

沈鼎考商
卷一
等想已均邀

卹典其陣亡之署雲州知州吳景蘇把總何懷清被賊之
耿馬宣撫司罕恩澤舉家自焚之把總楊玉成等均
堪憫惻可否並懇

恩施從優議卹與汪莖等一體入祀以慰忠魂之處出自
逾格鴻慈此外被害官紳兵勇容俟續查彙辦所有查明
副將闕門殉難懇

恩施卹建祠各緣由謹會同雲貴總督_臣劉嶽昭恭摺具
陳伏乞

皇上聖鑒訓示謹

奏

貞吟卷後

卷一

The image shows a large rectangular frame with a thick black border. Inside the frame, there are ten vertical lines that divide the space into eleven columns. The lines are thin and black, and the background within the frame is white. This layout is typical of a ledger or account book page. There is no text or data within the columns.

...

...

...

會奏表揚忠節懇

恩旌表建祠片子

再據記名提督兼襲雲騎尉和耀曾呈稱竊職父鑑
由武舉入營拔補千總升補大理城守營都司咸豐
二年正月初九日大理逆回楊騰雲等在府城內四
牌坊禮拜寺聚眾謀爲不軌職父奉前雲南提督榮
玉材派往彈壓解散慘被賊戕蒙奏請議卹在案十
年九月初九日賊陷本籍麗江府城職母趙氏投江
自盡彼時職帶勇在石鼓一帶紮營堵剿聞訃痛不
欲生祇以逆賊未平苟延殘喘効力行間現在全滇

軍務業已肅清惟念職父被戕雖蒙請卹職母殉難
尙未報明仰祈據情奏懇

恩施以光泉壤又據大理府太和縣紳耆李光裕等公呈
都司和鑑被戕最慘請於大理城內設立專祠藉慰
忠魂各等情臣查都司和鑑當逆賊麴聚之時不避
鋒鏑挺身前往解散致爲賊戕實屬忠勇性成深堪
憫惻和趙氏於本籍失守之日志懷堅貞投江自盡
尤爲節烈可風和耀曾束髮從軍十有餘載尙能克
承先志奮勉圖功可否仰懇

天恩飭部將和趙氏照例旌表並准於大理城內建立專

祠將都司和鑑及其妻和趙氏一併入祀以彰忠節
出自

逾格鴻施抑臣更有請者滇省變亂多年各屬文武員弁
紳民兵勇或臨陣捐軀或見危授命所在皆有節經

奏請

飭部議卽有經部議照例准入祀昭忠祠者有奏奉

特旨准其入祀者而各屬地方變亂之後祠宇傾圮祀典
廢弛殊不足以闡幽光臣現檄飭各府廳州縣查明
如原建有昭忠祠而經毀壞者一律興修如原未建
有祠宇並懇

賞准一體建設將歷年在該處陣亡死難之文武員弁紳
民兵勇照例分別入祀俾忠魂義魄不至湮沒則

曠典榮頒永垂不朽矣臣爲表揚忠節起見謹會同雲貴

總督臣劉嶽昭附片具陳伏乞

聖鑒訓示謹

奏

同治十二年七月初十日奉

硃批另有旨欽此

恭奏額懇

陸見捐子

同治十二年閏六月

奏爲

微臣

額懇

陸見事竊

臣湘南下士布衣從戎不數年間蒙

恩擢昇兼圻重任早應陳請入

覲稍伸犬馬瞻戀之忱祇以滇黔軍務未靖未敢冒昧瀆

陳今幸仰賴

天威兩省地方漸次肅清黔省善後事宜撫

臣

曾璧光辦

理裕如滇省善後現亦次第舉辦

臣

岑毓英不日

即可回省

臣

卽會商從長計議俟奉

疏批俞允

臣

卽擇期北上另摺具陳至總督衙門印務應

請

備員署理之處出自

聖裁所有

敬臣

顛請

陛見緣由理合繕摺具陳伏乞

皇上聖鑒訓示謹

奏

會奏請建已故督臣勞崇光專祠摺子同治十一年七月

奏爲已故督臣功德在民紳民籲請建立專祠恭摺仰

祈

聖鑒事竊前督臣勞崇光於同治六年在任因病出缺渥

荷

皇恩賜卹予諡飾終之典有加無已凡在臣工同深欽感

惟念滇省自咸豐十年軍務喫緊前督臣張亮基引

疾而去繼之以劉源灝福濟均推諉不前潘鐸毅然

入滇旋被賊害前撫臣賈洪詔林鴻年復逗遛川境

觀望徘徊滇中官民皇皇罔知所指懷報

國之心者孤立無援存騎牆之見者肆行無忌人心解體賊勢披猖滇事幾不可爲矣勞崇光奉

命來滇之時正潘鐸被戕之後浮言疊起枝節叢生既不
以衰病而陳情更不以艱危而卻步登車攬轡志切

澄清飭

臣

派兵將楚雄一帶嚴密防守使杜逆不能

下窺先進兵迤東克復曲靖馬龍霑益各城擒斬馬
聯陞馬榮諸逆以除門庭之患迨曲郡旣克該督

臣

移駐平彝與

臣

密商復鎮雄州平豬拱箐使川滇大

道疏通文報協餉無阻然後再併力進征迤西遂奏

委

臣

分道進剿該督

臣

亦卽晉駐省垣整頓地方事

宜不遺餘力而羈縻反側尤費苦心方期策勵羣材
廓清邊圉乃竟賫志而亡深堪悼惜該督臣沒後雖
回目楊振鵬等復叛引賊圍省而豬拱箐苗巢已平
臣等率師赴援節年轉戰仰賴

天威遠被全省肅清潮厥由來平苗平滇皆出於勞崇光
之成算滇中紳民追念舊德情難自己茲據在籍紳
士鹽運使銜分省補用道劉廷銓李鈺華等擬於省
城建立專祠歲時享祀呈請具

奏前來臣伏查已故督臣勞崇光前撫粵西懋昭偉績
移督嶺表克濟時艱迫其自黔入滇尤屬蹈危履險

而乃鞠躬盡瘁上紆

宵旰之廛遠慮深謀早定治安之策功既垂諸久遠祀宜

奉以馨香合無仰懇

天恩俯准該紳等所請於滇省建立勞崇光專祠春秋由

官致祭以順輿情而彰忠盡所有請建已故督臣勞

崇光專祠緣由理合會同雲貴總督臣劉嶽昭恭摺

具陳伏乞

皇上聖鑒訓示謹

奏

會奏懇

恩將已故督

臣

恆春從優議卹並其妻博禹特氏照例旌

表片子

再咸豐七年滇省戒嚴前督

臣

恆春及其妻博禹特

氏憤急自盡經前撫

臣

舒興阿等

奏明在案茲據滇省紳民呈稱前督

臣

恆春持躬端謹

爲政清廉咸豐六年率師赴貴州援剿嗣因滇回亂

作撤兵旋滇進攻迤西賊匪正相持未下而曲江等

處之賊復於上年閏五月二十一日竄逼省垣猝不

及防致將城外居民燒殺殆盡該督

臣

登陣守禦日

擊心傷親身帶隊出城欲與賊死戰甫至南門遇司
道各員極力勸阻旋署憂憤莫釋其妻博禹特氏又
以大義責之遂同時自縊迄今年久尙缺飾終之典
竊念該督臣志切救民孤立無助竟致引咎捐軀深
堪憫惻其妻相夫以義視死如歸尤屬大節凜然足
爲矜式紳等不忍視其湮沒籲請奏懇

恩施等情前來臣等伏念潛德幽光今古重表揚之典褒
忠宥過

朝廷彰寬大之仁滇省軍興日久各屬殉難官紳婦女二
經採訪奏

國皆蒙優子旌卹仰見

聖主篤念蓋臣維持風化無微不至欽感莫名今全省軍

務肅清可否仰懇

天恩賞准飭部將已故督臣恆春從優議卹並將其妻博

禹特氏照例旌表以彰忠節謹會同雲貴總督臣劉

嶽昭附片具陳伏乞

聖鑒訓示謹

奏

奉

硃批恆春著交部從優議卹伊妻博禹特氏著照例旌表

該部知道欽此

會奏懇

恩賞准紳民請將前撫臣徐之銘開復議罪一切處分照

例賜卹片子

再前撫臣徐之銘由翰林散館外用歷任府道升授

雲南臬司咸豐八年到滇九年仰蒙

文宗顯皇帝特達之知簡任滇撫嗣前督臣張亮基告病出

省照例兼署督篆潘鐸到任即行交卸數年來賊疊

次圍省徐之銘晝夜登陴籌辦防剿省城賴以保全

同治二年正月十五日馬榮變起倉猝潘鐸被戕於

五華書院賊竄至南門大街臣時代理藩司與賊巷

戰徐之銘先在南城布置防守遙見即來會合各司道皆不期而會該撫臣痛哭流涕以渥荷

皇恩忝膺臣寄不能平賊當一死以報

國欲拔劍自刎臣與前臬司花詠春署糧道張同壽署

鹽道宋延春等極力勸阻以城亡與亡乃臣子之大

節今賊雖入城尚可決一死戰若其不捷同臣闔署

舉火自焚亦不為晚於是飲血誓師以死相持將東

南二門竭力固守並多方用間以孤賊勢而馬如龍

及各屬紳民偵知該撫臣與臣等猶在始來應援遂

於二月初一日合兵被走羣逆滇省危而復安該撫

臣據實陳

奏欽奉

諭旨徐之銘著來京聽候議罪賈洪詔著補授雲南巡撫

欽此該撫

臣避

旨將行因紳民號泣攀留僉謂滇事萬分危急新任督撫均未入滇幸有舊撫在任猶可維繫人心號召忠義若新任未到而去是棄滇民也請俟接替有人再行北上等語徐之銘欲卽北上而不能欲從眾請而不能憂畏交縈加以積勞成疾竟致不起滇中紳民既傷該撫之死難以自明又慮挽留之忱無由上達茲

據呈訴請奏懇

恩施將徐之銘開復議罪處分照例賜卹以闡幽光等情
前來臣等伏念古來孤臣孽子身處危疑負罪引慝
其委曲苦衷不能自白者有之不忍自言者有之我
朝厚待臣工超越千古凡有微勞可錄皆蒙
特沛隆施但能爲

國捐軀無不從優賜卹甚至廢員起用逆首投誠生者
共荷

恩施死者同邀卹典篤念勳舊在遠不遺可否仰懇
天恩賞准該紳民等所請將徐之銘開復議罪一切處分

照例賜卹以順輿情之處出自

逾格鴻慈謹會同雲貴總督臣劉嶽昭附片具

奏伏乞

聖鑒訓示謹

奏

奉

硃批另有旨欽此

恭謝

恩賞五十生辰物件摺子

同治十二年八月

奏爲恭謝

天恩仰祈

聖鑒事竊臣於同治十二年八月初六日承准辦理軍機

處閏六月十九日咨開本日

發下賞雲貴總督劉嶽昭五十生辰物件計

佛一尊

御筆懋勳錫羨匾額一面

御筆福壽字各一張紫檀嵌玉如意一柄蟒袍面一件小

卷吉綢八件湯綢八件等因交兵部遞交到

臣臣當

卽出郊跪迎至署恭設香案望

闕叩頭祇領訖欽惟我

皇上福被羣生

壽臻無量光華

佛篆湧寶相於

璇題繪繡

堯章褱錦衣於玉藻天馬

紀十全之烈輯瑞從心

山龍臨萬國之朝

垂裳端拱

舜球在握指揮徧瀛海而遙

禹服同珍聲教播恆河之外臣久蒙

豢養忝列封圻甫躋服政之年涓埃未報愧乏知非之學

尺寸無長乃

龍命之欣承實夢想所不到觀

鳳翥鸞翔之煇耀華袞增榮仰

天圓月滿之莊嚴邊陲獲祐望

九重而拜舞提攜共羨其晶瑩被五色之班爛什襲更歌

夫安吉沐

主恩之至重非臣分所能安雖

天地爲心如父母不言施報而且明自問卽愚賤亦具性情凡茲食息之歲時悉出

生成之雨露臣惟有捐糜頂踵誓勵此蒲柳之資黽勉馳驅冀收夫桑榆之效以期仰報

高厚鴻慈於萬一所有微臣榮幸感激下忱謹繕摺叩謝天恩伏乞

皇上聖鑒謹

奏

恭謝

賞穿黃馬掛摺子

同治十二年八月

奏爲恭謝

天恩仰祈

聖鑒事竊

臣

於同治十二年七月二十七日准撫

臣岑毓

英谷同治十二年七月初十日奉到克復騰越麻城

全省肅清

批摺欽奉

上諭雲南巡撫岑毓英親臨前敵調度有方著賞加太子

少保銜該撫前經賞給騎都尉世職著加恩改爲一等

輕車都尉世職雲貴總督劉嶽昭籌備戰守克竟全功
著賞穿黃馬掛等因欽此臣當卽恭設香案望

闕叩頭謝

恩訖伏念臣湖湘下士韋布庸材籌筆才疎未習六韜之

機括枕戈願切欲除三逸之腥羶發蹤

訓稟夫

宸謨機槍敵戢擒擄功資夫士力擊鼓聲懽顧

天討之克彰平成共慶無時艱而未已悚惕滋深乃蒙

適格之恩施頓覺章身之絢爛

榮增華袞允符元吉之占

賚重解衣式煥中央之色被服而回思短褐躬鞠難勝馳
驅而遠望

胤稜心銘永矢臣惟有益堅素志倍竭丹忱繹

綸綍以書紳勉勤驚策懷衣裳於在笥深戒鷄濡以期仰

報

高厚鴻慈於萬一所有臣感激下忱理合繕摺叩謝

天恩伏乞

皇上聖鑒謹

奏

